

萬 有 文 庫

第 二 集 七 百 種

王 雲 五 主 編

續 古 文 苑

(四)

孫 星 衍 輯

商 務 印 書 館 發 行



苑 文 古 續

(四)

輯 衍 星 孫

書 叢 本 基 學 國

王雲五主編
萬有文庫
第二集七百種

續古文苑
四冊

中華民國二十六年三月初版

輯者 孫星衍

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

續古文苑卷第十六

賜進士及第授通奉大夫山東通省督糧道加三級孫星衍撰

碑志二

宋臨澧侯劉使君墓誌

曾祖宋孝皇帝。祖諱道鄰。字道鄰。侍中太傅長沙景王。妃高平平陽檀氏。字憲子。謚曰景定妃。父暢。道淵。永寧令。祖貌稚。玃琅邪太守。合葬琅邪臨沂莫府山。父諱義融。字義融。領軍車騎桂陽恭侯。夫人琅邪臨沂王氏。字韶風。父蘭長仁。東陽太守。祖穆伯遠。臨海太守。合葬丹徒練壁。雩山。所生母湯氏。宣城人。葬練壁。雩山。兄覲茂道。散騎常侍桂陽孝侯。夫人廬江瀟

何氏憲英父愉之彥和通直常侍祖叔度金紫光祿

大夫合葬練壁雩山第三弟彪茂蔚祕書郎葬江乘

白山三字補夫人河南陽翟褚氏成班父方回太傅功

曹祖叔度雍州刺史第四弟寔茂三字補軌太子舍人

夫人琅邪臨沂王氏淑婉父津景源中書郎祖虞休

仲左衛將軍合葬二字補江乘白山第五弟季案宋書作爽疑

此有誤茂通海陵太守葬練壁雩山夫人陳郡陽夏袁

補氏妙補父淑陽源太尉忠憲公祖豹士蔚丹楊尹

第一姊茂徽嫡陳郡長平殷臧憲郎父元素南康太

守祖曠思泰補軍功曹重嫡琅邪臨沂王閔之希損

鎮西主簿父昇之休道都官尚書祖敬宏左光祿儀

同第二姊茂華。適廬江。鬻何求子有。祕補書郎。父鎮長。宏宜都太守。祖尚。禰之彥德。司空簡穆公。第三姊茂姬。適平昌安。孟詵元亮。中軍參軍。離。策謂離。父靈休。補太尉長史。祖祖彥遠。丹楊尹。第四姊茂姜。適蘭陵蕭惠徽。中書郎。父思話。征西將軍儀同三司。祖源之。君流。前將軍。第五妹茂容。適蘭陵蕭瞻。叔文。父斌。伯舊。青冀二州刺史。祖募之。仲緒。丹陽尹。重。適濟陽。圍蔡康之。景仁。通直郎。父熙。元明。散騎郎。祖廓子度。太常卿。第六妹茂嫻。適濟陽考城江遜。孝言。父湛。徽。淵。左光祿儀同。忠簡公。祖夷。茂遠。前將軍。湘州刺史。重。適琅邪。臨沂王法興。驃騎參軍。父翼之。季弼。廣

州刺史。祖楨之公幹。侍中。夫人濟陽考城江氏景嫗。父淳徽源。太子洗馬。祖夷茂遠。前將軍。湘州刺史。第一男晃補長暉。出後。兄紹封桂陽侯。第二男旻淵。高拜臨澧侯。世子。第三男暉淵華。第四男暈淵邃。出後。第四弟寔。第五男■淵穎。第六男晏淵平。第一女麗昭。第二女麗明。第三女小字僧歸。亡葬■。

宋故散騎常侍護軍將軍臨澧侯劉使君墓誌

君諱襲。字茂德。南彭城人。宋高祖武皇帝弟景王之穆也。神姿韶雅。風譽夙懋。弱冠拜祕書郎。逮二凶肆禍。人倫道消。君身離幽執。僅免虎口。事清。還復舊職。以母憂去官。既除。又拜祕書郎。轉太子舍人。自升■

二宮令望允緝。出爲鎮蠻護軍。廬江太守。莅政平簡。聲績兼著。遷明威將軍。安成太守。屬中流構疊。四表迷逆。君英議獨發。招會如神。故能以一■之旅。剋濟忠節。義超終古。誠冠當今。皇朝欽嘉。爵賞取榮。除輔國將軍。郢州刺史。封建陵縣開國侯。俄徵太子右衛率。加給事中。未拜。遷侍中。冠軍將軍。改封臨澧縣開國侯。鎮肅石頭。實當關要之寄。遷左衛將軍。未拜。仍除中護軍。春秋卅有八。泰始六年三月十日。薨於位。聖主嗟悼。朝野傷悲。有詔。故中護軍臨澧縣開國侯。志行貞純。才用理濟。忠勳著於艱時。勲績倡乎泰運。年志始壯。奄焉凶折。悲傷惻割。實兼常懷。思加寵數。

以申哀榮。可贈護軍將軍。加散騎常侍。餘補如故。諡曰忠侯。粵五月廿七日庚寅。將葬于琅邪之乘武岡。以悲幽明之殊隔。傷一訣而永分。仰清徽而攬淚。俵

元石而裁文。其辭曰。

峩峩山岳。效靈允矣。君子誕膺。休禎支蔭。帝宇締慶。文明德以行高。仁與華二宮。官政兩服。國步時屯。艱難斯屬。忠則忘家。義實光族。朝廼欽庸。以望既歸。寵惟或侍。帝言或司。蕃戎方宏。乎美家邦。如何不躬。芳稍述日月有時。考辰筮吉。元堂啓基。深泉永窆。長悲

案此碑曾祖以下列在題前與北魏崔敬邕誌同例餘不多見

宋張氏墓誌

宋故臨渭縣侯湘東太守張府君諱濟夫人上氏諱靜姬第三女推兒春秋卅有一亡於偏憂元徽元年十月甲辰十七日庚申權假窀穸於西鄉

遠葉蘭飛浚源璇潔履順早辰含章妙歲選史圖容循詩範節皎鏡冬泉優柔春蕙濶北忸行營東慙藝冥昧慶善窅翳壽仁泣血賈性團憂殲身罷景方旦摧華載春壠木已藹墓草行陳朱火幾爛元夜無晨故永陽敬太妃墓誌銘

梁徐勉

永陽大太妃王氏琅邪臨沂人也其先周靈王之後自秦漢逮於晉宋世載光■羽儀相屬既以備于前

志故可得而畧焉。祖粹給事黃門侍郎。父儼左將軍
司馬尋陽內史。並見稱時輩。太妃體中和之氣。稟華
宗之烈。蹈此溫恭。表茲淑慎。孝敬資於冥發。仁愛
於自然。至乎四教六訓之閑。工言貞婉之德。無待教
成。罔不該備。故景行著于中。■淑問顯乎言。歸作嬪
盛德。實光輔佐。親縫幕之用。躬服澣之勤。及早世釐
居遺孤。載藐提攜。撫育逮乎成備。斷織之訓。旣明闔
門之禮。斯洽劬勞。必盡。曾不移志。用能緝睦于中外。
亦以宏濟乎艱難。雖魯姜之勤節。曹妃之敬讓。方之
蔑如也。皇業有造。殷憂啓聖。追惟魯衛。建國永陽。恭
王纂嗣。蕃號式顯。廼拜爲太妃。策曰。維天監二年六

月甲午朔十日癸卯。皇帝遣宗室員外散騎侍郎持節兼散騎常侍蕭敬寶策命永陽王母王氏爲國太妃。曰：於戲！惟爾茂德內湛，粹衿範外昭。國序凝芬，蕃庭仰訓。是用式遵舊典，載章徽服。往欽哉！肅茲休烈，可不慎歟！備綸瑱之華，而降心彌約。居千乘之貴，而處物愈厚。旣而恭王不永，禮從■訓導嗣孫，載光榮祉。年高事重，志義方隆。宜永綏福履，而奄奪鴻慶。以普通元年十月廿三日，遘疾。十一月九日己卯薨於第。春秋五十有九。詔曰：永陽大太妃奄至薨逝，哀摧切割，不能自勝。便出敘哀，可給東園祕器，喪事所須。隨由■辦。祖行有辰，式宏茂典。又詔曰：故永陽大

太妃禮數有殊。德行惟光。訓範蕃嗣。式盛母儀。即遠
戒期。悲懷抽割。可詳典故。以隆嘉謚。禮也。粵其月廿
八日。戊戌。祔瘞于琅邪。臨沂縣長干里黃鵠山。用宣
風烈。以昭弗朽。廼爲銘曰。

清瀾悠邈。其儀尚矣。龍光疊照。風流世祀。猗歟。因匱
於昭不已。誕資仁淑。作嬪君子。幽閑表操。明德自躬。
推厚處薄。秉默居沖。參差採芣。揜映言工。鑒昭彤管。
識懋休風。凝芬載湛。芳猷允塞。徙舍爲訓。止閭成則。
曹號母儀。豈伊婦德。穆茲閨闈。形于邦國。龍飛集運。
禮數攸鍾。憲章盛典。車服有容。泰而愈約。貴則彌恭。
蕃祉方茂。纂嗣克重。巾帶差池。朝夕咸事。雖曰任傅。

永請斯備。是惟仁姑。厥德可庇。恂恂濟濟。蘭芬瓊祕。
光陰易晚。祺福難留。閨儀罷映。綸華奄收。奠遷朱邸。
駕指行楸。芳■是勒。大■方攸。
尚書右僕射太子詹事臣勉奉敕撰。

丹陽尹湘東王善政碑

梁裴子野

皇上建顯號。垂鴻名。廣大配乎天地。光華象乎日月。
長駕遠撫。橫逸乎都外。策鏡區域。充塞乎無垠。上冠
九垓。旁濟八表。制禮以告成功。作樂以彰治定。福應
允臻。祥慶符合。六府孔修。九官咸事。於往歲也。有司
奏以湘東王爲宣惠將軍丹陽尹。旣而下車爲政。振
民育德。循名責實。舉無遺慮。若夫據饋累起。求賢如

不及卑身折節用人若由己玉帛旅於上園辟書交
乎塗路求餘論於故府想遺風於舊哲延儒生於東
閣命文學於後車重門洞啓列筵廣置四民摠至獄
訟殷集王兼而治之綽有餘裕上宏其禮下悅其風
虛往實歸人得所至由是百吏仰成具僚斂衽千里
之閒有懷必亮躬親勸課賦政授時辨相物宜務盡
地利由是仍歲有秋餘糧栖畝是以縉紳先生愀然
相顧遂造象魏拜而陳之有詔報曰纖介之善春秋
必書吏民歸美難用抑絕於是二三君子歡得所奏
乃擇工良匠追石名山撰德選辭興事篆刻俾萬代
之下知斯文之在斯銘曰

茫茫禹迹，經啓萬方。平秩肇定，曰若我皇。并苞九域，
畫野分疆。猗歟帝子，日就月將。疏爵分品，奄有瀟湘。
君王光啓，旣表南國。肇允神童，翻飛上德。導達元微，
優游翰墨。行成師範，文爲麗則。帝曰爾諧，出康庶績。
勿替敬典，大猷允迪。我王顯允，洵美且麗。夙夜乾乾，
有隆无替。光贊大朝，庇民濟世。京邑翼翼，永承嘉惠。
魏故中書令祕書監使持節督兗州諸軍事安
東將軍兗州刺史南陽文公鄭君之碑

公諱義，字幼麟，司州滎陽開封人也。肇洪源於有周，
胙母弟以命氏。桓以親賢，司徒武以善職，並歌緇衣
之作，誦乎弈世。降逮於漢，鄭君當時。播節讓以振高

風大夫司農創解詁以開經義迹刊圖史美灼二書
德音雲翻碩響長列揚州以十策匡時司空豫州以
勲德著稱高祖畧恢亮儒素味道居真州府招辟莫
之能致值有晉弗覓君道陵夷聰曜虔劉避地冀方
隱括求全靜居自逸屬石氏勃興撥亂起正徵給事
黃門持節遷侍中尚書贈揚州刺史曾祖豁以明哲
佐世後燕中山尹太常卿濟南貞公祖溫道協諸端
燕太子瞻瞻同事父睦仁結義徒績著寧邊拜建威
將軍汝陰太守縣榮千載聯光百世自非積德累仁
慶屆無窮其孰能傳輝踵美致如此之遠哉可謂身
沒而名不朽者也公稟三靈之淑氣應五百之恒期

乘和載誕。文明冠世。篤信樂道。據德依仁。孝弟端雅。寡言愍行。六藉孔精。百氏備究。八素九丘。靡不昭達。至乎人倫禮式。陰陽律曆。尤所留心。然高真沈默。恥爲傾側之行。不與俗和。絕於趣向之情。常慕晏平仲。東里子產之爲人。自以爲博物不如也。蒞斯文於衡泌。延德聲乎州閭。和平中。舉秀才。荅策高第。擢補中書博士。弥以方正自居。雖才望稱官。而乃歷載不遷。任清務簡。遂乘閑述作。注諸經論。撰話林數弓。弓同卷莫不元契聖理。超異恒儒。又作孔顏謠。靈巖頌。及諸賦詠詔策。辭清雅博。皆行於世也。以才望見陟。遷中書侍郎。又假員外散騎常侍。陽武子。南使宋國。宋主

客郎孔道均就邸設會。酒行樂作。均謂公曰。樂其何如。公荅曰。哀楚有餘。而雅正不足。其細已甚矣。而能久于乎均。嘿然而罷。移年而蕭氏滅宋。雖延陵之觀昔詩。鄭公之聽宋樂。其若神明矣。朝廷以公使協皇華。原隰斯光。遷給事中。中書令。總司文史。敷奏惟允。國之律令。是所議定。公長子懿。邕。容。和。令。器。望。兼資。早綜銓衡。能聲微著。敦詩悅禮。尤精易理。季子道昭。博學明雋。才冠祕穎。研圖注篆。超侍紫幄。公行於前。吏部祕書隨其後。凡厥庶寮。莫不欽其人。也。於時有識比之三陳。後年不盈紀懿。給事黃門侍郎。太常卿。使持節督齊州諸軍事。平東將軍。齊州刺史。道昭。

秘書丞、中書侍郎、司徒諮議、通直散騎常侍、國子祭酒、秘書監、司州大中正、使持節督光州諸軍事、平東將軍、光州刺史、父官子寵、才德相承、海內敬其榮也。先時假公太常卿、熒陽侯詣長安拜燕宣王廟、還解太常、其給事中、中書令、侯如故。縱縱同容鳳闈、動斯可則、冠婚喪祭之禮、書疏報問之式、比之制矣。民肯行矣。雖位未槐鼎、而仁重有餘。太和初、除使持節、安東將軍、督兗州諸軍事、兗州刺史、南陽公。德政寬明、化先仁惠、不嚴之治、穆如清風、旃桑有敬讓之高。朝市無鞭撻之刑、即道之美、不專於魯矣。太和中、徵秘書監、春秋六十有七、寢疾薨於位。凡百君子、莫不悲。

國秀之永沈哀道宗之長沒皇上振悼痛百常往遣使贈襚策贈有加謚曰文祭以太牢以太和十七年四月廿四日歸葬乎熒陽石門東南十三里三皇山之陽於是故吏主簿東郡程天賜等六十人仰道墳之緬邈悲鴻休之未刊乃相與欽述景行銘之元石以揚非世之美而作頌曰

爰鑒往紀稽覽前徽有賢有聖靡弗應時繇實契姒旦亦協姬於穆鄭公誕叡應期伊昔桓武並美司徒恭惟我君世監祕書三墳剋闡五典允敷文爲辭首學實宗儒德秀時哲望高世族灼灼獨明亭亭孤邈式胄三雍鄒風再燭作岳河兗澤移草木慶靈長發

繼葉傳光君既挺發(允)亦含章文義襲軌朱紱相望
刊石銘德與日永揚

永平四年歲在辛卯刊上碑在直南卅里天柱山之
陽此下碑也以石好故於此刊之

魏代揚州長史南梁郡太守宜陽子司馬景和
妻墓誌銘

夫人姓孟字敬訓清河人也蓋中散大夫之幼女陳
郡府君之季妹夫人資含章之淑氣廩稟字懷叡之竒
風芬芳特出英華秀生婉問河洲鼓鐘千里年十有
七而作嬪於司馬氏自笄辨髮從人檢無違度四德
孔循婦宜純備字備奉舅姑以恭孝興名接娣姒以謙

慈作稱。恒寬心靜質舉成物軌。謹言慎行。動爲人範。

斯所謂三宗厲矩。九族字族承規者矣。又夫人性窈字窈

妒媿。多於容納。敦桃夭之宜上。薦小星之逮下。故能

慶顯字顯蠡斯。五男三女。出入閨闈。諷誦崇禮。義方之

誨。旣形幽閑之教。亦著然盡力事上。夫人之懃。夫婦

有別。夫人之識。捨惡從善。夫人之志。內宗加密。夫人

之恤。姻於外親。夫人之仁。夫人有五器。而加之以躬

檢節用。豈悟天道無知。與善徒言。享年不永。凶眚橫

集。春秋卅有二。以延昌二年夏六月甲申朔廿日癸

卯。邁疾奄忽。薨於壽春。嗚呼哀哉。粵三年正月庚戌

朔十二日辛酉。歸葬於鄉墳河內溫縣溫城之西。寔

以營原興壟窳野成丘。故式述清高而爲頌云。
穆二夫人乘和誕生。蘭蓀蕙糝玉潤金聲。令問在室。
徽音事庭。方孚洪烈。範古流名。如何不淑。早世徂傾。
思聞後葉。刊石題誠。

魏崔敬邕墓誌銘

祖秀才諱殊字敬異。

夫人從事中郎趙國李休女。

父雙護中書侍郎冠軍將軍豫州刺史安平敬侯。

夫人中書趙國李詵女。

魏故持節龍驤將軍督營州諸軍事營州刺史征虜
將軍大中大夫臨青男崔公之墓誌銘。

君諱敬邕博陵安平人也。夫其殖姓之始，蓋炎帝之
①允。其在隆周，遠祖尚父，實作太師，秉旄鷹揚，尅佐撫
殷。若乃遠源之富，奕世之美，故以備之前冊，不待詳
錄。君即豫州刺史安平敬侯之子，胄積仁之基，累榮
構之峻，特稟清貞，少播令譽，然諾之信，著於童孺。瑤
音玉震，聞於弱冠。年廿八而隲華茂實，以響流於京
夏矣。被旨起家，召爲司徒府主簿，納贊槐衡，能和鼎
味。俄而轉尚書都官郎中。時高祖孝文皇帝將改制
創物，大崇革正，復以君兼吏部郎，詮敘彝倫，九流斯
順。太和廿二年春，宣武皇帝副光崇正，妙簡宮衛，復
以君爲東朝步兵。景明初，丁母憂還家，居喪致毀，幾

於滅性服終朝廷以君膽量凝果善謀好成臨事發
竒前畧無滯徵君拜爲左中郎將大都督中山王刺
史出圍僞義陽城拔凱旋君有協規之効功績隆盛
授龍驤將軍太府少卿臨青男忠勤之稱實顯於茲
永平初聖主以遼海戎夷宣化佇賢肅慎契丹必也
綏接於是除君持節營州刺史將軍如故君軒鑣始
邁聲猷以先麾蓋踐壇而溫膏均被於是殊俗知仁
荒嶠識澤惠液達於逋遐德潤潭於邊服延昌四年
以君清政懷柔宣風自遠徵君爲征虜將軍太中大
夫方授美任而君嬰疾連歲遂以熙平二年十一月
廿一日卒於位縉紳痛惜姻舊咸酸依君績行蒙贈

左將軍濟州刺史。加謚曰貞。禮也。孤息伯茂銜哀在疚。摧號因訴。泣庭訓之崩。沈淚松楊。之以樹洞。抽絕其何言。刊遺德於泉路。其辭曰。

縣哉遐胄。帝炎之緒。爰歷姬初。祖惟尚父。曰周曰漢。榮光繼武。邁德傳輝。儒賢代舉。於穆叡考。誕質含靈。秉仁岳峻。動智淵明。育善以和。獎幹以貞。響發邽丘。翼起槐庭。慶鍾盛世。皇澤遠融。入叅彝敘。出佐邊戎。謀成轅幕。績著軍功。僞城颺偃。蠹境懷風。王恩流賞。作捍東荒。惠沾海服。愛洽遼鄉。天情方渥。蘭爵惟良。如何倉昊。國寶淪光。白楊晦以籠雲。松區杳而煙邃。藐孤叫其崩窓。親賓颺而垂淚。仰層穹而摧號。痛尊

靈之長祕。誌遺德兮何陳。篆幽石兮深隧。嗚呼哀哉。

王漁洋居易錄云陳崇石爲安平令掘田壠閒得祖父名爵列碑題之前

魏故驩驤將軍營州刺史高使君懿侯碑銘

君諱貞字羽真勃海脩人也其先蓋帝炎氏之苗稟昔在黃唐是爲四嶽爰逮伯夷受命於虞舜曰典朕爲太師俾侯齊國世世勿絕表乎東海其公族有高子者即其氏焉自茲已降冠冕繼及世濟其德不實其名祖左光祿大夫勃海敬公純嘏所鍾式誕文昭皇太后是爲世宗武皇帝之外祖考安東將軍青州刺史莊公有行有禮克荷克構即文昭皇太后之

弟二兄也。君稟岐嶷之姿，挺珪璋之質，清暈

暉發於

載卡

字辨

秀悟表乎齟齬，黃中通理之名。卓爾不羣之

目，固已殊異公族。見稱於匠者，至於孝以事親，則白
華不能比其潔，友于兄弟，則常棣無以方其盛。敬讓
著自閭閻，信義行於邦黨。若夫秉心塞淵，砥礪名教，
伏膺文武，不肅而成，則綴軌於前脩，同頽輓於先達
者矣。雖綺襦紈袴，英華於王許，龍馬流車，陸離於陰
鄧，而不以富貴驕人，必以謙虛業已。是故夷門識慕，
蹇步知歸。我德如風，物應如響。弱冠以外戚，令望除
祕書郎，僚麟閣而來儀，瞻石渠而式踐。於是縱容校
文之職，翻飛鷁鷺之閒。容止此而可觀，清風茲焉已。

穆既而重離載朗東朝始建杞梓備陳瑤金必剖僉
求其可帝曰尔諧遷太子洗馬夙夜惟夤媚茲儲后
仰敷四德之美式揚三善之功同禁聰坊亡有出其
右也於時六宮無主百姓未繫周爰大邦因踰莘似
以君姊有神表淑問拜爲皇后君戚愈重■愈沖寵
日益權日損由是有少君退讓之風無長淵驕奢之
患故赫赫之望具瞻允集楨幹之期匪朝伊暮而不
幸短命春秋廿有六以延昌三年歲次甲午四月己
卯朔廿六日乙巳遘疾卒於京師二宮悲慟九族悼
傷同位駿奔遐迹必至天子廼詔有司曰故太子洗
馬高貞器業始茂方加榮級而秀穎未實奄彫夏彩

今宅兆有期，宜蒙追陟，可特贈驩驤將軍、營州刺史，以於戚儻。其墓丘所須，悉仰本州營辦。臨塋，又特給東園龍輜，加謚曰懿。凡我僚舊，爰及邦人，咸以君生而玉質，至美也；幼若老成，至慧也；孝友因心，至行也；富貴不驕，至謙也。君以此終，亦以此始。烏可廢而不錄。使來者無聞焉。廼相與採石名山，樹碑墓道。其詞曰：

厥緒皇皇，
世有龍光。自茲作氏，不實其芳。於鑠光祿，饗茲戩馨。寰赫矣安東，純嘏斯屬。或女或妹，匪娥伊僕。陟彼昭陽，光我邦族。山川降祉，餘慶不已。敬公之孫，莊公之

子如琇如瑩爲山伊始人知其進莫見其止古人有
言膏粱難正於乎我君終和且令牧已謙謙與物無
競孝友因心能久能敬爰始來儀濯纓麟沼翾羽儲
局其容皎皎方搏九霄載飛載矯天道如何是人
是天生榮死哀禮有加數曷用寵終英英旂輅其人雖
往其風可慕元石一刊清徽永鑄

大代正光四年歲次癸卯
管黃鍾六月

碑以嘉慶九年出土星衍
始見之移置德州學宮

魏故懷令李君墓誌銘

君諱超字景昇本字景宗後承始族叔在江左者懸
同故避改云秦州隴西郡狄道縣都鄉華風里人

也。雅著高節，敦襲世風。言行足師，興作成准。循情孝友，因心名義。安貧樂道，息詭遇之襟。介然峻特，標確焉之搽。弱冠舉司州秀才，拜奉朝請。除恒農郡冠軍府錄事參軍事，宰沁水縣。巨政崇治，綽居尤最。爲受罪者所誣，誣章憲臺誤聽，被茲深劾，除名爲民。於是廿年中，浮沈閭巷。玉潔金志，卓爾無悶。到熙平二年，甫更從宦，補荊州前將軍騎兵參軍事。復作懷令，已受拜，垂垂迷職，遭疾。正光五年八月十八日卒于洛陽縣之永年里宅。時年六十一。孤貞華首，訖於二邑。門從無兩，遠迹酸恨。懷之百姓，長慕喪氣。雖陳留之哀望，胡季叡不是過也。越六年正月丙午朔十六日。

辛酉。案此謂正光六年也。其六月始改元。孝昌則正

目錄。劉義叟長。歷此年。梁正丙午朔。魏同決。無可疑

而偃師金石遺文。乃誤以爲在卒後。經年凡六。於是

王氏萃編。遂列爲永安二年。不知彼年長。歷魏正癸

丑朔。與碑所書絕不可通也。又考司馬景和妻墓誌

銘。上書以延昌二年夏六月甲申朔廿日癸卯。下書

粵三年正月庚戌朔十二日辛酉。以其朔求長。歷則

所謂粵三年者。亦謂延昌三年與葬洛陽縣覆舟山

之東南。元壤難窮。陵谷時異。刻茲陰石。照序光塵。

泱泱顯族。斂藹西垂。代襲清則。沓炳羽儀。道妙之門。

緒風屬斯。惟祖惟考。倜儻瓌竒。昌謨迭駕。高矍明規。

杳量无隄。元契不貲。摠循異貫。員應紛枝。灼灼伊君。

山立淵渟。棲真宅正。寢繩履程。懿鑠爲質。醇素用情。

均治禮世。氣重財輕。亦旣從招。旁溢鴻聲。隨燄出入。

密勿力誠爰莅近邑先邁儀形絕交獨坐化動陰冥
尚德貽咎衆實叵蓋拂枉歸來飭轅褊帶恂恂鄉閭
万殊一會優柔善成无小无大垂白再仕汎尔沿流
階倫稍降盛業愈邁遂作後城士女承休轡頓方
馳盡土悲愁尅節炯言引賞靡徵端恭妄砥家俗虛
膺擢彼圯跡事罕篇繒長源未輸深啻乍卷溘此逸
機空生徒返茲窳易削疇毒難遣楨掬踈竦泉隸房
寒遠孀孤內爛妹弟摧咷式鏤沈石託注幽篆
妻恒農楊氏父談爲郟州主簿息女孟宜年卅六適
恒農王始隳郡中正息女媛姿適遼西常彪侍御史
息女仲妃適武威賈子謐涼州治中息道冲息女婉

華息女休顏息女四輝息道逸年十六息道栖年十三。

魏故假節督齊州諸軍事輔國將軍齊州刺史

高公墓誌銘

君諱湛字子澄勃海滌滌人。也靈根遠秀啓慶兆於渭川芳德遐流宣大風於東海作範百王垂聲萬古者矣故清公勢重鄭伯捐師元卿位尊管仲辭禮皆所以讓哲推賢遠明風軌祖冀州刺史勃海公文照昭武烈望擲中夏惠沾朝野愛結周行考侍中尚書令司徒公英風秀逸雋氣雲馳剴顧帝鄉威流宇縣君稟慶緒於綿基挹餘瀾於海澳幼尚端凝長好文

雅非道弗親唯德是與逍遙儒素之間慕申穆之遺
風俳徊文史之際追牧當作馬之逸藻至於擧春灑

翰席

席字或釋作帶非

月抽琴邁昔哲以孤遊超時流而獨

遠熙平啓運起家爲司空叅軍事轉揚烈將軍羽林
監天平之始襄城阻命君文武兩兼忠義奮發還城
斬將蠻左同歸朝廷嘉其能縉紳服其義假驩驤將
軍行襄城郡事君著績旣崇賞勞未允尋除使持節
都督南荊州諸軍事鎮軍將軍南荊州刺史於時僞
賊陳慶率裒攻圍孤城獨守載離寒暑終能剋保
邊隍全怙民境復除大都督行廣州事享年不永春
秋卅三元象元季正月廿四日終於家皇上動哀能

言灑淚。廼有詔曰：故持節都督南荊州諸軍事假鎮

軍將軍揚烈將軍員外羽林監行南荊州諸軍事南

荊州刺史當州大都督高子

金石萃編云此碑完善其損者僅詔語中

高子澄之識用開敏氣幹英發擁攝蕃翰誠効剋宣

臨難殉軀奄從非命言命遺績有悼于懷宜申追寵

式光往烈可贈假節督齊州諸軍事輔國將軍齊州

刺史粵元象二年十月十七日遷葬於故鄉司徒公

之塋千秋易往萬古難留故鐫石泉門以彰永久其

詞曰

丹蚪降祉姜水載清大人應期命世挺生垂竿起譽

罷釣流聲經綸宇宙莫之與京允司下蕃公衡上宰

既顯營丘，復擲東海。四履流芳，五城降綵。繁柯茂葉，
傳華無改。伊宗作輔，忠義是依。清盪昏霧，橫掃塵飛。
日月再朗，六合更暈。暉玉帛斯集，福祿攸歸。仁壽
無遠，積善空施。風酸夏草，霜結春池。崑山墜玉，桂樹
摧枝。悲哉永慕，痛矣離長。當作長離山左金石志云離長倒書碑未改正

大齊鄉老舉孝義雋脩羅之碑

唯皇肇祚，大齊受命。引軒轅之高宗，紀唐虞之遐統。
應孝義以改物，揚人風以布則。於是緝熙前緒，照顯
上世。雋敬字脩羅，鑽土葺安。食菜勃海，前漢帝臣。雋
不疑公之遺孫，九世祖朗。遷官於魯，遂住洙源。幼傾
乾蔭，唯母偏居。易色承顏，董生未必過其行。守信志

忠投杼豈能着其心。捨田立寺。願在菩提。醜味養僧。纓絡匪怪。銘救濟飢寒。傾囊等意。少行忠孝。長在仁倫。可欽可美。莫復是過。蓋聞詮賢舉德。古今通尚。慝秀弊才。雖囊自現。余等鄉老。壹百餘人。目覩其事。豈容嘿焉。敬刊石立樓。以彰孝義。非但樹名。今世亦勸後生。義夫節婦。詔令所行。其辭曰。

恭恭易色。免受承顏。孝同曾閔。行比丁蘭。待如握髮。接若吐瀆。醜味救飢。解褐濟寒。披幽釋古。奉敬如來。割已施造。傾力捨財。終終彼之念。其性可哀。鑿石壹朝。千代美哉。流芳萬古。迹絕當今。庶勸將來。誰不肅心。忠孝之外。任世浮沈。絕筆刊功。志畢松林。朱陽再

現相訖南金訪石鏤文永保余心懸宗殞轉放筆留音。

皇建元年歲次庚辰十二月戊寅朔廿日丁酉訖功。

碑以乾隆乙卯年九月得于泗水縣東五十里韓家澗天明寺側。

朱岱林墓誌

北齊朱敬脩

君諱岱林字君山樂陵濕沃人也自辛朝喪歷昌戶銜書親以建社賢亦啓國扶封於邾公加茅土方曹析壤媿魯稱雄別有由謚立姓因字爲氏斯即去邑從朱蓋是殊方共致卯金則司空佐命當塗即領軍贊業整在晉嗣美表於趙垂名所謂杞梓繼生公侯閒起哲人世挺衣冠代襲曾祖霸儒該上素術盡從

橫魏使持節平州諸軍事安遠將軍平州刺史俗隣
壇場布以威恩醕酒空陳夜金不受於後謗言及樂
讒巧亂鄒儵介鷹揚翻然鵲起擁鄉里三千餘戶來
逝河南值元嘉之末朝多喪亂不獲其賞仍居青州
之樂陵郡祖法宏下帷耽藝閒靜自得舉秀才釋褐
南平王府行叅軍遷尚書祠部郎中禮閣有聲含香
擅美後遷司徒府諮議叅軍事亡贈鴻臚卿父孝祖
清規勝範地美才高俄而魏高祖孝文皇帝熊羆覓
騁蒼兕爭先化洽江湘令行天下錄竒異於巖藪訪
隱逸於閭閻起家除槃陽縣令轉北海太守流涕孟
侯歌謠稚子從今勤古並駕分駟君膺茲秀氣稟是

淳和三

案山左金石志誤

棘六里方珠比玉左智右

賢擬龍齊鳳得嗟蔡子見重侯相聿始十餘身離艱

苦晨號夕踴柴毀骨立遂使鳩來栖集馬憫芻草精

通飛走擦貫幽明魏廣陵王愛善如蒼好書比德俾

侯南服妙選英佐託以金蘭徵爲國常侍辭不獲已

俛僂從職而侯羸荷盼難交公子介推逃賞終遠晉

文未踰十旬還以病解後彭城王又以皇枝之貴作

牧東秦召爲主簿久而從命王藉甚有素不苦抑遣

終遂干木之心乃申安道之志君雅量之地無際可

尋元昆季弟推之京宦同於得喪等槩榮枯含章韜

綵藏明晦用兄元旭散騎常侍出除南兗州刺史弟

叔業通直散騎常侍左光祿大夫高冠映日長戟陵
風譽滿京華聲馳寓縣縱趙孝之讓禮食曾何足云
魯恭之就平名詎堪方此魏廷慰卿崔光韶侍中賈
思伯並聰敏當世器局樹時結四子七賢之交飲醪
投水之密留連宴燾付寫衿期黃門郎徐紇與君意
得言忘處權居要恒思不次之舉還疑志不可奪醮
言之暇聊申微旨君荅云昔人有以術忤帝或道質
■王譬之鱗羽本垂飛伏而平生庸短未希簪紱如
斯之貺乞不加己紇愛人以禮兼相欽尚從其所好
不敢繫維普泰之季水德不競蒼雲蓋野紫日生天
烏合蟻徒聚三齊之地豎牙鳴角凜十二之險不異

井中虛言聖出，何殊轍■妄号神人，拔本塞源，摧蘭
天桂，春秋五十有四，遐迹悲噎，聞見涕零，惟君大度
不羣，峻■孤上，託宿假道，唯仁與義，規矩成則，物我
兼忘，非夷非惠，不石不玉，惻隱同於子魚，友悌侔於
伯雅，何忽儋案山左金石志缺此字今依拓本補山石折，智士遽傾，以
大齊武平二年歲次辛卯二月乙卯朔六日甲申，莖
於百尺里東五里第四子敬脩，自惟羅此荼毒，眇然
咳幼，離竒以生，龍鍾而立，窮而匡子，溫慙閔騫，岵山
難陟，過庭無訓，攜鋤而感，言下集冠之禽，攀松弗昭，
寧降成墳之鳥，空追士季，瞻像載興，傷慟日殫，觀狀
益增酸哽，磬茲鄙拙，式序徽猷，思與泣俱，文兼涕落。

先言多不備述。往行盡是闕如。良由才非作者。情隈
蕪次。從父兄敬範。史君伯第三子。脫畧榮華。不應徵
聘。沉深好古。尤工摛屬。勒銘黃壤。以播清風。辭曰
本自高門。世資陰德。從來位重。人兼才識。運海鱗竒。
搏搖翅力。繁枝不已。清瀾焉息。其唯祖英毅。唯父深
沈。飛纓鳴玉。作範垂音。仍生東箭。遂挺南金。素榮俱
美。出處分心。其有應純和。■望餘耀。嵇風阮德。梁遊
大釣。揔于君子。藝才何劭。闕里儒英。瀨鄉元妙。其道
王天崖。志輕人爵。菊藁危坐。■裘採藥。楚漢兒戲。仁
雄寥廓。我如曾閔。何論許郭。其虛言輔善。實驗無親。
石隹。既落。儋山亦淪。少微之應。遂屬高人。悲王難序。

痛霍何陳，其仁厚慶鍾育斯才彥。歷階武目，過庭鯉
盼似鳳方鳴。如龍比絢，遺孤在笈。藜焉誰見，其誰見
伊何慈顏弗覩。朝不食隣人罷祖，比學西河。擬文
東魯，述彪者固情深陟岵。其魚山本志門豹遺風，丹
青已寫。元窆方崇，思人下淚。瞻蓋悲空，山川不易。規
猷詎終，其嗟嗟猶子。瞻儀在昔，荷恩惟訓。依希如覿，
頌雅因詩。宏文託易，追思素道。敬鐫元石。

北周王通墓誌銘

公諱通，其先太原人也。粵乃仙嶽，含靈毓禎。圖而錫
爵，誓淮分淑。應寶錄以開宗，是以三公列而更榮。五
侯封而載錫，自茲厥後，英髦不墜。祖明濟郡中喉舌，

識度冲敏。志業詳確。父增。隨州主簿。鑒履清致。器量
貞邃。公養志中和。資靈上德。趨庭學禮。立身之道。自
宏。步月開襟。讓客之風。已遠。中爲令德。遊藝依仁。賞
逸閒居。不希榮祿。旣而門巢結疊。百年之運。已催。楹
夢起祥。九泉之路。俄涉。春秋六十有三。溝疾終於私
第。嫡子脩文。脩禮。衰經露節。痛結寒泉。粵以大周天
和二年冬十月。窆於東城縣東五十里崇德鄉平原
禮也。東漸巨壑。波濤滉漾。西望層山。烟霞出沒。頌德
音而不朽。感生靈之倏忽。其詞曰。

惟鎬建官。惟唐命職。允文允武。克岐克嶷。開國承家。
禮儀不忒。皇天無親。誕生哲人。摠衣問道。好古日新。

如何不淑。奄喪斯文。前臨叢薄。後眺荒丘。風搏素蓋。日慘丹旒。庶銘明德。永播芳猷。康熙九年秋河間縣東城鎮大水有古墓衝圯得此碑

大隋車騎祕書郎張君之銘

君諱景畧。燕州上谷人。漢司徒華之後也。帝皇布護。將相蟬聯。備諸圖史。其可伊述。祖驃騎大將軍第一。領民酋長文城公。又遷燕州諸軍事。燕州刺史。考龍驤將軍。諫議大夫。奉車都尉。行濟安郡太守。金鄉侯。君質如披錦。文彩煥然。器若珪璋。光輝朗潤。於是弱齡表異。聲振朝野。欲止不能。遂被徵辟。起家爲魏帝內侍左右。尋遷祕書郎。優游鳳沼。去來麟閣。時稱獨

步寔曰無雙。又加車騎大將軍。開皇十一年正月六日。冥不蠲德。奄從運往。春秋六十有八。以其月二十六日。遷窆於相州安陽河北白素曲。未極丞相之年。俄掩將軍之墓。嗚呼哀哉。乃爲銘曰。

昔年慷慨。拖紫垂青。崑山漢水。玉潤珠明。何啻大運。混我賢貞。一辭身世。百代千齡。

玉泉寺智禪師碑

隋皇甫昆

蓋聞乾元資始。三辰著象於天。坤道資生。萬物動行於地。皇王於是建國。賢聖所以垂文。起名教而莫同。制威儀而有別。至於畫卦觀爻。蓋取隨時之象。綜經織緯。通爲政之辭。大禮同和。大樂同節。安上治民。

移風易俗。斯乃生前之事。畧矣。可言。死後之問。仲尼弗語。縱使絳雪縈空。元霜拂樹。餌金丹而九轉。吞玉髓而千年。乘雲也。駕五色之元龍。遊漢焉。控三山之素鵠。逍遙瑤臺之上。容與珠闕之間。未窺解脫之門。終趣蓋纏之境。唯正覺淵沖。真如妙有。不生不滅。無相無言。隨緣應質。則成形成類。隨類觀音。則因聲亦說。故有白銀千尺之金丈六之身。八部般若之文。四種悉檀之義。神通自在。慧力無窮。因導化行。開示悟入。皈依者盡發菩提。迴向焉。普登常樂。是以獼猴建塔。遂生忉利之天。野鴈銜華。復性彌陀之國。豈直日藏沙門。孤遊正道。月光童子。獨見如來。四生因

茲度脫六道，藉此超蘇。實火宅之高車，昏河之大筏。若乃周室昭王之世，影奪恒星。漢朝明帝之時，光夢如日。使旋西域，化漸東都。真像南宮，申心北面。自摩騰入洛，羅什遊秦。名教更宏，道風斯熾。經臺像閣，寶塢香山。麗溢巖阿，綺盈都邑。豈期後魏真君之歲，後周建德之年。靈廟一除，伽藍再滅。形容廢毀，文字散遺。響落瓊鐘，聲沈寶鐸。修禪耆舊，卷其舌而不談。護戒先賢，改其形而晦影。世絕調心之路，時虧汲引之途。無出世之津梁，失生民之大望。我隋皇帝，乘乾御宇。握鏡披圖，友愛蒼生。君臨赤子，天地同其大德。日月合其重光，鼓之以雷霆。運之以風雨，除暴亂，致太

平張四維朝萬國功成作樂治定制禮正道無爲區
寰有截闢泥洹之路開般若之門宣十二分之經流
四千年之法精勤耆舊捨俗歸僧淨住初童持心秉
戒非直法輪再轉法鼓還鳴四海於是無虞兆民因
而有賴委羽乘毛之國慕風化以來庭靈禽嘉貺之
祥應圖書而萃苑巍巍也非境智之思量蕩蕩乎豈
言談而能盡玉泉寺者基此山焉智顛禪師之卜居
也敕旨正名著額其山鬼萼差莪崎嶇崩疑峯疑偃
蓋巒似覆船巨石窮竒之象洪崖譎詭之形岡曲抱
而成垣水縈洄而結乳■ ■ ■ ■ ■ 鸚啼碧樹之
閒日月爲之蔽虧霄液由之散聚前瞻江路卻望荆

岑左帶昭丘。右通巴峽。禪師本姓陳氏。潁川人也。少稟生知。童真剃落。從師南嶽。蘊道天臺。睿智洪才之響。非直播於江南。知機妙辨之聲。固已聞於河朔。皇帝■子太尉公晉王。性稟孝慈。情包惻隱。能臣能子。匡國匡家。蘊神機之智。垂汎愛之心。布君子之心。偃生民之草。往以偽陳納版。受律行師。策妙指縱。威稜江海。遂剋定金陵。化平銅柱。三吳霧卷。百粵塵清。師乃因王利涉。王遂因師受戒。師至此而投院。王奏聞而起寺。於是異域才情之客。慕其道而雲臻。他鄉鍊行之僧。味其風而雨集。師精研道理。盡意談元語。證禪支心。開定本。幽宗博義。若挹海而無窮。辨句清辭。

似懸河而自瀉。居朋之友。雖盈量以爭飯。處少之徒。從窮崖而莫反。爾乃信心檀越。積善通人。咸施一材。俱投一瓦。憑茲衆力。事若神功。營之不日而成。飾以經時而就。層臺迴閣。複殿連房。寒暑異形。陰陽殊制。雕簷繡栱。與危岫而爭高。鑿礎鐫基。共盤巖而等固。風光出其戶牖。雲霧生其棟梁。華炫耀於金盤。氣芬芳於玉樹。工圖相好。湛若金僊。匠寫真容。凝如滿月。殿起三層之柱。簾懸自響之鐘。堂開千葉之華。蓮捧飛來之座。燈光不滅。灌海逾明。刹柱俱低。承幡自舉。吉祥柔滑之草。爛熳依庭。送風和氣之香。氤氳滿院。斜通洞穴。直柱凝泉。色似琉璃。味同甘露。波投鼎鼎。

浪瀉陞堂。飲腹消疴。洗軀愈疾。石柱銅梁之狀。影如
蓮池。桃源菊浦之華。香浮柰苑。可謂山類耆閣。寺同
離越。似龍宮而出見。疑鹿野以飛來。竊以前王鑿鼎。
惟論體國之功。今共刊碑。永記菩提之道。余任宰屬
城。寺居所部。文雖寫意。書不盡言。其詞曰。

二儀開廓。四氣氤氳。方以類聚。物以羣分。通賢通聖。
明后明君。隨機設教。觀化垂文。樂章既造。禮儀方制。
定此親疏。決茲疑滯。披圖辨物。屬辭明例。唯化一生。
不論三世。元都玉簡。紫闕銀經。解尸遺骨。飲液吞精。
乘龍萬紀。控鶴千齡。終非實相。猶是塵情。唯有大雄。
湛然常住。不生不滅。無來無去。千門妙旨。一音演諭。

度脫衆生。涅槃雙樹。夢通劉后。感應姬王。恒星掩耀。
滿月澄光。寫形東國。指聖西方。慈悲願海。善逝津梁。
法顯還晉。摩騰入洛。花散經臺。香流像閣。釋教鬱起。
桑門盛作。露泣珠幡。風吟寶鐸。真君建德。運鍾滅道。
淪沒四生。毀除三寶。我皇啓聖。德侔蒼昊。妙法更宏。
眞儀再造。陳氏僭號。王赫斯征。勾吳霧捲。閩越廓清。
因逢智者。延謁山庭。珠生浮漢。玉出荆華。峯嶂屹
石洞淵懸。芬芳菊浦。滴瀝瓊泉。盤渦似谷。覆嶺疑船。
來儀晏坐。觸地蕭然。妙辨悉檀。深窮般若。緇素雲會。
挹其河瀉。或施之材。或投之瓦。經始不日。翻成大廈。
更起龍宮。還閣鹿野。山連紫蓋。江抱黃牛。西臨月峽。

東接昭丘春牕夏牖水殿山樓旃檀圍繞琳碧還周
塵吐芙蓉龕懸石鏡白毫相好紺髮輝映銀鷺徘徊
錦鱗游泳騰猴心靜怖鷄影定猗歟哲王命也蕃屏
自天生德孝誠俱秉旦奭非儔閒平詎并出總連轡
入調鐘鼎構此伽藍實資力請魔殿巉嵯須彌鬱律
倏覩劫終俄看燒訖豈如彼岸生死皆出金石不朽
天地可畢鐫勒巖阿永垂懋實

續古文苑卷第十六

續古文苑卷第十七

賜進士及第授通奉大夫山東通省督糧道加三級孫星衍撰
碑志三

大唐左屯衛將軍姜行本勒石紀功碑

昔凶奴不滅竇將軍勒燕山之功閩越未清馬伏波
樹銅柱之迹然則振英風於絕域申壯節於異方莫
不騰茂實於千秋播芳猷於萬古者乎大唐德合二
儀道高五帝握金鏡以朝萬國調玉燭以馭兆民濟
濟衣冠煌煌禮樂車書順軌扶桑之表俱同仁化所
占濛汜之鄉咸暨苑天山而池瀾海內北戶以靜幽
都莫不解辮髮於藁街改左衽於夷俗高昌國者乃

是兩漢屯田之壁遺兵之所居。麴文泰即其苗裔也。往因晉室多難，羣雄竟馳中原之主，邊隅遂隔，閒屆戎狄，竊號稱王。歷至今，靡聲教。自皇威遠被，稽顙來庭，雖沐仁風，情懷首鼠。杜遠方之職貢，阻重譯之往來，肆豺狼之心，起蜂蠆之。黎庶賊殺無已。聖上愍彼蒼生，申茲弔伐，乃詔使持節光祿大夫、吏部尚書、上柱國、陳國公侯君集，交河道行軍大總管、副總管左屯衛大將軍、上柱國、永安郡開國公薛萬均，副總管左屯衛將軍、上柱國、通川縣開國男姜行本等，爰整三軍，龔行天罰。但妖氛未殄，將軍逞七縱之威，百雉作固，英竒申九攻之畧。以通川公深謀

閒出妙思縱橫命■前軍營造攻具乃統沙州刺史
上柱國望都縣開國侯劉德敏右監門中郎將上柱
國淮安縣開國公衡智錫右屯衛中郎將上柱國富
陽縣開國伯屈昉左武侯郎將李海岸前開州刺史
時德衡右監門府長王進威等並率梟雄鼓行而進
以貞觀十四年五月十日師次伊吾時羅漫山北登
黑紺所未盈旬月克成竒功伐木則山林殫盡叱咤
則川谷蕩薄衝梯蹙■百■冰釋機檜一發千石雲
飛墨翟之拒無施公輸之妙詎比大總管運籌幃幄
繼以中軍鐵騎亘原野金鼓動天地高旗蔽日長戟
彗雲自秦漢出師未有如斯之盛也班定遠之通西

域故迹罕存。鄭都護之滅車師。空聞前史。雄圖世著。彼獨何人。乃勒石紀功。傳諸不朽。其詞曰。

於赫大唐。受天明命。化齊得一。功無與競。荒服猶阻。

夷居不定。乃拜將軍。殄茲梟鏡。其一六竒。思羣雄逞。

力陣開龍騰。營。麗星光。旗明日色。揚旌塞

表。振威西極。其二峨峨峻嶺。眇眇平原。塞雲暝結。胡風

晝昏。高樹。銘功讚德。

貞觀十四年歲次庚子六月丁卯朔廿五日辛卯立。

瓜州司法參軍河內司馬。

碧落觀碑

唐李訓

有唐五十三祀。龍集敦牂。哀子李訓。誼讓謀銜。恤在

疾寘懷靡所永言復鄭釋德思樹良因敬立大道天

尊及速侍真像粵若稽古藐覲遂初真宰貞乎得

一混成表於沖用元之又元蹟超言象之域惟恍惟

惚理冥視聽之端是以峒山順風勞乎靡索汾陽馭

御辯窅然自喪曠矣哉道之韞也其寄於寥廓之

場焉至於玉笈宣徽琅函吐祕方壺神闕蒙穀靈遊

倏忽九陔導飛廉而從敦圉俯仰六合戴列星而乘

雲氣固亦昭章逸軌肸嚮孤風淳化其瞭幽契無爽

伏以先妃含貞載德克懋瓊潛研堂儀延慶台華

正位藩閫動容資於典禮發言光乎箴訓故紘緼是

肅粲盛無違大當叶曜中閨以睦况倚閭分甘之澤

徙居側昝之規義越人倫恩深振古重以凝神道域

抗志澄源淮館儀僊操嶺釋鴻寶之靈術楚壇敷教

暢微言之盛範儒元兼洞真俗兩該德冠母儀事高

嬪則豈圖昊天不惠積善無徵咎罰奄鍾荼蓼俄集

訓等痛纏過隙感切風枝泣血攀號自祈嶺釋眞殞

祇奉嚴訓慈鄭釋勉備隆偷存視息遄移氣序几筵

寂寞瞻望長違創巨徒深寄哀何地所以貪及鄭釋

餘漏祈福元宗敬寫眞容庶幾終古而土木非可久

之致鎔鑄爲誨盜之先肅奉沖規圖輝貞質粹容俶

鄭釋穆元儀有煒金眞摛耀疑金闕之易奔琳華揚

彩若琳房之可覲霓裳交映嶺釋駕其留帝晨飾

翠雲之宅

鄭釋美

香童散朱陵之馥載彫爰駮式展

祈以此勝因上資神理伏願栖真碧落飛步黃庭謁

羣帝於天關攜列仙於雲路融心懸解宅美希夷但

鄭釋注

儀鄰以同

鄭釋洞

魚指乾坤而齊極介茲多祉藩

度惟隆如山作固永播熊章之祿

鄭釋烈

循陔自酌莫

申烏鳥之志孔明在鑒匪曰道遐昌言

潛研堂跋

尾釋作叫

闡庶其

鄭釋斯

無拔昔人銜哀罔極鉛槧騰聲柔疑

鄭釋紛克劭義切張憑之誅至德興思痛深陸機之賦况

清輝懋範宛若前蹤瞻言景行敢忘刊紀餘魂弱喘

情不逮文謹託真猷直書心事音儀日遠風烈空傳

敬鄭釋心感慕終天何及

此碑有咸通十一年鄭承

規釋文復為訂正數字

唐宋州司法田君墓誌銘

君諱宏敏其先北平人也自虞承帝錄派媯汭之神
宗陳恒制齊遂開國而爲姓若乃錫土隆家之美贊
玉帛於緇圖陳規獻策之謀著英猷於寶牒祖由玉
山齊暎瓊萼流芳器纍珪璋質懷杞梓韞劉龍之英
美躍管驥之高衢彩匣韜輝金章絕韻詞林振穎筆
海浮瀾秀氣烟高靈規聳見貞風槩俗勁節澄襟被
揚歷而見徵應翹車而入聘隨章武郡功曹父恭藍
田孕質驪穴騰輝志岸沖清器該博物雄材雋狀巨
孔匄以逾高雅度汪深湛黃陂而彌浚名馳刈楚德
洽重筵隨高陽縣尉君英靈迴秀壯志遐

■ ■ 韞雄

圖蘭風特振。貞明絕俗。雅道淹通。藻駕雕龍。聲充振
鷺。清辭雄辨。陵鄜子之卿。脣逸氣高談。鄙蘇張之緩
頰。洞該物務。統六隧於周邦。備曉公方。館四人於鄉
邑。既而奠楹。溝孽夢豎。延凶寢疾。彌留俄傾。薤露以
永。淳元年九月十二日。歿於私第。春秋六十有四。豈
謂胤谿掩耀。悲隙影之無留。積玉沉輝。泣清川之永
謝。以■■元年正月二十二日。遷窆於任丘縣西南
五里本鄉禮也。其地東連博陵。西叩金堤。膏腴控其
前。平林亘其後。嗣子務仙。嗣孫神傑。神冲。承族等。攬
蓼莪之巨痛。陟霧岵而長號。扳罔極之哀荒。抱霜荼
而永泣。恐以炎飛岱嶺。庶梓域之長存。岸谷遠遷。冀

松區之尚在其詞曰。

承芳軒胃分裳陳成建邦啓土代襲英聲降生明哲
雋又馳名高軌運流景命乃傾誅生前之茂績刻嘉
號於泉局。

大唐懷州河內縣木澗魏夫人祠碑銘并序

唐路敬淳

蓋聞元圃青宮仙客於焉來往丹丘紫府羽人之所
棲集微祕錄於淮王時逢八老採神奇於魏帝取覲
雙童子喬控翮翱翔赤霄之上琴高擾鱗游泳淶波
之下斯並心符寂蔑神契窈窕匪塵俗之能羈簪纓
之所屈者矣茲有鮫容雅質貞規淑態韞真氣於閨

房挺仙才於閩闕嫦娥採藥奔月朏以含精靈媛投壺暄電光而吐耀漢皋游女持珠對南國之賓洛浦神妃鳴玉俟東藩之后莫不名芬紫翠道標黃白列真非一往往致焉魏夫人者即是晉劇陽侯任城魏陽元之女也本傳曰夫人年二十四適南劉幼彥幼彥爲修武令善爲德政仁風惠著時夫人隨在修武之館焉雖魏同舍縣內常齋于別寢季冬之月夜半聞空中有鍾鼓笳簫之聲羽旂光耀降夫人之靜室輦輦被服非人所聞見有四真人告夫人曰大帝勅我來教子以神真之道注子於玉札應爲紫虛元君上真司命名山之號封南岳夫人後爲洛陽山成真

人因爲立祠。土俗號阿夫神。原夫鎬京。䟽社公高克。勤於小物。參墟命族。畢萬連休於大名。丞相之匡。翌漢庭。比蹤蕭邴。司空之弼。諧晉室。方譽裴山。積德攸鍾。餘慶斯在。況復彤雲授彩。衍豐谷之靈苗。白水開源。導春陵之茂族。乘龍合好。鳴鳳于飛。結大義於絲蘿。諧佳音於琴瑟。劉氏絃歌作吏。同墨臨人。惟彼外持。爰資內輔。服勤纂組。良毗製錦之工。肅事蘋蘩。且佐烹鮮之術。猶以爲六法四行。豈離夢幻之場。九轉三仙。方出塵勞之境。朱庭翠閣。事甚樊籠。元鬢紅顏。理同泡沫。於是撥煩䟽躡。練志凝魂。潔成道室之階。列竟師門之宇。悠悠永夕。紫煙昇而庭院虛。凜凜窮

陰元霜冽而池館靜。乃有仙鍾簇韻。如發漢鯨。法鼓揚音。似棲吳鶴。簫聲寥亮。仍符弄玉之臺。笳奏淒清。有異文姬之殿。綠輶朱節。真衛相趨。霞佩雲裾。仙儀在列。昔安公之治。叶冥契於昇龍。木羽之鄉。應祥期於御馬。眷茲元感異代同符。故能迴驚三清。高超八會。持法印而含元氣。合真符而昇太極。金記五千。職隸九元之史。玉言十萬。名彰八素之書。足使上元夫人。憇其嘉号。元妙玉女。媿其芳聲。豈與夫障日至山。薦枕席而通窹。順風江澳。懷環珮而申贈。復有躍魚酬惠。愛鳥遺灾。清溪白岸之姑。阮氏絃生之儷。若斯而已矣。夫以王母既集。西漢列其霄筵。帝子斯臻。北

渚歌其夕漲。是用恢勝宇。創祠壇。想希夷。其若存。庶
恍忽其無昧。建立之始。年代莫詳。爾其周晉名區。覃
懷奧壤。蘇子攢茅之域。寇君剖竹之郊。孟津南注。控
河流於馬頰。太行北指。啓山路於羊腸。川原相屬。風
煙交會。鬱彼仙觀。揭焉中立。綵之以丹青。陳之以藻
繪。效靈妃之啓齒。圖殷女之練色。行亭三襲。俯瞰川
湄。茅攔四注。却連山阜。巨石崔嵬。像蓮峯而特秀。奔
泉節洒。瀉松澗以飛湍。微靄觸而流津。清飈激而成
韻。瓊桃仙棗。散綠垂紅。珠寶金條。含緗佩紫。八林芳
桂。凌冬霰以揚葩。五株仙杏。負春晞而布葉。莫不夾
戶蘿生。垂簷接蔭。可以返魂駐寄。忘憂愈疾。至若吉

日良辰。高人勝士。黃紵紫綬。忘貴賤而同歸。白屋朱門。混榮枯而畢萃。敬而不黷。誠稟訓於懷柔。感而遂通。諒虔心於正直。於是採蔬東海。折菓西山。傾玉酒而泛流霞。酌金漿而挹甘露。神交妙有。想白鳳之來儀。道契虛無。佇黃雀之爲使。丹梯可躡。必超上漢之

■練馭斯■
■越無生之浪。誠洞真之苑囿。靈寶之區域者焉。秋官尚書。檢校懷州刺史。南陽鄧府君。道光天爵。慶發地靈。躡泰階而高視。寔攬天而騁力。題劍昇朝。秉形之寄。攸重佩金增秩。仰福之任。逾隆長史隴西李知人。司馬南陽鄧措。河內縣令鉅鹿耿仁惠。或展驥亨衢。化康邦國。或割鷄遊刃。功茂邑民。思

靜力於迴天獸勞生於寂地識明元扎跡寄道樞半
判毗藩則晨趨飛其鶴嶺一同作宰則元會降其鳧
鳥每慮陽軼再旬具虔馨於斯谷陰衢潔朔薦行潦
於茲鬻縣令仁惠稟氣孝恭祭則神饗天然感物祈
必靈歆所請甘霖未迴車而降澤但求膏液迎舉意
以零滋彌媿神之厚恩故勒銘而旌德而碧落清窗
顯在百城之次椒庭桂門近臨千室之中瞻石梁而
靡闕仰瑤臺而何遠夫降仙成宅西岳紀桓譚之賦
尋真起詠南溪聞郭璞之詩是以輕率下民仰追前
列寄諸貞珎題其頌云。

畢筮初占係復其始甯門有相甥膺廟美珠胎孕寶

玉仙昭社。寔唯靈媛。作嬪君子。取譬鸞鳳。言邊魴鯉。
早明八素。夙悟三元。呪神爭術。浪蓬募仙。紫書題記。
白簡開編。暫遊芝圃。倏見華田。輕飛起月。高訓垂煙。
戒遵靈壇。載規神宇。却倚巖壁。前臨澗浦。偃蹇雲棟。
清泠風戶。怪石竒木。鳴蟲嘯羽。居茲地聖。坐同天柱。
瀆妃去魏。弄女辭秦。陽臺之下。暮雨稱神。洛川之側。
朝霞韞真。窈窕高蹈。寥廓上賓。思道業用。述微塵。
大唐垂拱四年正月五日建。宏文館學士路敬淳製。
勝果院僧從謙書。

大唐故朝議郎行澤王府主簿上柱國梁府君
并夫人唐氏墓誌銘并序 唐梁朱賓

君諱寺。字師暎。雍州藍田人也。丕承帝緒。自雍墟而
逮夏陽。克勤王家。由安定而宅京兆。其如葛氏昆季。
列於三方。有類林家昭穆。光乎十德。至若衣冠禮樂
之盛烈。廉孝賢良之儀表。固以烏弈當代。昭彰季葉
者乎。曾祖遵。周秦州清水縣令。遽賒相用。勞逸兼資。
重泉之磬。載昌單父之琴。斯洽祖殊。隋監門錄事參
軍。德以潤身。學以從政。八屯由其式序。五校於是克
隆。父柱。皇朝奉義郎。騎都尉。識量夷雅。風神耿介。青
田表秀。丹穴摛祥。進而不榮。安乎散列。退而不野。鄰
乎湫隘。君承積善之餘祉。挺生人之上姿。因心而好
孔墨。抗跡而齊曾閔。縱王佐之奇表。揚于王庭。屈公

輔之宏量薄遊公府咸亨四年授文林郎班例也日
者東風爽候西旅不庭三軍乏坐甲之資七萃興懸
磬之歎君散陶凝慮指困推誠躬親餽餼之勞式周
儲峙之務恕己及物下布人謠憂國忘家上紆帝念
永隆二年恩詔授上柱國道光西漢已極武功之尊
名冠南荆竟保昭陽之貴既而上僊興慕下代纏哀
梁山降白鶴之祥畢陌啓青烏之兆君悲深考逝義
切子來茂績顯於園塋豐功徹乎旒宸垂拱元年授
朝議郎行澤王府主簿以枚馬之英規偶閒平之上
邳英風扇乎蘭坂茂躅隆乎桂山東閣由是希聲西
園以之藉甚豈期攝生謬理與善失常西山何高未

接仙童之羽。南溟尚遠。翻墜化鵬之翼。以垂拱四年十月五日。終於長安懷德里第。春秋卅有一。夫人晉昌唐氏。名惠兒。後魏驍騎將軍本郡守契之七葉孫。即故司農寺長樂監敏之第二女也。巫山降祉。巽位。攜精挺琬。琬以成姿。懷冰霰以清慮。纂組織紉之務。早擅女工。幽閑婉孌之規。夙彰婦德。恭謙娣姒。宗族所以推先。肅事舅姑。閨門由其作訓。將以鷓驂並鷺。常接影於仙樓。不意龍劍雙沉。竟連形於寶匣。以垂拱四年九月廿七日。終於長壽里第。春秋卅有六。粵以其年十一月十七日。合葬于終南山楸梓谷口。隋信行禪師林側。倍大父錄事參軍之舊塋。由夙志也。

惟君器周大雅。德備中和。敏殫衆藝。好兼靈迹。牟子博之異錄。動息會其情。虞孝敬之竒記。俯仰該其術。黃金積釜。鎮寫真容。白玉成田。併開精舍。夫人亦凝心貝葉。屬思曇花。幼彰龍女之功。長契勝鬘之德。婉茲嘉偶。咸借慶於一乘。倬彼好仇。並歸神於八正。其子景先等。以爲形資業起。業立則形存。化以緣生。緣亡則化息。履霜增感。豈若奉於遺音。聞雷警慕。固可說於真侶。式崇寶構。虔考勝因。寄篆刻於幽埏。庶飛芳於奪里。其詞曰。

霸秦支子。始國于梁。帝堯景胄。必復其唐。易代載德。繼軌傳芳。雅符秦晉。信叶潘楊。其於惟君子。夙承家

慶顯允夫人早標門令。笙簧其德。黼藻其性。問望備
隆。容工兼盛。其二身由業立。果乃因成。共資有相。並證
無生。八正凝想。七覺馳情。德踰善德。名蓋淨名。其積
善方融。輔仁無准。始驚炭折。俄看薪盡。悲哉則豹騎
連翔。痛矣則螭軒接軌。門庭兮簫索。墟落兮淒緊。其
哀哀鞠子。感感遺孤。共詳勝地。式奉先墓。構曾臺於
翠阜。刻貞石於黃壚。山山兮■塔。往往兮真徒。其五

四品孫義陽朱賓撰文五品孫滎陽鄭莊書

大唐故右虞候副率檢校左領軍衛將軍上柱

國乙速孤府君碑銘并序 唐苗神客

天地之大德曰生。聖人之大寶曰位。生不可以無宰。

俟有道以存之位。不可以無寄。俟有德以尊之。故荆極剖天。張維闢寓。大君有作。俯而乘雲。多士聿興。仰登山而捧日。可久可大。闡洪業於非常。立德立功。垂大名於不朽。存而爲一時之傑。歿而爲百代之英。爰有異人。今可得而聞矣。公諱神慶。字昭祐。其先王氏。太原人也。昔房以天戈耀象。六英聞鳳舞之祥。后弃以星袂興農。萬里厝鸞歌之域。帝圖克峻。王道攸歸。周德方隆。翦商以光其業。齊功可遂。敗狄而有其勲。官族著乎天下。統緒傾乎海內。五代祖顯。後魏拜驃騎大將軍。偉德挺生。稟嵩岱之精魄。洪川派別。洩江海之波瀾。倚拔千仞。盤紆九野。遂賜姓爲乙

速孤氏始爲京兆醴泉人焉。有命承家，代功居寵。然後以周畿委輅，奉春異鍾鼎之門。漢殿乘軒，田秋匪珪璋之操。言其榮閥，故無得而傳之。曾祖貴，齊右衛大將軍儀同三司使持節都督岐州諸軍事，岐州刺史。周上開府儀同三司，肯附大夫，隨河州諸軍事，河州刺史，河州摠管。太子右庶子和仁，郡開國公。祖安，齊前鋒都督。周右武侯右六府驃騎將軍，開府儀同三司使持節，葺州諸軍事，葺州刺史。隨益州都督，襲封和仁，郡開國公。拜前拜後，惟昭惟穆，咸以忠貞之操，並資文武之才。終始一心，雖百君而每合。出入三代，居八命而逾隆。父晟，皇朝上開府右武侯右廿府

左車騎將軍轉驃騎將軍。令緒逾崇。高門克大。岳靈
鳳德。紹賢哲以相趨。河目龜文。識公侯而繼出。公山
資海授星。傑雷英跨俗。騰彩驚時。駭矚雖仲。連飛兔
追日。電以長鳴。而諸葛臥龍。候風雲而戢景。俄屬寵
鼉架海。援鶴凌江。黃神吟而寓縣分。素靈歎而區域
震。高祖神堯皇帝。開天躡步。翼日騰精。偃橫流於九
海。蕩洪氛於八極。雲雷憤薄。興於晉水之湄。天地氤
蘊。闢於渭川之涘。于時邑居幅裂。豪俊棊分。鵲起逢
時之心。寰中旣擾。烏止于誰之室。寓內攸瞻。公乃蓄
悟井之深。幾載驅驪鼻。知躍泉之秘蹟。言訪龍田。獄
訟歸禹。不忘於寤寐。歌舞迎周。獨斷於襟抱。以義寧

之始。乃奉見於涇陽。初蒙恩命。預叅秦府。從平京邑。授通議大夫。賜物六十段。戎章克峻。雖策勲而旣重。國圖伊始。以門胄而方榮。乃取祖萇州府君之資。任右親衛。于時雖地開金策。翦鷄甸而斯安。而池阻玉華。亂雞津而未靜。公於是奉陪八校。薄伐三川。從討王充。破青城堡。賜物一百段。并袍衫牛等。加勲大將軍。武德元年。又征薛舉。二年。復破武周。神兵四舉。每推亡於後服。英圖百勝。必賈勇於先登。時宋金剛尚憑地險。更勞天伐。公乃因機有捷。燭雲火之高輝。應變無方。刊風灰之遠陣。平寇之後。蒙賜馬及金鞵絲物百段。王充以巨猾窺豐。假位號於成周。建德以大

盜因時竊仁義於全趙恃連雞之援以阻危邦託刑馬之盟方爲與國大宗乃韜龍豹旅貔貅黃鉞排天朱旗斷霧沸洛川而憤角震嵩巖而疊鼓王充以迭食爲命不移蚤駟之心建德以弱甲相依無舛螳螂之衛公乃懷竒請奮受命長駟破王充千金堡并從擒建德預軒勝於元苻奉堯績於丹浦燕趙俄獲蚌爲脯而無遺虞虢終亡馬服輿而不失加勲柱國賜物二百段劉黑闥擁銅馬之餘孽氣蘊圖南阻金鳳之長川兵雄趙北公乃從平清漳洛水二因遂俘之授上柱國賜并口馬等綵物一百五十段粵以超時之効恒當不次之恩滿寵受田殊非異賞

李忠錫馬遂多慙色尋又從破徐員朗復著奇勲既而聖情載洽念功勞■特蒙賜■用表深榮太宗以元雲入戶未改唐侯之爵白水開錢猶踐蕭王之號秦王府妙資左右公以良家首辟■令長上仍賜大袍既而飛鷲侵■長虹竭井雖域中四大正西北之傾維而天下一家有東南之反氣太宗乃殄茲方命殲厥流言推大義以龔行宏至公而克翦公以九年六月四日載靜紆回因而侍衛十旬不出既而汾陽脫屣代邳承祧高鳥盡而藏弓歸獸存而去戰公乃方從挾策且欣橐矢結墳籍而爲畧驅禮義以爲禽然以七德攸歸五營斯佇方始執鞭之任式隆初簣

之基以貞觀五年授右衛勳衛
七年賜絹一百疋八年授右勳衛校尉公以懷
才樂道緯武經文學而時習顛沛必於函丈功成不
居終始存乎退尺每策勲而命賞常後己而先人所
以幽谷非遷望喬木而韜響澠池徒奮坐大樹而銷
聲雖薄遊之志每深而厚祿之期終及十年蒙授游
擊將軍守左領軍長春府
別將仍於永豐倉留守
佳兵七萃左帶皇畿教庾千箱傍臨陝服正壘壁其
斯重瞻海陵其已陋聿兼其任隆寄存焉十二年以
璇極西傾玉鸞東警皇輿帝早肅龍駕於風雲天動
神行揚鳳旗於日月董司戎禁載佇忠賢車駕自東

都還京。乃勅公檢校右衛勳上府郎將。十七年。以震
宮養德。乾心侔。乃。詔曰。公官。志懷強濟。計畧
沈遠。勞効著於戎旅。恪勤宣於階闈。宜加榮擢。周衛
儲闡。可守太子右衛率府勳衛郎將。於是青闈振景。
絳地增暉。招搖之桂。連芳共。蒼琅之竹。比節同。
十九年。馬邑僂職。無踰於驟山之義。龍顏憑怒。有事
於遼水之陽。驚雷輜於碣石。洗天兵於海島。時高宗
天皇大帝。銅樓毓粹。玉裕流溫。雖義在懸弓。宜扈於
擒縱。而時方主鬯。實資於監撫。乃。州留守。命公
等。奉儲闡。廿年。丁驃騎府君憂。去職。還輟趨巷。偏
悲陟岵。絕漿九日。已摧唐頌之心。茹痛三年。每泣高

柴之血。廿三年。詔授太子右衛率府翊衛郎將。犀鈎
在飾鶴。登榮。抑禮。援琴。仍奉樂風之韻。踰暮。改燧。
更承重日之輝。既而龍躍在天。正銀題於紫極。鴻飛
漸陸。振玉羽於元霄。高宗即位之後。授右衛中郎將。
永徽三年。除守右驍衛翊衛中郎將。張奐坐帷。奮雄
邊之遠畧。馬卿建節。馳喻蜀之高文。才宦雙美。括囊
千載。五年。詔守太子右虞候副率。尋加兼太子右虞
候副率。徐邈授經之彥。師表攸存。卞敦良將之才。閑
邪是屬。公之授也。斯實兼焉。俄屬六麟。徐駕御西京
之霧雨。五牛遐拂。俯東洛之風煙。鈎陳既委。英賢是
賴。駕幸東都之日。檢校左領軍衛將軍。尋又駕幸。

衛將軍仍知六閑馬事。溫驪籥景歎。於雪谷瑞
生風銜珠耀於井。職無不理。帝有嘉焉。俄又兼
太子右衛率。惟秩寔茲。以建功
茂仲以主門興績。瞻言故實。英尚斯途。公以儔之。則
爲優矣。方冀有仁必壽。有壽必隆。而位未極於鈞璜。
問望周之浦。齒不延於練玉。遽頽觀魯之峯。以顯
慶五年八月廿四日。遘疾。於之
第。春秋六十有二。冕旒興悼。哀榮兼極。勅書垂慰。
贈贈逾隆。詔問嗣子行儼等。并賜物二百段。粵以龍
朔元年歲次癸亥二月戊午朔十九日。巽時。潛研堂金石跋

尾云癸亥乃龍朔三年非元年也又以通鑑目錄考
之龍朔元年二月丙寅朔三年二月乙酉朔俱非戊
午朔碑版之文所紀年月宜得其真而抵牾悟如
此殊不可解然此碑決非後人所能僞作也永曆
於雍州醴泉縣履中川以從先王禮也惟公降象辰
緯誕靈川岳德光寶璧舒白氣以成虹才苞利器橫
紫氛而射斗昔在髫髻初即踰常類嶷然殊狀如旭日
之吐青山湛乎深識若明月之含碧海克岐日就至
性天成教以義方則行之靡失趨而有訓則奉以無
違承顏必當於隱犯知年每形於喜懼不愆于德瞻
梓無以措其微未嘗有過折捶無以申其罰泊乎歷
丁艱疚殆不勝喪在驃騎府君之憂公時已班隆貴
屢將毀滅痛深朝野于時乃有巢鷦乳于倚廬觀聽

嗟■古今攸絕。豈止許攸永慕。栖鶻翟於虛檐。丁密窮哀■翔鳧於■沼。若斯而已矣。加以友于成性。愛爲懷共。駕無睽。屢拯鍾輿之■。同衾有慰。每追姜室之歡。兄弟數人。公爲其長。居上斯睦。撫下以仁。韡韡增映。怡怡可樂。其後五門將闢。三荆遽慘。公乃責深自箠。悲共氣而無終。訓切在原。泣分形而有異。雖同胞竟阻。王脩之喻罕遵。而推產不干。卜式之資未給。公以鼎貴餘業。財踰巨萬。一無所取。咸以讓焉。遐邇嗟伏。宗姻駭歎。公以幼承教義。早聞詩禮。德思潤己。學尚專門。俄屬有隨。蕩覆生人。殄喪鄙書。劍而事干戈。弃俎豆。而脩軍旅。故得藝殫。弧矢精極。韜鈴戟

枝揚葉窮取睽之妙。金匱玉堂盡殫戎之術。所以革車每次。大憇斯殲。慮靡遺策。兵無挫銳。非以賞而邀利。寧以功而自伐。然則因時命律。積稔論兵。受而莫違。當厚惠而居百夫之長。推而不有。委榮名而辭万户之侯。卓矣高蹤。魯連豈唯於蹈海。安乎卑位。曷蒞遂勞於執戟。大雅君子。斯之謂焉。子國子明。經高第朝。請大夫行。綿州司馬行儼。寧遠將軍守岐陽府長上折衝行均。游擊將軍守甘泉府左果毅都尉行方等。或傳經綜業。或良弓嗣美。誠在孝而斯勇。寔致果而爲雄。仁者安仁。心無昧於觀行。將門有將。理不差於必復。旣而匪莪嬰酷。悴柏纏哀。攀蠹索而增慕。循

鑿楹而載感。於是乃與昆季聚族興言。以爲陵谷難恃。風猷易絕。雲臺入畫。莫究遺芳。天祿藏書。方成蠹簡。欲垂不刊之跡。必存無媿之詞。於是爰勒他山。用旌斯烈。無使波空渤澥。識墮涸淚。於千齡。麓徙琅琊。傳受辛於萬古。其詞曰。

立功立德。惟武惟文。銘戈著範。勒鼎昭勲。名懸日月。氣凜風雲。誰其克紹。卓矣夫君。緒派伊笙。望隆淮筮。肇錫宦族。卽榮昌。袞袞有輝。旗章靡替。明明斯謀。高門是繼。英英亮狀。灼灼瑰竒。不憊于道。無忒其儀。光含巨闕。彩振長離。公山比驥。呂望非麗。運屬時屯。道衆人傑。鵬圖鳳舉。雲迴風烈。濟水秦亡。登山趙滅。

功成百勝途夷九折已建宏勳俄膺懋寵期門甫陟
羽林初奉帝庾斯衛儲兵載擁寓省才高司階位重
官連四率望越五營聲芳漢將氣表周楨未登台室
遽掩佳城哀纏國寶痛結人英樹慄王哀松凋許泣
九泉長送百身何及鶴兆方兼烏墳永戢山秋月思
野寒風急傳鈎令緒待漏英才蘭期奄隔楸思俄開
圖芳隧路紀德泉臺九原徽烈千古風埃 大唐

二年歲次庚寅二月戊申朔十九日景寅立朝

散大夫守著作郎文館學士兼修國史上柱國濟

南縣開國男苗神客撰淨普寺釋行滿書

此碑下截
缺字餘亦
漫漶舊醴泉志已云存二千五百餘字今據舊拓
本書之十得八九勝于王氏萃編所載為多矣

大周無上孝明高皇后碑銘并序 唐武三思

愚臣聞二儀合德中黃承太紫之庭兩曜齊明玉兔儷

金烏之象是以九霄高映○躔躔垂婺女之精十野傍

羅媯水叶娥皇之德亦有西陵美族■軒帝之宮

南土嘉媒入娉夏王之幄其後大任端一即創文基

大姒勤勞還開武運故知皇三事業咸資坤字肅職之

功帝五風謠必藉陰靈之化無上孝明高皇后宏農

仙掌生字也出自有周蓋唐叔虞之後原夫赤鳥

流火丹雀銜書初開夢梓之祥旋茂翦桐之業自

唐郊徙邑晉野裁封即胙土而有家啓禎符而得姓

周則志爲大將承九代之餘資秦則款爲上卿居七

城之重任。豈直十生丹轂。金莩烏弈於都畿。四代白
環。五緒蟬聯於海縣。子雲博識吐鳳。摛詞伯起高材。
銜鱣襲祉。誕壘。韉不墜。降靈相屬。神基與紫嶽爭高。
仙派共黃河俱遠。所以山隆鐘鼎。壘。鞞積衣冠。五公
則異代相傳。八子則殊。率。字。閒出。詳諸。因。史。可畧
而言。曾祖諱定。後魏都督。歷新興太原二郡太守。并
州刺史。晉昌穆侯。宏材卓犖。峻局深沈。丹山有象。②字曰
之彩。綠荃見遺風之步。褰帷按俗。風行馭竹之郊。露
冕臨生。化偃焚林之阜。豈直鄧攸。罷郡深歎。雞鳴。劉寵
辭官。方憂犬吠。祖諱紹。後魏征西將軍。金紫光祿大
夫。兼通直散騎常侍。驃騎大將軍。周開府儀同三司。

封儻城郡公。鄜豳燕三州刺史。贈使持節大將軍。成文扶鄧洮五州諸軍事。成州刺史。謚曰信。聲飛漸陸。響逸鳴臯。器重南金。材橫東箭。謀深八陣。勇冠三軍。既隆投石之勲。果踐銜珠之秩。加以金龜結紐。銅虎分符。轉扇揚風。停車待雨。童兒結要。無欺一②之期。親友論刑。自得二①而。狻之詠。父鄭恭王諱達。周內史中大夫。隨開府儀同三司。黃門內史。吏部刑部二侍郎。尚書左右丞。趙鄴二州刺史。工部吏部二尚書。上言營東都。大監將作大匠。武衛將軍。左光祿大夫。遂寧恭公。贈吏部尚書。唐贈尚書左僕射。垂拱二。年。封鄭王。食邑一萬戶。依舊謚曰恭。即雍州牧司徒觀。

德王之季弟也。量包江海，氣逸煙霄。文則呂氏春秋，武則孫吳兵法。箕裘代襲，鏘鏘萬石之君。禮樂其身，翼翼千金之子。鸞迴玉札，鴈落瑠弓。激水張鱗，遙浮渤澥。搏風理翰，直上扶搖。累踐崇階，頻昇顯秩。靽鞞北闕，位揔貔貅。曳履南宮，聲高鸛鷺。貂冠入侍，氣應連珠。隼旆分班，榮參執玉。加以累仁鍾趾，積德延祥。四履開封，寵及九泉之路。千乘禮恩覃萬古之前。棠棣相輝，鶴鴒交映。劉家兩驥，譽滿寰中。荀氏八龍，名高海內。通門向術，冠蓋成陰。甲第當衢，歌鐘就列。伏惟無上孝明高皇后，資靈匝朔，魄毓粹。○聖宮承茂祉於瑤筐，降仙儀於金屋。聲馳卅歲，潛流夢②之祥。

譽表筭華。暗積捫而之。貺蘭襟散馥。蕙問楊翹懿。則
重於邦家。柔儀冠於今昔。忠圖孝範。授翠竹而凌霜。
媛德嬪容。引青松而冒雪。禮枝合秀。藻七誠於情田。
行葉分芳。籠九師於性府。微猷內湛。韶姿外發。懸明
鏡於積水之間。振清飆於長松之上。貞規漢遠。亮節
秋高。翠縷紅纁。從來未重。龍梭鳳杼。本自多輕。簡素
鄙鞏繡之工。靜默尚韋編之道。明詩習禮。豈唯秋菊
之銘。閱史披圖。寧止春椒之頌。學標而縱。開道德之
清關。業契生知。入文章之妙境。曾於方寸。具寫千言。
揔遊霧於毫端。窮偃波於筆杪。芝英雲氣。入魏帳而
分輝。龍爪魚形。映張池而散彩。嘗題一簡。密記貞心。

置以緘滕藏之屋壁。云當使惡無聞於九族。善有布於四方。指此立身期之必遂。後因修宅。匠者得之。恭王見而歎曰。此隆家之女矣。昔者書堂欲壞。唯聞絲竹之音。劔匣將開。空覩蛟龍之氣。未有仁心暗徹。睿德冥通。橫宇宙而無違。滿乾坤而自應。若乃行該莖義。孝極而經。親枕席而忘疲。候晨昏而靡倦。及乎風枝不靜。露蓼含■。哀履厚塋而無追。仰曾穹而莫報。思欲托三乘之妙果。憑五演之元宗。永奉嚴親。長栖雅志。昔隨季喪亂。海內沸騰。伏鱉垂而風塵暗起。羣龍戰野。旗鼓潛張。白騎於是爭馳。青犢由之競擾。蚩尤則餐沙食石。項羽則索鐵申鉤。赤眉探盆子之

籌黃巾聚而師之米。夫三才合契。唯神膺大寶之名。六位乘時。惟聖運洪鑪之德。唐高祖神堯皇帝。材雄鵠起。業峻龍飛。用丹扆而寧生。將朱旗而撥亂。而綱既紐。竟收龍鳳之圖。崆角咸清。遂翦豺狼之毒。無上孝明高皇帝。觀時有作。應運而生。先知赤伏之言。預識黃○之兆。功深坐樹。績茂披荆。負伊鼎而陳謀。入張幃而建策。龍鈐獨運。當赤堊之三千。獸節長駢。偶皇而之百六。息崑山之巨燎。並藉中權。定滄海之橫流。咸資上畧。志同魚水。契若鹽梅。如魏武之得荀攸。似漢光之逢鄧禹。雖英圖盛烈。昭鶴鼎於高門。而闔則嬪風闕。魚軒於中饋。高祖神堯皇帝。位膺元首。任

切股肱利涉大川。寄隆舟楫。式崇勲舊。爲結潘楊。酬
功草昧之時。賞效雲雷之②。高后以孝誠純至。雅操
虛沖。拒縹禮於移而誓。閑襟於醴米。六塵不染。孤標
水上之花。四諦方披。獨晤○中之匪。泊乎鳳凰開繇。
猶堅匪席之心。烏鶴成橋。果迫如綸之命。於是使桂
陽公主爲婚主。禮娉所須。並令官給。旣而三○叶兆
百兩邀歡。與松蘿而比茂。諧琴瑟而流響。風閨少女
襲蘭蕙而馳芬。匪幌仙娥。韻珩璜而動步。光生綺殿
比桃李而增鮮。影發春樓。視雲霞而掩色。八絃欽其
雅躅。四海挹其鴻徽。猶羽翼之宗鸞。鳳風雲之隨龍
虎者矣。廟見斯畢。即拜應。因夫生。從班例也。于時帝

圖肇建王業。夙基三戶。亡秦覺風塵之始定。四門闢
舜。識雷雨之將調。而無關^①之袂。塋息崩山之禍。主
上方勤庶政。屬想羣黎。將貽共理之憂。式廣求賢之
務。無上孝明高皇帝。以勲兼竹帛。義重金蘭。備歷文
武。昭昇內外。三踐八元之位。四臨九百之途。中臺飛署
劍之榮。南服揔班條之任。高后以業光圖。大道叶墳
簞。欲啓仁明。寔具儉助。是以量如江海。令未發而風
移。化穆荆衡。澤將流而生悅。呼鷹臺下。尚隔去思。抵
鵲巖前。始歌來晚。俄而高祖晏駕。瞻脫屣而無留。太
祖崩號。奉遺弓而積慕。沈綿遽軫。終無就^②之期。痼
疾遄淹。忽切乘^③之釁。高后哀深杞塚。誓切柏舟。悲

一劍之先沈。怨雙桐之半死。昔時寶鏡。愴對孤鸞。舊
②瑤琴悲聞。獨鶴銜冤。茹痛撫總帳。而增號。弔影傷
魂。踐孀閨。而凝慕。方祈淨業。敬托良緣。憑慧炬於幽
途。艤慈舟於覺海。於是心持寶偈。手寫金言。字落貫
花。詞分半匝。龍藏豈及。象負難勝。將佛②而長懸。共
慈燈而不滅。及龍旌首次。蠶紉遵途。永惟憑附之誠。
願託上榛之側。方翼駕栖梓樹。近接挺庭。鶴舞松枝。
傍依墜路。特以壘上。率居膝下。愛切掌中。理藉劬勞。
方資顧復。宣和諭善。屢積葭灰。②就匝將頻。移柘火。
至永徽。六率壘上。母儀萬因。正衽位六宮。將開練石
之基。乃遂頽沙之祉。大帝以西京命賞。平原之秩未

宏東漢崇恩新野之封猶褊於是廣流元霈大啓黃扉稽石窳之遺塵裂寶符之氣昂以其季十一匪時拜代因夫生食湯沐邑一千戶品正第一位在王公母妻之上魚軒水鷺颺輕影於龍池翬服霞明下鮮文於鳳掖榮由德被位匪恩昇驟應嘉名徒昭洪澤以顯慶五季十匪轉拜榮因夫生尋改封鄴因夫生自家䟽槐里門荷榭庭累沐殊輝頻膺茂典南鄰夜靜奏鐘磬於高臺北里晨通列笙竽於廣榭門有躡珠之客家豐饌玉之廚恒處逸而思勞每將昇而必降綠墀青瑣特忿王根火布金地深非梁冀謙撝之美萬因仰而知勸端潔之風九圍欽而取則智周寰

宇識洞古今。思所以匡罔庇生。濟時執物。嘉謨讜說。屢發於神襟。厚利豐功。頻彰於帝念。奏便削藁。至莫能知。每以孔光祕言。合爲忠之道。山濤密啓。得事。罔錫之要。可久。可大。置黔首於生成。惟幾惟深。頓蒼元於覆繭。至若緣情體物。屬事比辭。取之以義。方先之以風化。清詞海富。縟藻雲繁。凡所著述。皆成典詞。其動也方。其靜也直。其恩也若春。雨之流津。其威也若秋。霜之應節。接上以禮。逮下以仁。君子感其德。小至歡其惠。而機獨轉。靈臺迴燭。虛鑒與[○]匪齊。明神理共陰陽。比奧洋洋乎。不可得而稱也。旣而離宮霧闢。遙橫塋乳之山。別館[■]開上戴。而眉之宿。甘泉避暑。

方陪萬乘之遊。景福追涼。更扈六龍之駕。不謂災纏
霧露。疢積膏肓。丹屐凝慈。召名醫而接軼。紫霄流渥。
下玕藥而相望。玉釜徒煎。竟乏長生之術。金丹莫就。
終無駐壽之期。咸亨元季。八匪二。崩于九成宮之
山第。春秋九十有二。璽上以身齊霄極。禮闕晨昏。懸
隔九重。望長筵而下泣。心馳五起。瞻厚禱而銜悲。大
帝慮不勝哀。祕茲凶問。苴筵欲對。仍流不次之恩。藁
服將臨。更下非常之澤。仍改封衛。罔夫至。以諭璽上
之憂懸也。后疾將大漸。時落高春。雅志無昏。神情不
撓。影隨燈滅。自此長辭。魂逐香銷。終無暫反。以爲合
葬。非古禮。貴從宜。將追罔極之慈。願在先塋之側。璽

上奉遵遺旨，無忝徽音。割同穴之芳規，就循陔之懿躅。卽以其年庚午閏九匝辛丑朔廿一^②辛酉遷座於雍州咸陽縣之洪瀆原鄭恭王舊塋之左禮也。尔其郊原坱圠，林薄阡眠。秦塋關河，迴接寶雞之野。漢家墳隴，平依金狄之川。松檟森沈，何季鳥住。風煙蕭索，幾代生亡。於是凝恨九陌，廢朝三^②。空山露泣，痛結飛行。曠野雲愁，悲踰草樹。乃下制贈魯園太夫。生諡曰忠烈，仍令司刑太常伯盧承慶攝同文正卿，充監護大使。右肅機皇甫公義等爲副，賜東園祕器。每事官供務從優厚，仍令西臺侍郎道因公戴至德持節弔祭京官文武九品以上，及諸親命婦，並赴宅弔。

哭仍送至渭橋葬事並依王禮給班劍四十生羽葆
鼓吹儀仗送至墓所往還官爲立碑親紆銜禮璽上
因心轉切錫類方宏希申莫大之懷冀展飾終之請
烏墳欲列思增茅土之儀鶴壠將崇願廣山河之誓
遂得五雲飛彩墜仙液於松塋十迴光被增輝于
蒿里乃下制贈太原郡王妃餘並如故所司備禮冊
命大帝親御橫門開軒悲哭紫宸哀慟黃屋淒涼而
塋爲之寢光煙雲由其輟色璽上以幽明永隔岬岵
長辭終無再見之因鎮結千秋之恨奔曦已遠薦霜
莖而無季逝水難追饋冰魚而未又以嚴規早墜
遠卜厝於鄉墳慈蔭重傾近陪親於京壠陵塋眇隔

長懸兩地之悲。關塞遙分。每切百身之痛。遂命大使
備法物。自昊陵迎魂歸於順陵焉。遊冠遠降。墜烏遙
遷。方移沛邑之魂。更啓橋山之域。白雲朝起。乍伴龍
輶。明匝宵懸。時低蜃衛。文明元季。壘上臨朝。其季九
匝。追尊先妃曰魏王妃。食邑一萬戶。實封加滿五千
戶。改咸陽園寢曰順義陵。大名而啓。奧壤○分。古樹
捎雲。近對黑龍之水。荒墳映匝。傍隣丹鳳之城。徽號
旣崇。園陵薰廣。屬以圖書河洛。龜負鳳銜。窓闥方圓。
雲攢霧矯。合宮重屋。旣布政而嚴禋。玉輦金輿。具巡
河而拜洛。永昌元季。追尊先妃曰忠孝太后。旣而謳
歌允集。獄訟知歸。而垂革命之符。求涌受終之錄。元

珪錫禹還逢揖讓之率。黑玉歸商即啓休明之運。九
莖仙草依漢殿而抽芳。五色祥雲繞軒宮而布彩。下
從生望上應天心。乘寶位於通三。建瑤圖於得一。黃
琮蒼璧祀塋郊而復廟重簷。宗文祖武鴻名肇創。光
鳳闡於幽泉。茂禮將加飾鸞圍於長夜而穠投元率。
追尊曰孝明高皇后陵曰順陵。復以祥分貝葉。瑞演
龍花。金容開十塋之圖。玉相告三空之識。龍軒黯黯。
俄爲兜率之而鳳閣岩岩。忽似須彌之座。金輪既轉。
玉鏡方懸。式詮無上之文。肅顯崇親之義。長壽二率。
后位之上。又加無上兩字。尋又下制改順陵曰望鳳
臺。東京故事。西漢遺塵封樹空存。追崇未廣。豈若宸

襟鎮結長懷露序之哀。睿念恒纏永積霜旻之慕。遙
瞻鳳野式建嘉名。遠望鶉郊長懸美稱。且夫功成翼
贊尚畫雲臺。勩擅勳庸猶題麟閣。況兮倪天茂德貫
匪殊禎垂母則於寰區導嬪風於邦國豈可使炎涼
暗積陵谷潛移。唯栽鶴舞之松不刻盤龍之石。豎上
凝懷萬化長想千齡。恐堊軸之西迴。懼而關之北轉。
方圖琬琰式降絲綸。永嗟仙鶴之歌。用固靈龜之上。
微忠攀輝^②樹沐潤。○潢榮忝綠車。職兼青史奉先
追遠恒積慕於丹誠。相質披文忽承恩於紫誥。是用
恭抽弱思敬述洪猷。屑瓦徒勤生金媿妙。揮毫奪魄
陳萬一而寧窮。伏紙驚魂辭再三而不獲。逡巡拜首。

乃作詞云。

邈矣上古。悠哉厥頤。而迴紫府。峯轉黃輿。陰陽蕩薄。

② 匪居諸靈龜。負識寶鳳銜書。其六位既陳。三才乃

立。帝皇鬱起。后妃更襲。蛟雷遙凝。虹○下入。渭涘疏

派。塗山是葺。其明明高后。奕奕輝光。白環代鬱。丹轂

家昌。靈基嶽峻。曾派河長。捫而集祉。裕後開祥。其爰

自生育。早彰尊貴。匪出○流。青龍紫氣。金屋是貯。玉

衣方萃。鷲卵非竒。雞珠寧異。其芝蘭吐葉。桃李開花。

黃雲白氣。夜匪朝霞。賢明自負。仁孝無加。層霄降藥。

祕篋飛沙。其聰晤而資。惠才神與。河漢靈匹。瀟湘帝

女。筆動鸞迴。絃調鶴儻。滌想金莖。莖心寶聚。其仙容

婉婉豔質莪莪。○妃恥出。區媛羞過。椒花入頌。柳絮
縈歌。詞峯秀嶽。學海馳波。其魴鯉成詩。鳳凰開兆。琴
瑟既合。室家斯紹。兩鶴齊飛。雙龍並繞。德行方肅。言
容是昭。其九圍母則六合。嬪風恩流海內。化被區中。
銀環曉。金珮夜。祥開梓闕。位冠椒宮。其習禮明
詩披圖閱。史漢朝馬。鄧周率任。姒陰化聿宣。坤義肅
理。貫匪騰瑞。驚雷送祉。其高春忽墜。上壽俄蹇。金丹
不熟。玉釜徒煎。黃泉九壑。白②三而六。宮恨積萬。因
哀纏。其一寂寞丘壠。淒涼原隰。畢塋難追。終而靡及。
螽露晨清。秋霜降急。伏紙銜悲。揮毫灑泣。怨豔賢之
同盡。感昏明之逾襲。紀豔德於豐碑。奠神猷兮永立。

其十一長安二季歲次壬寅金匱區己巳木朔五②癸酉金建特進太子賓客兼修國史上柱國梁王忠三思奉勅撰太子左奉裕率兼檢校安北大都督相王忠旦奉勅書此碑明末地震而什後遭縣令鑿碎用之二三至王氏萃編所載祇二百十八字予所藏汪太史士鉉手蹟二冊題云唐碑錄存內有這種獨爲完全必出地震前舊搨也亟錄之以補萃編之闕

續古文苑卷第十七

續古文苑卷第十八

賜進士及第授通奉大夫山東通省督糧道加三級孫星衍撰

碑志四

大唐朝散大夫行潤州句容縣令岑君德政碑

唐張景毓

蓋聞諸易曰有天地然後有萬物有萬物然後有君臣有君臣然後有上下然則星辰爲緯上陵山險所以經啓八紘彌綸萬域者也聲明文物禮樂詩書所以黼藻生靈化成邦國者也至於高居萬乘富有四海爲而不宰裁成於孕育之先感而遂通囊括於混元之首雖柔來剛往乾坤之軌躅可尋而步帝馳王

雲火之深塵不昧。則疇咨四岳。允釐百工。大則鶴鼎魚璜。錫寵於機衡之地。小則緇輻墨綬。守位於子男之國。其有相門紬緒。王佐推才。負揭仁義。周旋禮節。排九流而迴出。掩三異而孤昇。緝諧吐吏。綏和風俗。堂上堂下。驅密賤於後塵。星出星入。置馬期於散地。閒而以肅。嚴而不殘。馳心於廊廟之前。■迹于江湖之上者。獨在于岑君乎。君名植。字德茂。南陽棘陽人也。其先出自顓頊氏。后稷之後。周文王母弟輝。剋定殷墟。封爲岑子。今梁國岑亭。即其地也。因以爲姓。代居南陽之棘陽。十三代孫善方。隨梁宣帝西上。因官投迹。寓居於荊州焉。自軒階垂祉。姜汭開宗。神岳構

其崕巘靈根肇其枝葉其在佐帝師王封侯尚主十
卿五公之貴七珥三組之榮衣冠燭耀於區寓允緒
綿聯於載籍亦由秦移趙璧魏得隋珠不常厥地所
在稱寶何止梁亭漢室先開佐命之封吳郡荆門晚
葺因居之地若斯而已哉高祖善方梁驃騎大將軍
周起部尚書開府儀同三司長寧縣開國公食邑一
千二百戶贈侍中謚曰敬當萬機之損益成八座之
儀表銀艾圭茅金鏘玉振榮高當代龍豹之託逾深
寵茂幽局鵷鸞之寄斯重曾祖之爲隋虞部員外侍
郎襲爵長寧公霞騫電邁鳳彩龍光初膺星鳥之榮
晚襲山河之寵祖文本皇朝中書令兼太子賓客宏

文館學士江陵縣開國伯食邑四百戶。贈侍中。謚曰惠。宏材巨量。經文緯武。高標百尋。絕壁千仞。丹青神化。翊亮天工。即隆周之申甫。亦皇軒之風力。若乃百揆務殷。三階事切。西朝機要之所。北閣神仙之地。任摠訃謨。榮高密勿。至於五車萬卷。百家諸子。吐鳳懷蛟。凌雲槩日。不尚浮綺。尤存典裁。藻翰之美。今古絕倫。父景倩。周大中大夫。行麟臺著作郎兼宏文館學士。綰青襟而司禮館。草元經而登書閣。聲榮之重。驛美於當朝。燕翼之寄。傳徽於後烈。君紫泉飛液。丹山耀彩。孤峯懸日月之輝。激溜聚烟雲之氣。虛心倜儻。靈鶴再舉而未窮。逸調從橫。大鵬六月而方息。生而

好學。幼而知禮。孝行無待於傍授。仁心得之於自然。黃憲之類。顏回。汝南爲貴。賀循之擬。龔勝。江東擅名。不學左思。十年爲賦。聊同方朔。三冬讀書。不出戶庭。旣馳心於萬里。將排雲日。亦因基於一匱。弱冠以簪纓貴胄。調補修文生。明經擢第。緇帷連夕。拜之所。紫禁迓朝。聞之地。圖書所會。館宇生光。解褐同州。叅軍事。譽警北曹。聲馳南府。地靈天秩。渾金璞玉之材。主吏叅卿。孫楚蕭何之德。屬軒墜卜。遠禹山斯會。撫遺劔而空存。想遊冠而無及。松蘿漢隧。竹染湘川。雖鏤鼎銘彝。將勒生金之字。而庇徒葺事。終資倚玉之材。課効居多。恩腴俯逮。特授蒲州司戶叅軍事。俄以親

累左授夔州雲安縣丞賈誼長沙屈原湘水溪連五
毒攀鳥路而銜悽峽帶三巴聽猿聲而下淚秩滿丁
府君憂去職三年泣血七日絕漿殆不勝喪幾於滅
性服闋調補衢州司倉叅軍事秦稽負日楚夢含雲
東連射的之山西拒沈珠之浦上農攸屬倉廩爲禮
節之先下位斯安等列處儕流之首尋沐恩旨雪其
親累一遇雲雷之施再生花萼之榮旣席寵而沿恩
亦流根而泊葉君之兄義材望冠時聲名動俗膺奮
飛而首出指寥廓而曾騫位纔陟於聞鶯才實兼於
緣鵠旣而八龍雙驥慈明與劉岱均飛二陸三張仕
衡與孟陽齊價豈直家風祖德見稱於中旨掌紼司

綸復傳於後葉。光輝所燭，朝野增榮。然則宅火均司，象雷分邑。莊周著小鮮之誠，尹何招美錦之嫌。列五等於姬封，高十城於漢秩。字育之道，循良是資。擢授潤州句容縣令。瑤山奧壤，金陵舊地。郊原枕端，委之墟。江漢擁朝宗之水，海潮驚而翔鷺起。山氣合而盤龍見，物產殷積。水陸兼并，人多挺劍之雄。俗有亡珠之弊，君達於時事，明於政理。教不嚴而自肅，化不令而人從。吐黎感惠，愛之如父母。奸邪屏迹，畏之若神明。戶口滋豐，田疇墾闢。行太丘之道德，息灌壇之風雨。國家下武膺運，中興纂業。氛祲廓除，日月開朗。君遇見知之主，逢時來之運。若魚縱壑，如鴻順風。優制

所尊崇班益峻。加朝散大夫上柱國。紫泥流渥。朱紱昇榮。列五采之通班。連九章之賁飾。於是貴而思降。盈而知損。如絲之旨。載流亂繩之化。愈息。先是邑居湫阨。里閭榛蕪。爰自歷政。未遑加緝。君乘三餘之隙。因四人之暇。覽山川之體勢。量資物之豐省。逐便興功。因時改作。人無廢業。役不浹辰。流一切之權道。成累代之宏業。頃緣稼穡頗■。炎亢雲漢之詠。徒勤京坻之望。斯絕君親。加暴露。徧請山川。率吐庶以具馨香。俯壇場而展誠敬。濃雲布族。膏雨成絲。絲八極而俱灑。通四溟而廣徧。自非仁心所及。誠感必通。其孰能預於此乎。加以道尚朋執。情敦讌喜。每至星搖劔

室月下珠潭。菱津迴棹。女之喧桃。逕詠樵童之樂。臨
萬家之井邑。眺千里之風煙。良談閒起。清文不輟。信
可謂兼文兼武。公才公望者焉。聖上深視九重。高居
萬寓。廼矐時政。分命使司。端冕旒而思天下。布德澤
而周海內。博訪英髦。探求異術。十道飛駟。萬域承風。
江東黜陟。使朝散大夫行度支員外郎攝右臺侍御
史源乾曜。崖岸孤聳。風飈秀出。千仞罕節。百尺無枝。
地入星臺。列珠軒而應翟。庭分月樹。搖鐵柱而驚烏。
冰霜凜白。簡之威霞。日聚繡衣之色。遙同李邵。上迴
星爲之暉。俯類張綱。先懾權豪之氣。以君才地。加之
聲實。每肆揄揚。先膺荐舉。王生千里。佇入於匡。佐荀

氏十旬行登於台府。顧眄之重。郡縣增榮。馳表疏於
龍閣。遽翻飛於鶯路。隨郤詵而齊舉。攀鄧攸而不留。
黯黯津亭。搖搖軒騎。壽春遺犢。將折轅而共分。葉縣
歸鳧。逐行舟而俱遠。由是三吳士庶。二江人物。來暮
之歌。方遠去思之戀。益深。期殺君於一年。思段侯之
再撫。丞魏烜。家承軒冕。代傳儒墨。鳴謙自牧。處劇若
閑。以涵牛之巨量。貳割鷄之小道。主簿崔子佺。相門
卿族。玉葉金柯。光彩可以射人。風神可以凜俗。尉李
芬。張隱朝。章佩嘉勛等。並公侯復祉。琳琅積譽。經史
足用。刀筆推工。斲迴東道之姿。多屈南昌之化。鄉望
等。或者年宿望。或盛族名家。負雲澤之懷寶。馳水鄉

之俊逸。山川舊迹。龍蟠武踞之閒。軒冕餘風。東箭南
珍之亞。並殮和浴道。多從食椹之恩。老安少懷。久沐
惟桑之化。雖功成帝力。上皇之耕鑿已勤。而事稟圖
經。下邑之風猷可紀。是用傍遵。縑簡俯緝。謳謠。覈南
襄之故事。採西郭之前躅。飛丹脣瓦。行杼雕金之思。
相質披文。無媿沈碑之浦。其詞曰。

山岳■氣。河汾孕爲。基構百尋。源流千丈。地靈塊軋。
天姿肸蠁。長寧建侯。襟懷洞朗。江陵奕載。風颯峻上。
隕隱鉤深。知來藏往。斲雕爲朴。用晦而明。文緯天地。
武定縱橫。如周稷禹。似漢良平。金社開封。珠盤載盟。
逃矣遐緒。猗歟克生。案碑詞每段六韻。唯此明橫平
盟生僅五韻。必脫去二句也。未

見拓本姑識。乘彼靈慶，光斯燕翼。道映時宗，言爲士
此以俟再補。雲峯迴植，藝蘊縑緗。材經邦國，金玉其
則月鏡虛湛。鶴鳴不已，鴻飛未息。欲麗九成，先階一
行。筠篁其德，軒瑩卜遠。禹山云萃，倚玉推
匱。比迹庠序，聯芳旌旆。孫楚忝卿，蕭何主
才。雕金纂懿，秦關漢輔。吳田穡地，孫楚忝卿。蕭何主
吏。鴻鐘待扣，明鏡不疲。詞端筆杪，月落雲披。時更出
處道，或推移。曾忝盡孝，賈誼傷離。五湖東指，三峽西
窺。六修齊稟，百里均知。帝道光亨，聖人有作。如鵬得
吹，似魚縱壑。越自奮飛，載翔廖廓。珠江控海，金陵負
郭。夏禹經營，農皇甄度。星躔牛斗，雲連蜃閣。令長何
擇，循良在茲。駟駕宓賤，雕鏤馬期。政實無擾，人稱不

欺韋弦是緝水玉攸資神憂河甸獸斷江湄蝗去無
限鸞歸有時八使出關二星向蜀乘驄衣繡揚清激
濁黜陟攸先椎埋是屬上敷帝念下從人欲一聽謳
謠載欣風俗行收顧眄坐成珠玉若管知鮑如蕭待
王君子既見爲龍爲光選衆而舉載掄載揚飛日
路驛薦雲莊眇眇雲澤颯颯水鄉西北萬里東南一
方坐結去思長嗟來暮躑躅翬壤怊悵鷺路何以報
恩宸階遠訴何以旌德高碑迴樹潘岳創詞楊修辨
句一刊懿迹千齡垂裕
景龍二年歲在戊申二
月十五日建朝散大夫行雍州錄事叅軍張景毓字
燭微撰業行寺主釋翹微書

唐故朝議郎行兗州都督府方與縣令獨孤府

君之碑銘

唐劉待價

聞夫軋蓋上闕星緯分其纏舍坤輿下蟠河岳裂其封域是以觀象體物建百里之庶邦敦俗牧人置千石之多士則有威霽風雨稱明鏡於當時德洽絃歌号元龜於後葉其有繼美宣化教肅刑清作根本於巖廓爲喉命於黔庶休明一代映徹九泉歷選徽塵歸獨孤府君矣公諱仁政字仁政河南洛陽人也本姓劉氏導擾龍之巨源長河不竭䟽斷虵之曾岫連岳無窮屬逐鹿於中原乃避時於北漠因山易姓以氣雄邊及魏室之鬱興服袞論道遷周邦而扈從衣

錦還鄉吐奕葉而增昌。朝盈紫綬聳本枝而逾懋。郡接朱轡菌藹紛綸可畧而述。高祖永業齊中書舍人南道行臺右丞洛州刺史遷左丞加散騎常侍儀同三司特進行臺左僕射封夏州啓寧縣開國公武安郡開國公廣州德廣郡開國公西平郡開國公瀛州章武郡開國公彭城郡開國公各食邑二千戶賜鼓吹一部絹布各二千疋錢卅万俘口三百餘人馬五十疋轉七兵尚書兼吏部尚書入周拜司徒公行臺尚書令冊臨川王大司寇少右弼謚曰貞佩金章於黃閣綰蓋綬於玳筵內助理於萬機外佐平於百揆竒籌獨運戶邑光於六封雅樂相喧鼓吹標於四錫

曾祖子佳。周柱國直閣將軍武安郡開國公華州刺史儀同三司。隨大將軍涇州刺史應國公。拜壇虎將。祠黃石以傳書。刺郡神君。褰赤帷而察俗。賞茅土於輿壤。以荅元功。進儀服於太階。還尊懋德。祖義恭。隨京兆郡富平縣令。唐秦王府倉曹叅軍事。荆王府長史。右衛郎將。左衛中郎將。左監門率。溫汾歸婺四州諸軍事。婺州刺史。上柱國高平縣開國侯。雍容朱邸。陪文雅之良遊。巡警紫微。膺爪牙之重任。百城宣化。得賈父之能名。五等開封。獲通侯之美稱。父士贇。唐宏文生。文德皇后挽郎。虞庠之胄。必擇士林。楚挽之郎。寔資門蔭。選授霍王府戶曹叅軍事。密王府兵曹。

叅軍事原州都督府戶曹叅軍事轉汴州尉氏縣令遷坊州鄜城縣令上騎都尉行丹州司馬龍襄爵高平縣開國侯幕府端簪聞爲善之最樂列曹從務佐激濁以增清叔孝擒奸智窮於耳粟伯騫廡士語重於笥金孫氏襲侯尚食漢閒之地謝庭蘊玉還光席上之珍惟公騰秀二儀降精五緯髫年對日綺歲叅元成千里之權竒望雲驤首刷五色之毛羽抱義賓王起家皇朝左勳衛左金吾引駕出警入蹕統式道之朱麾夜傲朝巡司禦戎之金革解褐思州司倉叅軍事像水之平法絃之直遊刃盈庭之訟發蒙列局之疑掌十二之人天致菽粟之流衍改授宣州溧陽縣

丞南服水鄉。北斗星分。吳越雜錯。士吏剽輕。公贊銅章以化人。持水鏡而照物。季俗爲之懲革。淳風由是興行。轉朝議郎。上護軍。行兗州都督府。方與縣令。法三異之化。振百里之雷。敦禮義以教人。薄聚斂以富俗。女脩織衽。不下三齊。男務耕耘。還登九穀。椎埋止息。桴鼓於是稀鳴。囹圄空虛。簡牘以之無事。旣而焦延罷職。上書願留。劉寵去官。攀轅而送。方同胡紹。專城之任。克遷遽等。宣尼倚戶之吟。斯作。以景龍二年三月廿九日。遘疾卒於河內郡之私第。春秋七十有七。士喪衣冠。道亡儒墨。德音何在。恨九言之不追。魂氣何之。痛百身之無贖。惟公抱素懷璞。蹈孝履忠。蘊

智成囊。含明作鏡。敞三白之虛室。汎登仙之桂舟。酌其流而惑淺深。庇其宇而忘寒暑。儒林罩月。武庫驚雷。六義分落錦之篇。八體下崩雲之陣。阮公琴酒。情盤脩竹之閒。尸子登臨。神王長松之下。清門赴弔。無雜号之賓。儉室奉終。靡一金之產。可謂至德君子人之楨幹者也。以景雲二年歲次辛亥二月景子朔廿七日壬寅。遷窆于洛州河陽西北韓城鄉龍臺里之平原禮也。馬啓滕城鳥飛楊墓。晚風含怨。託松柏以揚聲。斜日緘愁。向煙雲而沮色。嗣子宗業。隆堂構。孝極天經。攀翠柏以長悲。奉元醪而永慕。想元成之祖德。遂述家風。鑒陳寔之貞碑。爰題翠琰。庶陵移谷。變

竹帛非堅而懿德嘉聲。乾坤等固其詞曰。

擾瀧疏派。斷虵分族。遇亂中原。避時北服。因山易姓。待時干祿。其北魏稱帝。佐命爲臣。爰從鳳蹕。式返雞津。祚茅食采。華轂朱輪。其踵德誕美。韶姿令器。渾金璞玉。霜鶴雲驥。論起談天。詞成擲地。其振翼鳳穴。統武兵欄。捧戟侍帝。綰綬除官。霜凝吏道。花飛筆端。其一同蒞俗。五美興化。剽劫懲姦。嗤眩息詐。女脩纂續。男務耕稼。其攝官稱謝。攀轅告歸。佇遷喬木。奄落斜暉。昊天不憖。與吾何違。其相彼青烏。啓茲元室。縞駟發軔。丹旒颺日。九原不返。千秋永畢。其贈人悲而結悵。弔鶴思而氤氳。薤灑泣珠之露。松纏慘玉之雲。爰

勒銘於(元)石以作固於清氛其八

劉待價撰

吏部常選(宏)

農劉珉書

碑出孟縣
前人未見

大周故鎮軍大將軍行左鷹揚衛大將軍兼賀

蘭州都督上柱國涼國公契苾府君之碑銘

并序

唐婁師德

原夫哲后時乘璧人貞觀必俟風雲之應以光朝列
尤資棟榦之材式隆王道若乃傑出文武挺生才俊
道符忠孝性與清白高視於寇賈之前獨步於韓彭
之上肸響名教蟬聯簪組許史焉可儔金張莫能匹
四海慕其風範千里仰其談柄玉質金箱探蹟索隱
沒而不朽其唯賀蘭都督涼國公之謂哉君諱明字

若水本出武威姑臧人也。聖期爰始，賜貫神京。而香
逐芝蘭，辛隨薑桂。今屬洛州永昌縣，以光盛業焉。原
夫仙窟延祉，吞霄昭慶。因白鹿而上騰，事光圖諫。遇
竒蜂而南逝，義隆縑簡。邑怛於是，亡精鮮卑。由其褫
魄恤允於前涼之境，茂俗於洪源之壑。良史燾焉，此
可畧而誌也。曾祖哥論，易勿施莫賀可汗。遞襲珪璜，
夙傳弓冶。共棲梧而比翼，與良玉而齊價。濯如春柳，
勁逾霜竹。英名振白山，雄圖光紫塞。祖繼莫賀特勤，
積代爲英傑之先。光圖絢史，保家爲名教之首。拔今
超昔，宏材膠葛。洪源浩汗，映竹史而騰芬。綴錦書而
擅響，父河力鎮軍大將軍，行左衛大將軍，檢校鴻臚。

卿檢校左羽林大將軍上柱國涼國公。贈輔國大將軍使持節并汾箕嵐四州諸軍事并州大都督。謚曰毅公。塋積膏腴。門標英偉。發言會規矩。動容成楷則。學該流畧。文超賈馬。威青海而安白道。光三部而截九夷。揆務棘司。爲羣寮之宗匠。膺榮蘭錡。成五戎之淮的。而鍾漏斯盡。而贈崇班。聿加千里之榮。俄處六條之位。哀榮之禮既洽。朝野式瞻。送終之典更隆。搢紳翹德。公赤野生姿。青田矯翰。家蓄古賢之操。門傳高士之節。年甫一歲。穉上柱國。封漁陽縣開國公。食邑一千戶。八歲起家。穉太子左千牛。十一穉朝散大夫。太子通事舍人。裏行。十二穉奉輦大夫。若夫紫禁

青規之所必擇賢而方穉玉階金闕之前實高門之
攸處所以榮加髻髻澤及綺紈鳴玉鏘金光前映後
乃人物之儀表實衣冠之領袖重以河山險要惟賢
是居爪牙任切非親莫委麟德季中穉左武衛大將
軍賀蘭州都督自非承家奕葉累代衣纓焉可內奉
鉤陳外應刺舉者矣相府在藩爲涼州道元帥以公
爲左中軍總督侍中姜恪爲涼州鎮守大使以公爲
副然則朝端妙選實佇異能望重材高允膺僉屬後
以鼈海未清虵川尚阻戎車所及尤俟英將從中書
令李敬元征吐蕃公爲百海道經畧使於是南討吐
蕃北征突厥累摧兇醜勲績居多後狼山及單于餘

黨復相聚結奉制討擊應時平殄前後賢勞不可勝紀改糧左驍衛大將軍襲爵涼國公食邑三千戶賜錦袍寶帶金銀器物雜彩綾錦等數千件糧長男從三品以酌功也仍改爲燕然道鎮守大使檢校九姓及契苾部落公倣裝遵遠望赤水而前驅勁騎騰空指白蘭而長鶩左縈右拂八校於是爭先斬將搴旗三軍以之作氣遂得降絲言以隆爵命自而府而錫珍竒金貝咸紆繒錦交集列鼎而光祖祔分茅以惠子孫策勳居寂又糧雞田道大總管至烏德韃山南招降二萬餘帳縱使李牧寧部魏絳和戎推昔揆今當率囚二尋糧右豹韜衛大將軍未幾復改糧左豹

韜衛將軍并充懷遠軍經畧大使又依舊知燕然道
大使公高望重亟膺獎擢得人之譽聞於朝野惟大
周革命重懸日月擢穉鎮軍大將軍行左鷹揚衛大
將軍餘並如故有制曰鎮軍大將軍行左鷹揚衛大
將軍兼賀蘭州都督契苾明妻涼罔夫人李柔順成
姿幽閑植性聿脩婦德每勤於玉道叶贊夫家必存
於忠義既竭由衷之請宜覃賜族之恩并及母臨洮
縣主並蒙賜姓武氏公侯必復河洛胄賢屬寶運之
開基接僊潢而錫派忠貞無替聲逾金氏表裏承恩
勲高石窞後稷朔方道總管兼涼甘肅瓜沙五州經
畧使度玉關而去張掖棄置一生瞰弱水而望沙場

橫行萬里。幄中有策。聞外宣威。豈直操履冰霜。固亦
心符筠玉。名高一代。氣逸九霄者矣。既而司寇逝川。
俄結頽山之恨。將軍大樹。行聞斷石之嗟。悲夫。以鑿
證字案餘已見順陵碑者不更出 瑩元季臘^① 碑作^② 順陵 廿三^③ 邁
疾薨於涼州姑臧縣之里第。春秋卅有六。制曰。悼往
贈榮。經邦之懿典。飾終加等。列代之徽猷。諒以褒德。
勸能。念勞。追舊者也。故鎮軍大將軍行左鷹揚衛大
將軍兼賀蘭都督上柱國涼國公契苾明。理識開舉。
局量沉雄。家著勤誠。代彰忠懇。早膺朝寵。夙紹庭規。
秩峻銜珠。寄隆賜鉞。入叅巡警。恭慎之譽。必聞。出綏
藩落。威惠之聲。兼濟^④ 轡不留。夜舟俄徙。未窮遠畧。

奄謝昭途。燹想嘉庸。良深矜歎。宜申殊澤。式旌幽壤。可贈使持節都督涼州諸軍事涼州刺史。餘如故。賜物三百段。便於涼州給付。所緣葬一事以上。並令官供。仍荖涼州都督府長史元仁儼監護。仍令朝散大夫通事舍人內供奉邊懷秀弔祭。旣而居諸易遠。宅兆攸資。金甌泛泉。玉雞伺旦。粵以大周萬歲通而元季。歲次景申。八^甲庚午朔十五^乙甲申。葬於咸陽縣之先塋。禮也。禮司謚曰。公夙承門閥。早踐通班。茂績昭宣。聲望顯著。學該流畧。藝總兵鈐。以孝安親。以忠奉罔。終始如一。存歿不逾。旌善易名。宜^典實。按。謚法寬樂令終。曰靖。請謚曰靖公。惟公降淳粹而蓄瓌

竒稟精忠而挺才望。韶儀淹雅難窺於得失。逸調清通不測其涯涘。抑揚人傑彫績士林。等桃李之無言。若朱藍之在性。先仁而後己。鄙利而尚賢。亭亭有千丈之幹。其高非易仰。汪汪如萬頃之陂。其深不可測。有碩學焉。有令問焉。擅非馬之雄辯。蓄靈虵之雅作。逸氣上煙霞之表。高明振朝野之際。五公七侯之盛。僅可執鞭。曜蟬鳴玉之榮。纔堪捧轂。如揚彪之丞伯。起若班固之嗣叔皮。加以懸榻翹賢。分庭接士。衣裘鞞馬。朝成夕費。兼濟之性。光映人物。乃構厦之良材。映車之名寶者矣。夫人唐膠西公孝義之長女也。齊輝婺彩。擢幹瓊枝。莊敬率由於天然。抑揚女史。溫柔

稟之於本性。光輝內則。旣而雄劍潛鋒。崩城起恨。毀瘠逾於大禮。攀號洎乎剪髮。夷夏足其悲哀。搢紳增其慘感。屈己而遵女誡。飭躬而宣婦道。可謂承家稟訓。執仁組行者歟。長子左豹韜衛大將軍兼賀蘭州都督。上柱國涼國公。次子右武威衛郎將。上柱國姑臧縣開國子。嵩。右玉鈐衛郎將。上柱國。番禾縣開國子。崇等。並早涉義方。夙延庭訓。孝心冥粦。至德純深。及候氣纏憂。先嘗空術。充窮盈感。孺慕增悲。棘兒由乎絕漿。柴毀幾於滅性。可謂至德冠幽明。窮迷傷骨髓。哀號擗踊。獨超前輩。雖凶極之誠。踐霜露而逾感。相質之重。映今古而垂裕。是用傍求翠琬。式樹豐

碑家風祖德居然在斯用以光士行用以芳本枝歷
千秋兮無斁經百代兮無虧銘曰

東井蒼蒼西土茫茫而開分野堊列封疆門多英毅
代產忠良偉哉人物紛乎典章其前涼後涼乃祖乃
父赫奕冠蓋蟬聯文武金箱玉質光台映輔至德符
孝貞心翼主其可汗嗣出抑揚流輩業盛后昆道隆
前燹遐迹欽挹夷夏欣戴四海英髦共推貞槩其特
勤垂裕搏風振翼孔席申歡嵇松比直智水游泳仁
山止息討本尋源斯標岐嶷嗤毅公雅節莫之與京
既忠且孝王佐人英研精流畧捐■良平昭昭餘慶
恤允膺榮其挺生異材齟率振響未盈小學亟承恩

將門閥易隆。墻仞難仰。學行無數。名實逾廣。其露冕

關河。式清邊傲。遽宣威德。聿敷名教。肅彼夷落。鎮茲

襟要。人揚德宇。窮微盡妙。其綏邊寄重。尤資望族。顯

允竒材。悠然嗣福。外清荒憬。內膺榮祿。總戎之寄。聲

連祕牘。其詵詵于隰。屢警邊城。侵乙躍馬。槩甲揚旌。

橫雲列陣。背水開營。未經千乙。俄夢兩楹。其光鷲繡

留居。諸易促旋。悲委珮。遽傷埋玉。松蔭隴兮。均青草。

榮墳兮。吐綠式。鏤貞琬。以光勝躅。其先天元年

歲次壬子十二月十六日辛亥孤子息特進上柱國

涼國公嵩立父碑。肅政御史大夫上柱國婁師德

製文。左肅政御史殷元祚書。今石本損泐據汪太史唐碑錄存載之

大唐處士胡君墓誌并序

君諱佺字尚真定安人也。遠祖回宦遂厖介休。夫榘椽是佐錯胡綜之文章清白知名見胡威之父子。光懿烈不替先風簡謀詳諸可畧言矣。祖買隋孝廉舉文林郎幼洽詩書長崇禮樂太初玉樹夙擅嘉聲。韋氏金籬遽升高第父端養素不仕情貪野薜志篋裘裳道王仁琴跡存山水君濯濯儀彤汪汪軌度珠胎孕月光彩絕倫蘭若銜風幽芳自遠鄉里稱善喻彼少游文籍自娛同夫孟陋遺累嚙滓傲性煙霄簪軒不介於懷寵辱不驚其慮歲臨辰巳鄭康成於是云亡月犯少微謝慶緒俄而致殞春秋七十卒于私

第夫人石氏穠荷比秀美箭齊貞宜其室家和如琴瑟翰林之鳥始雙飛而隻飛龍門之桐俄半生而半死嗣子懷爽懷玉岵岵長違霜露增感粵以開元三年歲次乙卯龍集單闕十月己酉朔廿五日癸酉遷窆於介休縣東廿里平原禮也絲上山傍昭餘澤右懼陵谷而驟易思封樹而永懷乃爲銘曰

盤根安定散葉汾壩乃祖乃父光後光前惟君節槩業尚虛元鬼瞰庭宇鳥鳴座筵不逢石髓俄歸玉泉一闕上隴長嗟逝川

唐故葉有道先生神道碑并序唐李邕

昔者誕發老君道純天地生得夫子身負日月且時

宰不宗。主人勿用。矧乎埋照後谷。潛盤窮山。幽姿蛻於塵容。素尚允於仙類。豈辟命行矣。爵服繫之而已哉。公諱國重。字雅鎮。南陽葉縣人也。自少典錫羨高辛。纂緒陶唐。重熙后稷。邁種文王之允。乃食於沈。尹戍之子。載封於葉。受氏享國。大哉邈乎。逮乎祖乾昱。克壯其猶。永孚於德。瑾戶習隱。塞允億坤。碩膚長材。通理博藝。雖安車累至。而堅卧固辭。故慶祚克開。眉壽維永矣。厥考道興。性守宮庭。道敷邦國。居鬼從地。率神從天。受錄以怛之。飛符以北之。扼魍魎之邪。劉臺台之崇。有足竒也。至於揮札落紙。引弓貫革。特起五部。廣推大餘。侯誰嗣哉。先生靈承道宗。異聞訓誘。

弱喪文貌。幼尚純篤。仙骨有象。童心不萌。專精五龍。遍遊羣岳。聰以達遠。明以察微。達死生之占。體物氣之變。嘗靜貞。動耗息。影歸止。雲外壑。林巢仙居。人絕不鄰。道阻且右。獨往幽勝。永歌隱淪。放聞保和。習虛致靜。摺五石之髓。擷三芝之英。時哉不留。歲聿其逝。緇髮純漆。韶顏渥丹。事適元同。神與道媾。惟寂惟冥。不飲不食。數十載於茲。乃昇聞帝庭。駿發皇眷。簡才受命。降尊加禮。將之以文馬。速之以暢轂。先生盱眙長揖。握手高謝。曰。自昔帝舜登庸。德輝允鑠。光武繼統。吏道孔嘉。且薛方逢萌。備外臣之禮。虞仲夷逸。終處子之業。豈垢俗疵物。偏貢介性。將探道慕類。坐

致竒齡。使者蓄而之疑。申遂行之旨。乃周覽廬室。躬
省倉廩。考疇人之疆晦。訊家童之作業。皆儉以遵約。
安能維始。味不甘口。色無養目。信以爲著。誠去僞。敢
守難奪。順風可即。強起曷至焉。遂虛覲復命。慙歎聞
列。朝廷企其高。渴其道。聆嘉聲而屬■者。豈勝言哉。
有司以天元書缺。星度官弛。亡五德之運。謬四時之
分。荆鬼越祥。不知所況。子亥母癸。烏識其原。皆乘遽
遠尋。請益傳受。可謂繩誠列而曲直徵。衡誠懸而輕
重立。粵惟博物君子。豈伊小說。鯁生嗚呼。天不持久。
人將復歸。積年迫於期頤。遠志屈於摧落。卜兆幽石。
託墳清林。逸人不追。國士靡憲。泉石沮色。鄉縣失聲。

豈無他人。惟子之故。允子慧明。贈銀青光祿大夫。歙州刺史。公因替厥繇代。增其業。啓祕籙之高妙。揚元津之洪波。道微若聲。心麼若氣。吹律煖谷。運歷知天。屢下辟書。終不應命。孫子景龍。觀道士鴻臚卿。越國公。幼得父書。早傳成法。夤念有訓。邁迹自身。讀天下之書。備方外之術。火滌淫祀。劔誅羣妖。恩開五君。名動四國。其入也。排金鎖。謁紫庭。爲帝傲吏。出也。法玉京。坐元寺。作仁宗師。故能大匠道門。冢卿朝右。禮食軒座。寓直禁廬矣。嘗以理氣自強。登老益壯。雖暮景急節。而純孝孔哀。是獻封章。願拜墳墓。有軼帝念。載形王言。神札以飛。傳瑞乃發。羣公帳錢。列蕃郊迎。朝

輝有章鄉人皆慶枉以末技揚於孝心惟先志以追遠立豐碑以紀德夫何閒然其詞曰

宗門素履家代隱仙道一相孕薪火交傳黃公術左赤水珠聯道開幽鍵性與真筌一門累祖四世百年抗迹巖谷消聲天地卓尔遐舉藹然高致麝以臭焚珠以明墜人則有心徵亦不至保身匪媮全樸爲利孝孫增業明辟順風志嘗無忝事或不同徵賢朝滿舉逸山空曷由高枕克謝代工測微達變盡規納忠皇眷雖渥孝思亦深章服粲粲傳駟駿駿載違廷闈是展墳林紀石追遠昭銘率心孝終事立榮歿寵今遐超古始永憲江南

開元五年歲在丁巳三月

七日括州刺史李邕文并書

處州志載此文爲法善使李邕夢中書之故名

追魂碑錄
以志異聞

大唐贈歙州刺史葉公神道碑 唐李邕

公諱慧明字德昭南陽郡人也其先系自軒后殄于周文聃季食沈子高封葉因爲氏矣逮問政孔好龍得真代有聞也昔者惟帝興運乃聖炳靈風雲相從卜夢通感閒氣駿發良弼大來有開必先憑物爲爲因自然矣則我使君降僊府乘道流追縱隱淪叶契幽叟結廬澗沚考盤巖椒同人利貞遁代勿用雅好酒德尤邃老經話言解頤精絕倒誘進不倦虛納盡好事集門長者闡里每至升月帷戶咏風林

薄植杖嘯谷。席皮琴山。泰然樂生。澹乎忘老。方其維
性壽。逝神僊。旬赤松之遊。縱黃■之術。外身先物。歸
根致柔。緣以大均。持以大定。色理不盪。寵辱不驚。繩
繩焉。熙熙焉。孔德之容。罔可測已。故師長旌禮。邦族
與化。智者謂智。仁者謂仁。雖褐塞桑。樞紵衣韋帶。必
避途加敬。襄風惕息焉。是用克聞於家。大育厥允。則
我越公。襲上德。延慶靈。生而知之。學而習之。有專門
之資。得不承之業。纔齟犴道。旣冠同元。訊遠岳之福
庭。覲幽尋之方士。陳呪雷駭。吐刃雷光。沈海莫濡。蹈
冶匪藝。呵萬鬼。搦百神。啓陰官之符。變冥司之錄。追
究往事。坐知來茲。膏肓無所遁其形。霧露不能滋其

疾竒跡多緒。嘉聲日聞。是以大君孔休。辟命荐至。入
自卧内。問以咎徵。造膝必誠。遇事偕中。時更四紀。代
且五王。順風以請。天師敷衽。以近皇極。緇素莫能出
右。公卿是惟虛左。國家有事。天地將旅。海岳公嘗致
禮。加璧能事。潔羞傳駟。載途郡邑。迎謁者。歲四三焉。
自頃賊■嗇袖。小人吹蠱。敢爲戎首。興此厲階。天步
未亨。人事將殆。公乃極陳幽贊。大啟聖猷。枚卜撰辰。
並走羣望。作爲邦翰。先■主憂。殄勦元兇。翼扶皇統。
是嘉厥異。式揚爾忠。爵賞懋於身。寵贈光乎考。匪此
父也。曷訓其子。匪此子也。曷揚其親。松楸已行。碑板
未立。永念終古。追存孝思。驟請闕廷。第如江介。遠訪

才子。枉逮鄙夫。趙括論兵。多缺舊學。班固述史。寔賴家書。顧惟成章。實愧貞石。其詞曰。

眞隱夷軌。默僊解形。倬哉獨立。企古遐征。殆庶元德。升覩丹經。服鄉不涅。光咏無營。築卜岑渚。上藥待琴。徐嘯風谷。緩步月林。白雲怡意。清泉洗心。曷勝不往。曷竒不臨。迹因神遠。情隨地深。舉代方籍。皇家未軼。肇■懿子。載揚令德。左慈致物。越人辨色。司察鬼謀。役使神力。寵被五君。聲聞八極。日嘗薄蝕。國有多難。兇慝扇揚。忠烈憤惋。亦旣先覺。克啗幽贊。皇哉神武。赫然天斷。薄言即戎。于以戡亂。帝念疇庸。典開列土。豈曜厥身。寔贈于父。朱藩乃錫。紫綬是與。存致歿榮。

忠伸孝舉烈烈桐柏緒風興悲表墓有闕紀德無詞
哀哀嚴蔭纍纍孝思孰傳終古是建豐碑 贈慧明
銀青光祿大夫歙州刺史子道士瀾善授鴻臚卿封
越國公 開元五年太歲丁巳鷄尾七月夷剽七

日甲辰建江夏李 國子監太學生

故銀青光祿大夫秘書監兼昭文館學士侍讀上柱
國常山縣開國公贈潤州刺史馬公墓誌銘 駢
公諱懷素字貞規本原扶風其先自伯翳馬服具諸
史載暨漢南郡太守融命代大儒公即其後也十一
代祖機抗直不撓晉御史中丞扈元帝渡江家南徐
州丹徒故今爲郡人也代以學聞高祖消博綜墳典

仕陳爲奉朝請。曾祖法雄，慷慨倜儻，好孫吳，不事筆研。陳橫埜將軍，祖果，願，願學禮經，不隕素業。即學士，摳之從父兄也。少爲尚書毛喜所知。陳本州文學從事，父文超，果行，毓德，精意易道，及洪範，頗曉氣候。貞觀中，以有事遼，沮，策名勲府。龍朔初，黜陟使舉檢校江州尋陽丞，棄官從好，遂寓居廣陵，與學士孟文意，魏令謨，專爲討論，具有撰著。公即尋陽府君第三子也。幼聰穎，六歲能誦書，一見不忘，氣韻和雅，鄉黨以爲必興此宗。十五徧誦詩禮騷雅，能屬文，有史力。長史魚承暘特見器異，舉孝廉，引同載入洛。尚書倉部郎河東裴琰之，博學深識，見名知人，音旨儀形，海

內籍甚。公年甫弱冠，便蒙引汲，令與子_之研覃，遂博遊史籍，無不畢綜。以文學優贍，對策乙科，乃尉郿，無何，丁太夫人_■■憂，即陳學士_宏直曾孫女也。本自名家，貞高博識，公在艱，疚骨立，柴毀殆不勝喪，服闋授麟臺正字少監，京兆韋方直好學愛士，善飛白書，以公既及冠禮，未嘗立字，遂大署飛白，云懷素字貞規，扶風之學士也。封以相遺，其爲時賢所重如此。以忠鯁舉，除左鷹揚衛兵曹參軍，轉咸陽尉，昔則天太后，大崇諫職，授左拾遺，深盡規諷，尋改左臺監察御史，歷殿中，彈紕不避強禦，加朝散大夫，轉詹尹丞，朝論稱屈，遷禮部員外郎，與范陽盧懷慎隴西李傑俱

以清白嚴明分爲十道按察以公詞學瞻洽精覈文章轉授考功員外郎修文館直學士遷中書舍人與李乂同掌黃畫踰年檢校吏部侍郎實允僉屬朝廷以刑政所急改授大理少卿關畿佇材除雍州刺史惠實在人入爲太子少詹事判刑部侍郎加銀青光祿大夫兼判禮部尋而正除刑部時稱慎恤轉戶部侍郎上以河南蝗旱令公馳驛賑給宣布聖澤所至甘雨使迴拜光祿卿遷左散騎常侍轉祕書監四部舛雜頗多殘蠹公備加校定廣內充積加兼昭文館學士與右散騎常侍褚无量更日入內侍讀每至宮門恩勅令■小舉上殿自車丞相已來殆將千載始

見此禮公疇日自序云慕善嫉惡好學潔己自謂不
慙古人無負幽明矣直哉是言不騫厥信以開元六
年三月十日遘疾中旨遣御醫賜藥相望道路以開
元六年七月廿七日終于河南之毓財里第春焮六
十皇上輟朝二日舉哀■次乃下制曰存樹高烈君
子所以立身沒垂令名古人所以貽範銀青光祿大
夫故祕書監兼昭文館學士侍讀上柱國常山縣開
國公馬懷素越箭含貞楚材登用清芬獨映至德可
師自服勤典籍納訓帷辰輔朕以媿道弼予以正言
允資惠迪實表泉懿而曾不憖留歟焉彫落思甘盤
之舊學臨宣嗣以增歎興言感愴用震悼于厥懷可

贈使持節潤州諸軍事潤州刺史贈物三百廿段米粟三百廿碩喪葬所須並令官給京官六品一人檢校公雖累登臺閣率身儉素俸祿之資調贍親友及啓手歸全家無貲產唯有書數千卷以爲燕翼以其年十月十三日寔於洛陽古城之北原禮也有子巽等雖年在童孺禮過成人棘心纍纍感于隣巷敬勒行事以旌泉戶銘曰

益佐理水功施生人羨于馬服守趙却秦東京戚賚南郡儒珍德先惟永弈弈振振其朝請風素橫埜矛戟從事顓禮尋陽洞易公自名家伏膺經籍鼓鐘外遠純涂諄未內積其用材南楚待問東堂持斧作憲

含香拜郎。再飛禁掖。七踐文昌。國傳茅土。巷擁旗常。
其井春紛綸。桓榮稽古。行儒師逸。高跡誰伍。公實踵
之。堂奧斯覩。匪徒外潤。爰歸內補。嗚惟昔殷后。學于
甘盤。一期千載。遇君則難。充堂何那。其臭如蘭。懿哉
夫子。斯言不刊。碁仁謂必壽。神期式穀。生寄雖浮。夜
趨何速。寵極韓賜。恩深衛哭。徒望邢山。豈忘喬木。碁
崢嶸徂歲。寂歷空岑。白日無影。寒雲半陰。燕城表滅。
漢水碑沈。貞臣之墓。樵牧誰侵。碁

後漢大司農鄭公之碑

唐史承節

夫囊括宇宙者文字。發明道業者典墳。所以聖人作
而萬物覩。賢人述而百代通。禮樂得之以昭明。日月

失之而寒忒。宣尼彰刪緝之功。秦始速焚燒之禍。迨乎羣儒在漢。傳注瑤■莫不珠玉交輝。纖微洞迹。同見集於芸閣。獨有輟於環林。豈若經教奧義。圖緯深術。兼行者多。無如我鄭公也。公諱元。字康成。北海高密人也。八世祖崇。哀帝時爲尚書僕射。公少爲鄉嗇夫。不樂爲吏。遂造太學受業。師事京兆第五元。始通京氏易。公羊春秋。三統歷。九章算術。又從東郡張欽。祖受周官禮。記。左氏春秋。韓詩。古文尚書。攝齋問道。摳衣請益。去山東而入關右。因盧植而見馬融。考論圖緯。乃召見而升樓。精通禮樂。以將東而起歎。三載在門。十年歸邑。及黨事起。遂杜門不出。隱修經業。於

是鍼左氏之膏肓。起穀梁之廢疾。而又操入室之戈。矛發何休之墨守。陳元李育。校論古今。劉瓌范升。憲章文議。何進延於几杖。經宿而逃。袁隗表爲侍中。緣喪不赴。孔融之相北海。屣履造門。陶謙之牧徐州。接以師禮。比南山之園皓。鄉曰鄭公。類東海之于君門。稱通德。漢公車徵爲大司農。給安車一乘。所過長吏送迎。公乃以病自乞還家。董卓遷都。長安公卿舉公爲趙相。道斷不至。會黃巾寇青部。乃避地徐州。建安元年。自徐州還。道遇黃巾賊數萬。見公皆拜。相約不敢入縣境。時大將軍袁紹總兵冀州。遣使邀公。大會賓客。廼延升上坐。身長八尺。飲酒一斛。秀眉明目。儀

容溫偉，客多豪雋，並有才說。見公儒者，未以通人許之。競設異端，百家互起，公依方辨荅，咸出問表，皆得所未聞，莫不嗟服。將汝南應劭，亦歸於紹。因自贊曰：故太山守應仲遠，北面稱弟子，何如？公笑曰：仲尼之門，考以三科，回賜之徒，不稱官閥，劭有慚色。門人相與撰公荅諸弟子問五經，依論語作鄭志八篇。公所注周易、尚書、毛詩、儀禮、周官、禮記、孝經、尚書大傳、中候、乾象、歷，又著天文七政論、魯禮禘祫義、六藝論、毛詩譜、駁許慎五經異義、荅臨孝莊周禮難，凡百餘萬言。經傳洽熟，稱爲純儒。其所撰著，今並通習。是知書有萬卷，公覽八千也。齊魯聞宗之，公後嘗疾篤，自慮

以書戒其子益恩曰。吾家舊貧。爲父母羣弟所容。去
廝役之吏。游學周秦之都。往來幽并兗豫之域。大儒
得意。有所受焉。遂博稽六藝。粗覽傳記。時觀祕書。緯
術之奧。年過三十。乃歸鄉。假田播殖。以娛翰空。後舉
方正賢良有道。辟大將軍三司府。公車再徵。比牒併
名。早爲宰相。惟彼數公。懿德大雅。克堪王臣。故宜式
敘。吾自忖度。無任於此。但念述先聖之元意。思整百
家之不齊。亦庶幾以竭吾才。故聞命罔從。而黃巾爲
害。萍浮南北。復歸鄉邦。入此歲來。已七十矣。宿素衰
落。仍有失誤。案之禮典。便合傳家。今我告爾以老。歸
爾以事。將閑居以安性。覃思以終業。自非拜國君之

命問族親之憂。展敬墳墓。觀省野物。胡嘗扶杖出門乎。家事大小。汝一承之。咨爾煢煢一夫。曾無同生相依。勗求君子之道。研鑽勿替。敬慎威儀。以近有德。顯譽成于僚友。德行立於己志。若致聲稱。亦有榮於所生。可不深念耶。可不深念耶。吾雖無紱冕之緒。亦有讓爵之高。自樂以論贊之功。庶不遺後人羞。凡某所憤憤者。徒以吾親墳壠未成。所好羣書。率皆腐弊。不得於禮堂寫定。傳與後人。日西方暮。其可圖乎。家今差多於昔。勤力務時。無恤飢寒。菲飲食。薄衣服。節夫二者。尚可令吾寡恨。若忽忘不識。亦已焉哉。又年春。夢孔子告之曰。起起。今年歲在辰。來年歲在巳。既寤。

以讖合之。知命當終。有頃寢疾。享年七十有四。以其年六月卒。遺令薄葬。自郡守以下。嘗受業者。纒經赴會千餘人。廼葬於高密縣城西北一十五里礪阜山之原。嗚呼哀哉。有子益恩。孔融在北。舉爲孝廉。及融爲黃巾所圍。遂赴難。隕身。有遺腹子。公以其手文。侶己。名曰小同。精通六經。鄉人尊之。時爲侍中。嘗詣司馬文王。文王有密疏。未之屏也。如廁還。問曰。卿見吾密疏乎。荅曰。不見。文王曰。寧我負卿。無卿負我。致鳩而卒。悲夫。自夫子沒後。大道方卷。公之網羅遺典。探蹟今猶。特立鬱然。時季途屯。志不苟變。全身遠害。猗歟美歟。及范曄作論。有曰。王父豫章君。每考先儒。

經訓長於公。常以爲仲尼之門。不能過也。及傳受生徒。專以鄭氏家注云。晉中興戴逵字安道。以鷄卵汁澆白瓦屑。爲公作碑。手自書寫。文■■■■語亦妙絕。年代古而碑闕亡。德音夙而詩書在。承節以萬歲。通天元年。奉勅於河南道訪察。觀風省俗。激濁揚清。行至州界。見高密父老云。鄭先生漢代鴻儒。見無碑記。不以庸妄。遂託爲文。往以會府務殷。■■■■無暇景。歲序遷貿。執筆無由。今者罷職含香。忝居分竹。屬以閑隙。乃加修撰。耆舊者惟聞其名。後生者不覩其事。今故尋源討本。握槩懷鉛。兼疏本傳之文。並序前言之目。發九泉之冥昧。播千載之■■■■。剪以繁華。不爲雕飾。

文先成訖。石又精磨。碑未建而承節卒。正議大夫使持節密州軍州事刺史上柱國鄭杳。以開元十三年秋八月。巡茲屬縣。敬謁先宗。欽承墳墓之間。籌度碑石之側。公心至清。不欲費■。公性至靜。不欲勞煩。廼命參軍劉肫。校理舊文。規模新勒。未閒。肫又罷職。仍令終事。冬閏十二月。公伺其歲隙。因遣巡團。便令建立。惠而不費。允協人神。承節銘曰。

煥乎人文。圖籍典墳。煩亂事翦。定自孔君。中途湮沒。秦帝俱焚。漢興儒教。鄭氏超羣。膏腴美地。簪紱宏規。嗇夫罷署。京兆尋師。中候乾象。左氏韓詩。雖稱積學。殆若生知。公之挺生。大雅之懿。囊括墳典。精窮奧秘。

六藝殊科。五經通義。小無不盡。大無不備。好學慕道。深思遠慮。來往周秦。經過兗豫。侍中不仕。司農罷署。盧植東遇。馬融西去。作者謂聖。述者謂明。躬違三辟。門傳五更。周官東部。漢躋西京。白玉遍地。黃金滿籬。占卜潛橋。行途過沛。陶謙師友。孔融高蓋。山啓黌扉。草生書帶。七十歸老。三年赴會。經傳洽熟。齊魯攸宗。爵祿不受。贊論爲功。禮樂今去。吾道皆東。類于標德。比皓稱公。閻尹擅貴。禁錮連年。乃逢宥罪。方從舉賢。南城避難。東萊假田。誕膺五百。終覽八千。今年在辰。來年在巳。嗚呼不愁。于嗟到此。勞我以生。息我以死。道該八索。神交千祀。濰水之曲。礪阜之陽。通德爲里。

鄭公爲鄉雲愁廟古月暗墳荒舊碑先沒新石再彰
詞愧黃絹心淒白楊明於不朽終古騰芳

鄉貢

進士■安中書丹徵事郎前行密州高密縣主簿
兼管勾常平倉事■裔篆額

大金永安五年

歲次庚申三月一日勒成

大唐元氏縣令龐君清德之碑 唐邵混之

我國家再誓山河重懸日月明罰飭法數名實之故
典考績宣力甄象魏之舊章皇道煥炳而時乘帝載
緝熙而日用德惟善政政在養人若令長子男銅章
墨綬而尤善最者可屈指而知宣父中都太公灌邑
童恢責獸卓茂遷蝗男女別途鬼神息暴以今方古

君何讓焉。君姓龐氏。名履溫。字若水。南安人也。其先齊逢。伯陵之裔。曾祖卿憚。元勳佐命功臣。第壹等左武侯大將軍。封國公。食實封四百戶。贈幽平燕易媯檀等六州諸軍事。幽州刺史。謚曰肅。歷數雖改。雲雷尚屯。披荆棘者馮吳。佐元功者蕭鄧。將盟帶礪。畫象雲臺。圖兼衛霍。案此借為霍字之容。仕遂漢光之願。曙庸賞懋。食邑論封。祖同福。并州大都督府司馬。饒州刺史。左衛將軍。安北都護。外揆望殷。銜珠寄重。匪親不擗。非賢勿居。早蓋南臨。尋振喬卿之譽。紅旌卷式。標鄭吉之能。考承訓通事。舍人。鄭州司馬。贊善大夫。率更令。將作少監。辭令抑揚。綸鳳述旨。題輿叶詠。展

驥治中。洪洞方樟。允供於邦。造激揚少彙。贊於搖山。君純德天資。大材靈降。龍章龍彩。凝脂點漆。出忠入孝。遊藝依仁。荒蕪四壁。寥廓千丈。代陪豐沛。親預葭芋。翼鱗翰之。風雲之會。漢表有外戚恩澤。周詩有申伯渭陽。起家補昭文生。從勲闕也。長安二年。明經擢第。捧宣州參軍。尋授莫州司功參軍事。秩滿。丁二親憂。痛瘁瑩枝。哀酸鄰社。往而不返。杖而後行。縵禫一年。甫從常調。開元十九年春。會府遂拜公爲此縣令。魯子臯之爲政。禮變鄙人。漢原涉之舉能。威行谷口。庶矣富矣。又何加焉。導之齊之。非君莫可。君有善政者七。風電咸下於屬城。樹稼獨滋於元氏。其

政一也。頃以陽光暫昃，亢陰液乖，旬苗慮騰，與人或狼顧。公罄奠珪幣，稽顙壇場，俄而油雲四周，膏雨百里。其政二也。闢土菑畝，用丁分地，勸東作而播稼，課西成之銍斂，躬臨樹藝，親載酒醪，故使夏農服田，秋得其實。其政三也。詢知疾苦，所患虛丁，撫狀上陳，應時申削籍，無稅人獲息肩。其政四也。修職奉符，不爲進越，下有鬱滯，必掣肘諭言，每課田租，時臨調賦，寬爲約，曾無再輸。其政五也。此地俗多慊伎，跼躑彈絃，素曰難持。案金石萃編云：當是治避高宗諱，猶治書侍御史作持也。其說是矣。更承寬弛，公整其銜策，適其權豪，輒去害羣，悛心斂跡，其政六也。先縣館宅，洩漏與百姓雜居，公薄責人，傭先

抽己俸。雖與慮始。而可以樂成。其政七也。是以廉平稱職。西河知魯衛之風。清儉當官。南土變夷齊之俗。可大可久。是謂賢人之德。惟幾惟深。以成天下之務。公儀如繪畫。神若轉規。聲以聞於震雷。用無待於周月。惠如春露。吏人不能窺喜愠之容。結若冬冰。貨殖不能動首陽之行。蓄霜鍾於絳府。有感必通。淒月鏡於元臺。觸形皆照。邑老謝虔祐等。並鄉庭積善。掾吏安排。行義以達其道。隱居以求其志。相與族談。城府錯立。康莊裹德。匪舒宣風。技癢或叫。帝閣而抒美。或邀使駕。而論功。衆志誠如寒附火。於是圖徽翠琰。託懿金聲。其詞曰。

清風汎濫兮其來溥。茂宰馳能兮超卓魯。雞犬相聞兮人安堵。一同仰之兮如父母。聽謳謠兮詢疾苦。踰屬城兮光趙部。趙遺風兮多懞忒。君子爲之屏姦偽。化澆浮兮勗以義。邑兮市無二。政勝殘兮仍博施。如水火兮時不匱。刻石鑄金兮遠傳懿。直爲循良兮守名器。開元二十四年歲在困敦律中夾鍾八日建前鹿泉縣令邵混之篋。蔡有鄰書。

續古文苑卷第十八

續古文苑卷第十九

賜進士及第授通奉大夫山東通省督糧道加三級孫星衍撰
碑志五

右拾遺陳公旌德碑。

唐趙儋

大唐劍南東川節度觀察處置等使戶部尚書兼梓
州刺史兼御史大夫鮮于公爲故右拾遺陳公建旌
德之碑。

公諱子昂字伯玉梓州射洪縣人也其先居於潁川
五世祖方慶好道得墨子五行祕書白虎七變隱於
郡武東山子孫因家焉生高祖湯湯爲郡主簿湯生
曾祖通通早卒生祖辯爲郡豪傑辯生元敬瑰偉倜

儻弱冠以豪俠聞屬鄉人阻飢一朝散粟萬斛以賑貧者而不求報年二十二鄉貢明經擢第拜文林郎屬青龍末天后居攝遂山棲餌朮殆十八年元圖大象無不達嘗學術擬張平子風鑒比郭林宗公即文林元子也英年過人彊學冠世詩可以諷筆可以削人罕雙全我能兼有年二十四文明元年進士射策高第其年高宗崩於洛陽宮靈駕將西歸於乾陵公乃獻書闕下天后覽其書而壯之召見金華殿因言伯王大畧君臣明道拜麟臺正字由是海內詞人靡然向風乃謂司馬相如楊子雲復起於岷峨之間矣秩滿補右衛曹每上疏言政事詞旨切直因而解罷

稍遷右拾遺屬契丹以營州叛建安郡王武攸宜親
總戎律特詔左補闕屬之迨及公叅謀幃幕軍次漁
陽前軍王孝傑等相次陷沒三軍震懼公乃進諫感
激忠義料敵決策請分麾下萬人以爲前驅奮不顧
身上報於建安建安復諫禮謝絕之但署以軍曹掌
記而已公知不合因登薊北樓感昔樂生燕昭之事
賦詩而流涕及軍罷以父年老表乞歸侍至數月文
林卒公至性純孝遂廬墓側杖而後起柴毀滅性天
下之人莫不傷歎年四十有二葬於射洪獨坐山有
詩十首入正聲集十卷著於代友人黃門侍郎范陽
盧藏用爲之序以爲文章道喪五百年得陳君焉由

是大中之詞紙貴天下矣。有子二人，並進士及第。長曰光，官至膳部郎中、商州刺史。仲曰斐，歷河東、藍田、長安三尉。卒，官光有二子，其長曰易甫，監察御史。次曰簡甫，殿中侍御史。斐生三子，長曰靈甫，次曰競甫。衆甫皆守緒業，有名於代。劍南東川節度使兼御史大夫梓州刺史鮮于公，自受分闡之征也。初年謀始立法，二年人富知教，三年魯變於道，乃謂幕賓曰：陳文林散粟萬斛，以賑鄉人，得非司城子罕貸而不書乎？拾遺之文，四海之內家藏一本，得非臧文仲立歿而不朽乎？於戲陳君，道可以濟天下，而命不通於天下，才可以致堯舜，而運不合於堯舜。悲夫！昔孔文舉

爲鄭元署通德門。蔡伯喈爲陳寔立太丘頌。異代思賢之意也。況陳君顏閔之行。管樂之材。而守牧之臣。久闕旌表。何哉。爰命末學。第敘豐碑。表厥後來。是則是效。其頌曰。

有媯之後。封於陳國。根深苗長。世載明德。文林大器。質匪雕刻。學術鉤深。風鑒詣極。代公耿光。喬元藻識。施不求報。退身自默。岷峨降靈。拾遺挺生。氣總三象。秀發五行。才同入室。學匪獵精。明明天后。羣龍効庭。矯矯長離。軒飛梁益。封章屢抗。矢陳刑辟。匪君伊順。惟鱗是逆。九德未行。三命惟錫。帝命建安。遠征不伏。咨公幕畫。騁此驥足。惟王玩兵。愎諫違卜。忠言不納。

前軍欲覆遂登薊樓冀寫我憂大運茫茫天地悠悠
沙麓氣衝大陰光流義士養薇人誰造周嗟乎道不

可諧遂放言於感遇亦阮公之詠表辭右省來歸温

懷已而已而陳公之微意在斯清如何風樹不寧不令廬墓之側柴毀滅性管輅之

才管輅之命惟國不幸非君之病我鮮于公中肅恭

懿光明不融爲君頌德穆如清風日月運安江漢流

東不閉其文永昭文雄 唐大歷六年歲次辛亥

十月癸丑朔日建前監察御史趙儋撰

大唐贈揚州大都督段府君神道碑銘并序

巨唐大歷己未歲春正月段府君之子四鎮北庭涇

原鄭穎等州節度使開府儀同三司御史大夫張掖

郡王曰秀實追琢貞石光昭先考展孝思旌休烈也夫流澹者其源長德充者其後大更八姓而不膺五福府君其人焉君諱行琛字行琛宗周柱史垂其裔前漢都尉昌其業太尉之威懷戎落驃騎之光啓冀方四燕兩魏高位碩德扶踈於史牒者向二百人以至高門平原忠武王孝先弼亮北齊奄荒東夏恢武經而抗衡西帝揆文教而師尹南宮曾門德澹初罹否運播遷隴坻度地肯堂鬱爲望姓在周辟奉朝請入隋直文林館靖恭厥位獲沒先朝大父操握機未發早齡卽世考達從調夏官藝極龍豹致果爲毅職統熊羆皆保家之良主府君生知六行之美學究五

經之奧。旣齒鄉賦。高標甲科。簡脩獨耀於錦衣。從事
仍屈於黃綬。學有著位。我實當之。郡有子弟。我實誨
之。自隴及岐。鼎新儒行。雖東里子產。西蜀文翁。誠存
物應。蓋未之比。厥有成績。聞於家邦。厭名位而知止。
賁上園而用晦。我國家雖右斷匈奴之臂。時脩大刑
於絕漠之表。旁求百夫之持。永清萬里之外。府君顧
謂子張掖王曰。爾居能服勤。性成惟孝。出可承命。遊
且有方。虎穴不探。龜組何獲。爾之元昆介弟。可以供
指使。我之先人遺業。可以終餘齒。忠不擇事。安實敗
名。因剛慈以激昂。俾宣力以勤遠。君子謂府君。知愛
子之道矣。王投筆占募。馳驛徂征。坐籌必勝之畧。動

獲前禽之利。洎王宦登通貴。佐律副軍。銀章已綰。玉
關未入。府君溫其在邑。樂且有儀。九流百氏。經耳輒
誦。四憂十義。因心必達。然猶深居自珍。與物爲春。希
言中倫。知機其神。內葆光以恬真。外行簡以依仁。子
獲奉親之祿。欲養而不待。身寄有涯之生。遷化而無
愬。天寶九載。夏之季序。遘疾于汧陽御史里之第。乙
酉。奄歸無物。其季於斯。七十五稔。夫人樂平狄氏。吳
山縣丞哲第六之女。心婉志柔。靜專動直。承筐而繁
衍其實。主奠而敬恭。無忒下壽。初登先時。永逝。門子
祥穎。仲子秀成。季子同穎等。柴立長號。稽謀宅兆。明
年春孟序辛亥。遷皇祖及諸父之無後者。偕葬於隴。

山東麓柏谷掌。次列三墳。周施一域。送終之禮備矣。屬歲旅天朔。塵驚薊門。徵會沙場之右。殄殲鐵額之醜。王飛郵及國。擗地崩心。夷凶難遂於情禮。哭墓復隨於軍正。既清海裔。又牧回中。一莅疲人。荐彰丕績。廣德二年秋九月乙未。詔追贈府君祕書省著作郎。夫人太原縣太君恩深歿後之寵。慶表生前之訓。上又以王翊亮三節。綏御七戎。致位崇獨坐之班。成軍雪多壘之恥。大_歷十年夏五月。詔加贈府君婺州刺史。夫人太原郡太夫人。十一年冬。舊使尚書左僕射扶風郡王馬璘。溝疾弥留。表王請貞師律。詔仍遷御史大夫。既操二重之權。克施五利之策。平涼安定。曲

荷其亭育。先零罕開。遙服其威信。四封無聳。三務有成。十三年五月。命朝丹禁。面疆戎索。帝曰。朕翁孫也。俾寫真麟閣。橐駝而遣焉。及季夏壬寅。又贈府君揚州大都督。夫人忻國太夫人。榮親揚名。二美兼著。傳曰。子之能仕。父教之忠。詩曰。維其有之。是以似之。見於府君矣。雖封植無改。而銘頌未刊。過聽謬採。于芻蕘脩詞。愧陳于質要。銘曰。

於穆端士。神所勞矣。貞惠資身。義方訓子。育德無倦。狗名知止。宜其後昆。式是繁祉。繁祉伊何。後昆則然。西服戎胡。東定幽燕。殊勩克著。湛恩上延。贈光三錫。慶洽重泉。熊軾增寵。牛崗啓繇。北控沂源。西馮隴岫。

列塋如始。紀石增舊。淑德清規。終天永茂。

大歷

十四年閏五月庚午朔十三日壬午建朝。請郎檢校尚書刑部員外郎兼鳳翔少尹侍御史賜緋魚袋張增書朝議郎行鳳翔府天興縣尉李同系篆額。

故莫州長豐縣令李君墓誌銘

唐貞元三祀五月。故長豐宰李君丕。卒於幽州潞縣。嗚呼逝水。古今悲夫。公隴西人也。世襲軒裳。地清才幹。曾祖知禮。宣州司功叅軍。祖懷璧。汴州陳留縣丞。考許州臨陵縣令。公洒然深心。抱義育德。士林咸器重之。乃昌言薦於元戎。遂徵辟爲潞縣丞。佐理高標。令名遠著。後墨綬長豐。化百里之風。樂四人之業。

俄改任莫州司法叅軍。蘇息萌隸，鈐鍵姦譎。凡登仕
踐位，時議茂宰良掾也。每處其厚，不居其華。果行溫
良，發言砥厲。豈期餘慶罔祐，而禍兮有階。故鵬鳥作
孽，二豎爲祟。沉疾於故林私第，即代之日。春秋六十
有三，無嗣。夫人元氏，晝哭靈帳，恨無三從，傷肝膈之
痿憤，痛終身之惻獨。長女適河東柳氏，名峴，試太常
寺奉禮郎，感深仁之厚恩，盡半子之禮節。力窆棺櫬，
手植松楸，扶塗車，封馬鬣。粵三年建子月，葬於縣之
南三里潞水之右，託一片之琬琰，紀平生之徵獻。俾
山壑之變風烈有遺，而爲銘曰：
屹然孤墳，長城之東。死生永隔，天地不同。吁嗟英靈，

窮泉之中悄悄原野。旦暮悲風。

石在通州文昌殿壁。近年出土。見州志。

唐吳郡張常洧紀孝行銘碑

唐

孚

君名常洧字巨川句曲人也其先奕世載德賜姓受氏詳乎家牒炳乎國史矣在昔宣王時則有若張仲孝友周人美之列於風雅在悼公時則有若張老恢晉國之圖拯魏氏之急魯史嘉之編於載冊高祖伯卿曾祖克紹並怡情墳典抗志不仕祖處靜皇湖州烏程縣令考璋皇建州司戶君即建州之第四子也幼而聰明長而岐嶷窮百行之源事父母以孝稟五常之性奉親族以和及父母既歿居憂泣血柴毀骨立躬自建冢高數尋手植奇樹盈千餘本然志戀墳

塋終身洒掃。雖喪紀踰制。而靡釋衰經。乃葺結庵居於墓次。哀動行路。感通神明。白鶴翔於林中。靈芝生於墓側。鄉黨稱其孝。郡邑嘉其行。錄表上聞。優詔允答。復其徭役。旌其倚廬。三紀於茲。情猶一日。居嘗疾困。殆不勝喪。勺飲不入口者累日矣。其兄常泳勸令飲食。堅執不從。兄謂之曰。有疾飲酒食肉。在禮自有明文。蓋無以死傷生也。今汝異居幽荒之際。而即安於疾。殆至滅性。又焉得爲孝乎。乃曰。吾負終身之憂。匪惟一日之戚。且吾有兄。不患死之將至。兄有子。不患祀之將乏。身旣不賴其生。口豈復食其味乎。君子曰。甚哉。張氏兄弟。孝友之至也。非令弟無以知兄之

賢非仁兄無以成弟之美所及其遠哉上以彰聖朝
孝禮之至中以表牧宰教化之極下以明張君錫類
之永此一行也而二善成焉乎雖庸愚備知盛美竊
以寵錫之命雖行於門閭紀述之詞曾未標於篆
刻敢直書其事識之貞石焉銘曰

天錫嘉命保佑我唐篤生張君令名是揚令名伊何
純孝克彰終身在戚執親之喪獨居幽荒廬墓之側
喪制既踰哀情罔極衰經弗離甘旨靡食疾苦嬰身
志行不忒節彼高墳巍然如崗草木呈瑞鸞鶴表祥
孝感之至達於聖皇詔命旌美殊其井疆勒名紀行
於門之旁千秋萬祀斯風不忘

集古錄有唐孝子張
常洵旌表碣云文字

磨減僅可見其髣髴注貞元五年考孝子父建中四年癸酉歿廬墓六年以明年貞元五年己巳立此碑也別有咸通十三年碑予在句容張氏義臺得其殘石一片後有潤州句容縣令呂倕及咸通十口等字寶刻類編載張府君旌表碑唐王承福書雷珍題額咸通十三年引諸道石刻錄即其碑也今張氏之裔棄于階下自余拓本以存故迹惜不得其全文併載於此碑所謂節彼高墳者今在義臺西北後人不知是張氏父母葬處指為古冢又為街道民居隔絕僅以廬墓處為孝子祠耳

周氏墓誌銘

唐王 紳

夫人姓周氏其先汝南人也爰自炎漢達於有唐縣歷衣冠其來尚矣曾王父府君珪皇承務郎勅授薊州三河縣令王大父府君歸皇宣德郎試左贊善大夫賞緋魚袋兼上柱國王父君彥皇彭城郡高望府折衝賞緋魚袋兼上柱國皆業崇儒行世繼簪組問

次門慶逾長。夫人則折衝府君之長女。幼年貞柔。至性純孝。凜乎正氣。賢行自天。雅量絕儔。風見難並。適佐君子。令淑尤彰。雍睦承家。母儀增書。是以儉恭聞惠和。不以鉛粉益容。但以禮節資德。時貞元辛巳歲。寢疾於莫亭。集賢里之私第。伏枕逾月。醫無所爲。以其年五月十三日。奄從於化。享年四十八。嗚呼。天命數盡。生也有涯。哀哉。哲人。何不爲壽。瑤琴絕聽。寶鏡休窺。珍玩滿室。莫之能守。親戚彌切。痛無偕老之期。岐路感傷。嗟有懷仁之德。以其年冬十一月八日。卜兆於鄭城東南二十五里。世業平原之禮也。案盧文弼抱經

堂文集有天寶六載唐故義興周夫人墓誌銘跋曰誌後云以茲吉晨赴杜城東郊之禮也余初疑句有

脫字及觀大歷間光祿卿王訓墓誌亦云遷厝萬年
縣澆水鄉澆水原之禮也則當時自有此文法此碑
云云亦與彼同例雲結長川風悲草樹嗣子操次子摸並殘
骸毀容能竭孝道慮恐陵谷將變歲序將遷刊石紀
時其銘曰

郡城東南兮滹水湄歲往月來兮無盡期明明寒月
兮對孤壠蕭蕭白楊兮悲風吹

唐莫州唐興軍都虞候兼押衙試鴻臚卿鄭府
君墓誌銘

府君諱玉字廷玉本滎陽人也其先因官得地曾祖
亮皇莫州司馬祖備涇州四門府折衝王父泰遊擊
將軍守左武衛大將軍試太常卿咸以文武兼才應

當時之選府君鄉舉孝廉弱冠從事有救世之才軍府推稱以政狀聞於本道時表奏授宣義郎試恒王府司馬權充本州孔目判官吏不敢欺人樂其業時歲儉人飢多盜世亂思理須得其人遂屈充唐興軍左虞候以屏盜賊擒奸摘伏撫弱遏強井邑肅然論功授秩累有拜遷官至鴻臚卿職竟都虞候自主局向三十年閭里懷其仁鄉黨服其義犬不夜吠衣錦晝行水鏡居心不假灰猪以辨僞臨事明斷有同跪鼠以懲愆衆稱才用無窮又拜牙門將內外瞻矚文武繩準洎貞元十七年旌麾撫臨錄侯掩之錫重始終之節賞衣一襲錫馬一匹以其州在關外賴之

襟帶委以守禦。無遷易也。鄉人改觀。閭里拭目。昂昂乎固一時之傑也。豈期二豎爲災。奪人之願。以貞元十八年十二月十九日寢疾。終於鄭亭。春秋六十有八。邑悲巷哭。春不相杵。夫人河閒邢氏。以貞元二年三月四日。先府君捐世。享年四十有八。銀青光祿大夫。檢校太子詹事殿中侍御史。讓之孫。平昌縣令。璿之女。適配君子。義不失於三從。奉事舅姑。禮乃全於四德。爲六親軌範。作三族楷模。得女適人。而宜室。生男至孝。以承家。皆夫人餘慶之所鍾。府君義方之所教也。嗣子惟興等。痛乎松檟未樹。歲月遄臻。先遠有期。不敢違卜。奉以貞元十九年歲次癸未十一月戊

寅朔十三日庚寅，祔於州城南二十五里顧義鄉三方之原。禮也。是日也，素車隨紼，白馬臨棺，雲慘寒天，風悲野樹，恐陵谷變遷。銘以誌之。辭曰：

平原四顧，兮塚壘壘。左枕故園，兮右滹水。嗚呼鄭君兮，來宅此。白楊蕭蕭兮，莫風起。何嗟原夜兮，自有明珠兮，照千里。

清河張府君墓誌銘

唐柳宗元

貞元二十年六月一日，清河張公諱曾，寢疾即世於莫亭嘉深里之私第，享年七十六。自屬纊至於移窆，朋從親暱，州里士君子，無不慟怛。嗚呼仁賢之云亡也哉！惟公受姓黃而分，歷代茂盛，源流益別，公

即清河之緒。曾祖皇太子諮議郎諱崇。祖皇中府折衝諱操。父皇太子內直郎諱公。即內直郎嗣也。早歲有節克壯。心拳拳禮容。執無倦。逮夫弱冠。遵道秉義。汪汪然不可得而親。不可得而友。挺出常度。機畧內蘊。時薊州刺史御史中丞榮公。公才最以從事。情以道契。三捐而進。受靜塞軍營田判官。恭儉蒞職。勲績明著。甄錄奏聞。受遊擊將軍。守右領軍衛幽州開福府折衝都尉員外。置同正員。賜騎都尉。公踈勢賊諂。心不苟合。恬淡爲頤年之用。視簪組爲伐性之具。遂辭名晦跡。高卧雲物。因家於三河邑。背郭而東。得林巒之勝致也。暨乎年逾不惑。以長子

瓊佐鄭亭候嘉聲洋洋多歷年數由是閱實觀政巾
車以來郡邑清暢禮容大備■釋我願斯不返駕每
■道人貞士談真空微妙之性探■原迷頤之旨浩
浩方寸洞豁塵境不其致歟嗟乎大道無涯天命有
定雖聖明不能越常運而超物外哉公以疾起無妄
情不嗜藥顛顛居易悔咎莫有星歲幾同大漸長往
嗚呼天富其道而闕於壽謂之何哉夫人北平田氏
■而得禮有子二人瓊等卜祔先塋龜筮告吉以其
年十一月一日窆於任丘東北長丘鄉原禮也二嗣
號擗痛深泣血哀告以先遠有期請以誌之宗元承
命不忤刻之貞石銘曰

蘭茝其馨。金玉其貞。碎而折之。何神不明。茂旌其英。德立行成。悠悠銘旌。洋洋懿聲。孝子令孫。宅兆郊原。龜筮叶從。慶流後昆。柳子厚文集無此文。河間府志云字多缺。泐錄在任。上舊志邑人謂今其碑石尚存。長豐寺陷置壁間。

唐故朝議郎檢校尚書戶部郎中兼襄州別駕

上柱國韓昶自爲墓誌銘并序

昌黎韓昶字有之。傳在國史。生徐之符離。小名曰符。幼而就學。性寡言笑。不爲兒戲。不能闇記書。至年長不能通誦得三五百字。爲同學所笑。至六七歲未解把筆。書字即是。性好文字。出言成文。不同他人所爲。張籍竒之。爲授詩。時年十餘歲。日通一卷。籍大竒之。

試授諸童，皆不及之。能以所聞曲問其義，籍往往不能答。受詩未通兩三卷，便自爲詩。及年十一二，樊宗師大奇之。宗師文學爲人之師，文體與常人不同。昶讀慕之，一旦爲文。宗師大奇其文中字，或出於經史之外。樊讀不能通，稍長，愛進士及第。見進士所爲之文，與樊不同，遂改體就之。欲中其彙，年至二十五及第。釋褐，柳公公綽鎮邠，辟之。試宏文館校書郎，相國竇公易直辟爲襄州從事，校書如前。旋除高陵尉。集賢殿校理，又遷度支監察，拜左拾遺。好直言，一日上疏，或過二三文字之體，與同官異。文宗皇帝大用其言，不通人事，氣直不樂者，或終年不與之語。因與俗

乖不得官。相國牛公僧孺鎮襄陽。以殿中加支使。旋拜祕書省著作郎。遷國子博士。因久寄襄陽。以祿養爲便。除別駕。檢校禮部郎中。丁艱服除。再授襄陽別駕。檢校戶部郎中。大中九年六月三日寢疾。八日終于任。年五十七。其年十二月十五日葬孟州河陽縣尹村。娶京兆韋放女。有男五人。曰緯。前復州叅軍。次曰綰。曰緄。曰綺。曰紘。舉進士。女四人。曰茱。曰谿。曰當。曰著。在室。曾祖叡。素朝散大夫。桂州長史。祖仲卿。祕書省祕書郎。贈尚書左僕射。父愈。吏部侍郎。贈禮部尚書。諡曰文公。銘曰。

噫韓子。噫韓子。世以昧昧爲賢。而白黑分衆。以委委

爲道而曲直辨，生有志而卒不能就，豈命也夫。豈命也夫。孤子綰書并篆。

唐故滎陽鄭府君夫人博陵崔氏合祔墓誌銘

并序

唐秦貫

鄭之先自周王封舅之地，因而氏焉。別派五流，深源一至，是以滎陽之望，得爲首冠。其下公侯接武，台衡繼迹，雕軒繡軸之榮，羽蓋朱轡之盛，由魯史記，迄於唐春秋，實鄭氏爲衣冠之泉藪也。高祖世，斌皇左司郎中，磁隰二州刺史，新鄭縣開國男，食邑三百戶。曾祖元嘉，皇新都長水縣令，襲封新鄭縣開國男。祖有常，皇吏部常選，襲爵新鄭縣開國男。烈考探賢，皇衛

州昌樂朝城莘縣令。府君諱遇字■皇試太常寺協律郎。文業著於當時。禮義飾於儒行。少有個儻之志。長負瓌竒之名。不苟譽以求容。每親仁以竭愛。爲中外模範。成友朋宗師。樂善孜孜。不愠知鮮。量苞江瀆。氣合風雲。今之古人。人雖上出。神不優德。配壽胡差。先夫人之亡。蓋世一霜也。享年六十。夫人博陵崔氏。令門清族。慶餘承善。四德兼備。六親雍和。仁讓得於天真。慈惠立於素尚。母儀內則。動靜可師。禮行詩風。進止成法。雖婕妤女史。大家經教。承之於諷習。推之於行源者。亦異代殊人。其歸一旨。未亡之歎。孀齡杳然。玉没何先。蘭然遽至。以大中九年正月十七日

病終於淇隩之私第。享年七十有六。以大中十二年二月廿七日。合祔於先塋之側。其鄉里原隰之号。載於舊記。此闕而不書。女一人。適范陽盧損之嗣。子六人。長曰頊。攝汲縣丞。知縣事。早亡。次曰珮。早亡。次曰瑾。次曰玘。次曰璩。次曰琬。咸繼以遺芳。克修至行。銜哀茹毒。追攀罔極。將營護。空泣告於業文者。爲之銘云。

仕門雙美兮。令德咸芳。甲族齊茂兮。英華克彰。允文武兮。書劔名揚。蘊儀度兮。閨門譽長。珠沈玉沒兮。人誰靡傷。桂殞蘭凋兮。共泣摧香。垂修名兮。允謂不亡。傳事盛兮。多載彌光。聽悲風兮。松韻連崗。刻貞石兮。

永志元堂。

給事郎試太常寺奉禮郎攝衛州司

法參軍秦貫撰。

又一碑鄭遇作鄭恒疑後人所改。

後魏洛州刺史侍中兼太師昌黎馮王新廟碑

唐馮元德

王諱熙字晉國冀州長樂人也。伯祖諱跋建國北燕傳位於昭成皇帝諱宏即王之烈祖也。魏太武帝滅北燕徙其家屬於代。王以帝者子孫遂交婚於魏室。魏文成帝納王妹爲后。即文明太后是也。王尚博陵長公主。以敦慎博愛。歷事三朝。累拜冠軍將軍。侍中。中書監。太傅。太師之任。進爵昌黎王。及魏孝文帝即位。前後娶王三女。且二爲后。一爲昭儀。文明太后臨

朝王以師傅之重，寵極禁壺，內不自安，求外任，爲洛州刺史，侍中太師如故。洛陽經永嘉大亂之後，宮寺毀廢，王爲政仁恕，而酷信釋教，凡出俸祿於諸州鎮，建佛圖精舍，合七十二處。今之廟地，舊建北邙寺，乃其一也。今佛圖基址尚存，其寺碑文中書侍郎賈元壽所製，孝文每登寺讀碑，嘉歎不已。後徵歸代，遇疾而薨，屬遷居洛京，遽詔有司爲辨喪事。公主先薨，命開其墓，併二柩俱向伊洛。皇太子赴代迎弔，將葬，贈假黃鉞，侍中督十州諸軍事，大司馬太尉冀州刺史，加黃屋左纁，備九錫。前後羽葆鼓吹，有司奏謚曰武孝文，爲撰誌銘，纓服親臨墓所。以前魏書備載其事。

但不言封樹之處。及廟立之由。墓與廟當不相遠也。其廟豈州人思王之德。衆所建乎。不然。寺沙門所置也。至今爲洛北之望祀。年代寔遠。雖牲牢日享。而室壁侈頹。大中六年六月。洛之豪族孟州長史焦宗美。特捨家財。大新厥宇。兵衛儼列。廟貌益崇。愚別墅寄温谷川。東走十里。直王之廟。每見遠近里社。坎鼓啾管。以趨之。及問王之名位爵邑。皆失其傳。乃乘暇謁拜。碑板堙滅。莫識何從。退尋家牒。考於魏史。是知即愚之十二代祖也。伏念甘棠勿翦。邵德實思。若非績化。深洽民心。即何能五百年之後。而血祀不絕乎。恐盛烈沈翳。無復彰明。不敢多文。遂斲石重紀。

大

唐咸通八年歲次丁亥十一月壬子九日甲辰刻。十
二代孫鄉貢進士元德述弟進士元度篆額弟進士
元錫書。十二代孫元規元貺元範元質元靜并前八
人同建立孫璋鐫。

唐故左拾遺魯國孔府君墓誌銘并序

唐鄭仁表

咸通十五年三月侍講學士右僕射太常孔公以疾
辭內署職其元子左拾遺養疾亦病逾二旬太常公
病少閒拾遺疾亦閒又旬日太常公薨拾遺哭無時
後七十六日亦終嗚呼求諸古未聞也仁表與拾遺
同歲爲東府鄉薦策第不中等再罷去明年偕宴於

東堂宴之日。博陵崔公蕤出紫微直。觀風甘棠下。表
爲支使。校芸閣書。拾遺始及第。乞假拜慶。新進士得
意歸去。多不伏拘束假限。往往關試不悉集。責曹久
未畢公事。故地遠迨二千里。例不給告。時僕射太常
公節制天平軍。以是勤不得請。拾遺曰。人之多言。必
以我爲宴安。訖春不宴。年少乘喜氣。赤春頭。竟不對
狎客持一盃酒。人以爲難。關試日。都堂中捐別同年。
徑出青門外。經所爲從事州。入院判案。十日東去。府
適罷賢諸侯爭走羔鴈。馳弓旌。竟不能致。徵爲渭南
尉。直(宏)文館。久之。會大學士出將。聲去竟不就。僕射太
常公罷鎮居洛中。拾遺伏安定省。不嘗言仕宦。旋以

萬年尉復怙文職無西笑意僕射徵拜司戎貳卿拾遺由侍行乃赴職越一月今許昌太傅相國襄陽公爲河中奏署觀察判官假監察御史故事赤尉從相府得朱紱殿中公昆仲間有未至者求裏行官不改服色人人美譚之俄轉節度判官從知之道皎然明白和而不柔守而通內盡匡補而外若不知相君待之異禮俄拜左拾遺內供奉嗚呼止於是何也春秋始卅三矣惜哉公至性自生知雖欲全其禮傳於後開強忍抑不能俯就始得疾不言於人因晡哭若絕左右始知有病句甚矣句卧堊室中不復進饘餌疾益亟方旬歸常所居舍悉召骨肉迨僕使唯言僕射

公葬時事。指揮制度。必以古禮。戒誨約束。委曲備悉。左右皆泣。公曰。吾平生無纖小不是事。天報我甚厚。使亟得歸侍地下。尔盍賀而返。以泣耶。吾自遂性。不能無傷生。全大孝。送終設祀。宜益儉削。無以金鉛纖華爲殉。無以不時之服爲殉。吾幼苦學。尤嗜左氏傳。所習本多自讎理。宜置吾左右。友人鄭休範。多知我所執守。相視若親弟兄。我亦常以所爲悉道之。請以誌我。彼不能文。必盡其實。言竟。撫弟妹。若將千百里。爲別者。視妻子。若將一兩夕。不面者。而怡然其容。如有失而復得。已而終。嗚呼。其喜歸侍乎。公謝世之月。餘日前。與二季處閤室中。忽援毫書廿八字于室內。

東展之上。若隱語而加韻焉。曰許下無言奪少年。震而不雨。月當弦。風濤渭逆。舳艫沒。從此無舟濟大川。初。玉季載考其義。莫究指歸。既痛絕手足。若洗然而悟。曰許無言。是午字。今歲在午也。震不雨。是辰字。其哀瘵至甚。移歸院就醫。是辰日。及■奄然之日。驗於官^①。歷是上弦日。又應月當弦之讖也。吁。似有所潛受於冥昧閒。何懸知之若是也。憶於洛陽里第。始相與定交。公曰。何以契我。余曰。死患難。先祿位。託孤寄命。同休共感。此義交也。見善相勉也。見利相遠也。言之而必行。守之而必固。一旦離此。則攻而絕之。使處世爲正人。沒身無怨言。斯益友也。余將與吾子契之。自

是過必相攻。善必相激。相成如恐失。相畏若臨敵。雖朝夕共行止。人不以爲朋比。亦君子之能賢善誘也。嗚呼。公之文之學之精明。道行如雷聲日光。無耳目者。則不知也。公之計始聞。人人如有亡。碩生鉅賢。心死氣脫。道之不行也。天何心焉。公諱紆。字持卿。魯司寇。四十四代孫。繼繼承承。世濟不墜。閒生傑出。磊落相望。曾祖岑。父皇任祕書省著作佐郎。贈司空。祖戮。皇任禮部尚書致仕。贈司徒。父溫裕。皇任檢校右僕射兼太常卿充翰林侍講學士。冊贈司空。皇妣河東薛氏。族大而顯。先司空公廿八年即世。公娶京兆韋氏。山東清甲家也。有二子。男曰鐵婢。始十歲。甚肖似。憶

與公約生子命名必如兄弟愚之子曰後魯他日鐵
婢當以還魯字之易云積善之家必有餘慶善之教
必闡於道儒釋釋固無嗣皇家公家道儒之餘慶也
公又賢而無祿其後益大以昌女少於男銘曰

嗟嗟夫君嗟嗟夫君孔聖遺允顏回後身高高者天
幽幽者神幽幽不見高高不聞不見不聞又何足以
云云
鎮海軍節度掌書記將仕郎殿中侍御史

內供奉賜緋魚袋鄭仁表撰并書

案唐書載鄭肅子仁表以門闕文章

自高曰天瑞有五色雲人瑞有鄭仁表選家多未載
其文此碑是其撰文書石文既不佳字亦如常存之
以質後人知誇大之過情也碑中有旁注云去聲又
云句者二處亦前人未有之體餘唯杜順和尚行記

復見下旁注
胡甸反耳

唐故清河郡張氏夫人墓誌銘 唐孫 珣

噫夫人姓張氏其淑慎貞素稟自生知退讓儉遜不從於訓祇奉晨夕終始若一吁言乎不豫葬我私室蘭摧春霧蓮墜秋風隙影難迴逝波不返男一人高姐電影未分槿花已落女二人長曰奴哥穠花未開嚴霜暗墮次日郭兒卅髮未摠繼我門嗣夫人年四十有三以景福元年冬十二月二十日卜兆於府城之南雲門之下樹丘隴而銘銘曰

日月有度兮生死無常白晝其速兮元夜何長澠水爲鄰兮雲門是鄉千年萬祀兮春露秋霜 夫樂安郡孫珣述

時景福元年歲次壬子十二月辛未朔二十日庚寅
孫珣紀。

陳公神廟碑

唐齊光乂

在昔隋氏喪君齊人乏主代厄淪胥我大將運匡救
之謀先州里之義存乎蔽捍用伺昭蘇初志未躋良
圖奄墜災生福始遺恨如何公諱杲仁字世威誕受
丕祉其昌來裔有媯之後人莫與京洪惟發靈乃降
時傑鼎角匿犀之異雄深魁武之姿貫藝造竒無所
不至立能事於艱虞之際建殊蹤於混亂之秋韞義
生風鼓動流俗全吳之地幸賴以安招定鄰邦輯寧
徒旅江湖嚮應懷赴如歸沈法興率衆而來假我鼻

息初規景附末肆傾夷因何匪仁暴戾斯甚自遺覆
敗竟取淪亡至於敘官遊歷系業事咸不朽跡著無
方名與日月輪迴功隨載籍舒卷已詳於宣法師所
製寺碑若乃生志未盡餘勇仍存息氣沴於疵癘降
精靈於巫覡物靜裁異時無天昏人到於今罔不懷
德每以公之諱日爰伸仲夏之中展祀建齋所在充
遍雖掃地以祭且貴慤誠而廟宇未崇寧昭節敬邑
老慶州都督府永清府左果毅都尉上柱國賜緋魚
袋張智景與福業寺長老義先等聚族而謀發言同
人不召而萃邑中之衆實慰我心疇其經營委以財
物始則運思而斲之丁丁終於用成而新廟奕奕座

盈神氣。侍列鬼雄。威深沈。以肅然。狀煜爚。而疑動。有以底明。祇之位。有以昭介。祉之儀。及夫沐蘭湯。奠椒醕。揚枹拊鼓。緩節安歌。華彩服。與瓊芳。會陳巫。與楚舞。求非曲禱。祀必正辭。無紛若之言。致馨香之信。由是上感宸心。旁追祀典。降中使。被懷濡。聖澤覃溥。天光照爛。豈秦祠漢享之類。可得同乎。浹逮下之祈。演無疆之助。或飲食有訟。或契文不明。凡百無良。深衷莫辨。微見誠請。立彰其效。負者乃凶。竟貽潛匿。攘諍掩息。望境自清。比夏積憊。陽秋淫淫。雨捨我穡事。妨於農收。至於三。至於四。時其賢守李公行。穆民勤卹之意。傍徨匪寧。率領官屬。長史李公昌。岨司馬丘公。

從心。晉陵縣令岑公况。武進縣令何公據等。果至虔誠。景刻俱應。澤及千里。無所不周。使君涵道德之尊。豐惠和之厚。艱難之辰。晏然無事。豈不以忠信於物。而昭明於神乎。本宰何公。學以入政。優于子人。深撫育之恩。流清白之稱。咸思善貺。冀荅宏慈。神之聽之。庶同景福。今餘寇未寧。尚煩剪滅。神而助順。靈其運乎。昔者聖王之制禮。能禦大災。能捍大患。以勞定國。以死勤人。則所必祀。而明德報功。大將生爲司徒。足以主世地。歿爲貴神。足以鎮邪惡。閭閻綏祐。存亡以之。斯所以榮尊故鄉。廟食舊國。宜矣。勒懿跡。篆豐珉。延光表美。寧可闕歟。光又策名清時。亞位書府。宦遊

日久遲暮言歸竊井邑之譽忝文章之目魯無君子
斯焉取斯以爲傳芳金石不可妄也郡司錄裴公導
翰林之寶辭推典麗請以頌記其銘此君爲之文曰
烈烈司徒爲王爪士勇冠諸軍義先州里三綱砥節
百行推美所謂伊人南國之紀天厭火德運歸黃祚
肇闢乾關未康國步鯨鯢振海楔窳交路偃草江干
惟夫子故矛鋌挺擊萬里長城旌旄血灑劍鏑風生
夸者貨首同焉盜明雄心不竭終古英靈依然甲第
尚想陳跡庭變金地祠開瑤席曰雨曰霽推誠邦伯

案咸淳毘陵志碑碣門云司徒神廟碑乾符三年集
賢院學士齊光又撰據此知碑原有年月名銜武進
縣志未載無以補全也又案銘詞每段四韻而
未段跡席伯僅三韻亦不完蓋以下皆脫去矣

大唐威武軍節度福建管内觀察處置三司發
運等使特進揀校太保同中書門下平章事
使持節都督福州諸軍事兼福州刺史上柱
國琅邪郡王食邑四千戶食實封壹百戶王
審知德政碑銘

唐于競

粵自範金合土之制。雲師火紀之名。禹別九州。堯咨
四嶽。莫不東求良輔。宏濟兆人。彰克勤克儉之能。垂
可久可大之業。嗣大叔寬猛之政。循仲尼富庶之言。
旣茂勲勞。宜標篆刻。公名審知。姓王氏。瑯琊人也。其
胙土命氏。䟽源演派。代濟其美。史不絕書。後以太祖
就祿光州。因家於是郡焉。曾祖友。贈光祿卿。王父蘊。

玉贈祕書少監。父恁，贈光州刺史。繼贈太尉。公即太尉之季子也。初，公兄潮，志尚謙恭，譽藹鄉曲，善於和衆。士多歸之。福建節度使陳巖，旣嚮其名，又以所屬泉州求牧，乃遣禮而請之。及到任，頗著嘉聲。後巖在軍，病甚，不能視事。軍士等懼無統御，皆願有所依從。泉牧遂以郡委於仲弟審邽，而與公偕赴。至則積惡者屏去，爲善者獲安。因詔授節度使，累加檢校右僕射。於是剋其訛弊，整其章條。三軍無譁，萬姓有奉。乾寧三年，僕射遘疾，且付公以戎旅。仍具表奏，尋加刑部尚書、威武軍留後。俄授金紫光祿大夫、右僕射、本軍節度使。公器局端雅，識理融明，稟崧嶠之真精，得

圮橋之妙畧。及膺帝命。寵陟齋壇。細柳連營。旌旗動色。蒲盧蒞政。草樹逢春。一年而足。食足兵再。歲而知禮。知義。方隅之內。仰止攸同。曩以運屬艱虞。人罹昏墊。農夫釋耒。工女下機。公既統藩垣。勵精爲理。強者抑而弱者撫。老者安而少者懷。使之以時。齊之以禮。故得汙萊盡闢。雞犬相聞。時和年豐。家給人足。版圖旣倍。井賦孔殷。處以由庚。取之盍徹。夫述職之道。底貢爲先。九丘爰序於厥苞。伍伯是徵於縮酒。雖甸服之近。江漢之中。或遇阻艱。亦絕輸賦。惟公益堅尊獎。慎守規程。松柏後凋。風雨如晦。地征旁午。天庫充盈。共仰勤劬。咸知匡戴。常以學校之設。是爲教化之原。

乃令誘掖童蒙。興行敬讓。幼已佩於師訓。長皆賞於國庠。俊造相望。廉秀特盛。閩川以南。地惟設險。人尚爭雄。或因饑饉。荐臻或以刻剝爲苦。萑苻易聚。巢穴難探。公感之以恩。綏之以德。且曰。吏寔爲虐。爾復何辜。示以寬仁。俾之柔服。遂使數十年之氛祲。遽致廓清。一千里之封疆。旋觀昭泰。張網以單車入壘。虞詡用絳纒擒姦。以古況今。彼猶懷愧。爰自天寶艱難之後。經費實繁。聚斂之臣。名額滋廣。即山鳩利。任土庀財。峻設隄防。頗聞賙贍。洎纏烽燧。仍患崎嶇。三司之職務空存。四海之輪蹄鮮至。公按其程課。令以權衡。盡叶舊規。尤彰宏業。而又奉大雄之教。崇上善之因。

象法重興。導師如在。虹梁雕拱。重新忉利之宮。鈿軸
牙籤。更演毘尼之藏。而又盛興寶塔。多捨淨財。日麗
飛甍。霞攢彩檻。頑豔迴向。遠邇歸依。用俾羣緣。皆同
妙果。佛齊國。雖同臨照。靡襲冠裳。舟車罕通。琛賫罔
獻。者亦逾滄海。來集鴻臚。此乃公示以中孚。致其
內附。雖云異類。亦慕華風。宛土龍媒。寧獨稱於往史。
條支雀卵。諒可繼於前聞。自燎熾西秦。烟飛東觀。魯
壁之遺編。莫掇。周陵之墜簡。寧存。亟命訪尋。精於繕
寫。遠貢劉歆之閣。不假陳農之求。次第籤題。森羅卷
軸。夫四鄰共守。蓋當偃草之期。七德方修。必假禦衝
之備。是以恢張制度。固護基局。程功而莫匪子來。作

事而適當農隙立崇墉之百雉表巨屏於一方巖邑
湯池曾何足數折筮縈帶固不可憑未若暫勞致茲
永逸兵戈荐起帑庾多虛凡列土壇悉重征稅商旅
以之而壅滯工賈以之而殫貧公則盡去繁苛縱其
交易關譏鄽市匪絕往來衡麓舟鮫皆除守禦故得
填郊溢郭擊轂摩肩竟敦廉讓之風驟覩樂康之俗
閩越之境江海通津帆檣蕩漾以隨波篙檝崩騰而
激水途經巨浸山號黃崎怪石驚濤覆舟害物公乃
具馨香黍稷薦祀神祇有感必通其應如響祭罷一
夕震雷暴雨若有冥助達旦則移其艱險別注平流
雖畫鷁爭馳而長鯨弭浪遠近聞而異之優詔獎飾

乃以公之德化所及。賜名其水爲甘棠港。神曰顯靈侯。與夫召神人以鞭石。駢力士以鑿山。不同年而語矣。於戲。辨貞金於大冶。認勁草於疾風。不有良臣。誰康澤國。尋就加平章事。檢校右僕射如故。腰懸相印。手握兵符。益壯軍聲。弥新殊渥。又改光祿大夫。檢校司空。轉特進。檢校司徒。然而物議輿詞。功厚賞薄。以爲爵祿未稱。疇庸於是。異姓分封。仍加井邑。轉檢校太保。瑯琊郡王。食邑四千戶。食實封壹百戶。公之仲兄審邽。自守泉郡。一紀於茲。黠馬皆調。疲人盡泰。公性惟雍睦。氣稟溫和。韻契墳簞。政侔魯衛。可謂高明輝映。超絕一時者也。公以天下兵馬元帥。太尉。中書

令梁王勲格穹昊德服華夷奉大國之歡盟爲列藩
之表率今節度都押衙程贇及軍州將吏百姓耆老
等久懷化育願紀功庸列狀上聞請議刊勒元帥梁
王以公如河誓著匪石情堅累貢表章顯陳保證朝
廷冀宏誘勸特示褒揚將建龜趺合徵鴻藻兢謬居
清列曾乏雄文頃歲常詠皇華往宣宸旨已於視聽
親飫徽猷今之執簡濡毫得以研精覃思備陳懿績
實無媿詞乃作銘曰

日月麗天舟楫濟川內外克乂股肱惟賢淮水長清
緱嶺方寧慶隨祚遠材爲時生伯氏雄特泉人仰德
求瘼斯勤頒條有則冠軍被疾付以師律政教翕張

士庶寧謐。懿彼閩越。帥實英傑。地列周封。心馳魏闕。
聖澤汪洋。元戎啓行。有典有則。爲龍爲光。高懸秦鏡。
理道自靜。比屋懷仁。連營稟令。航海梯山。貢奉循環。
務其輸委。毋憚險艱。周征之術。公田什一。約以有程。
守而勿失。輕徭薄賦。謳歌載路。高掩龔黃。遐追召杜。
鄉校皆遊。童蒙來求。雅道靡靡。儒風優優。惟虺吹毒。
久依山谷。罔恣陸梁。竟忻柔服。法寶梵宇。勝因所主。
崇構斯精。福慶攸聚。佛齊之國。綏之以德。架浪自東。
驅山拱北。墜簡遺編。繕寫精研。麟臺矗爾。武觀森然。
畚鍤其勤。雉堞連雲。永制爾敵。用壯我軍。關譏不稅。
水陸無滯。遐邇懷來。商旅相繼。黃崎之勞。神改驚濤。

役靈祇力。保千萬艘。劉驥荀龍。墳箎雍雍。惟邦維翰。
以侯以公。元帥梁王。武步龍驤。挺彼七德。削平四方。
公能事大。推心斯在。風雨無渝。歲寒不改。殊勛茂績。
盡瘁宣力。國之丹青。邦之柱石。位冠台鼎。任隆兵柄。
重以徽章。寵分異姓。優詔銘功。萬古英風。貞珉是勒。
垂之無窮。 天祐三年丙寅歲閏十二月一日准
勅建銀青光祿大夫行尚書禮部侍郎上柱國臣于
兢奉勅撰將仕郎前守京兆府鄠縣尉直宏文館王
倜書。

唐儒林郎試大理評事行幽都府路縣令邊府

君墓誌銘

唐邊魯

惟丙戌之歲仲商之月。又十六日。嗚呼。我先伯父長官。遘疾傾殂於故里。以其月二十四日。攢塗於正寢。欲詢逾月之制。得以送終。繼逢逐鹿之秋。未遑安厝。縣聯歲序。可得而知。粵有朝議郎試大理評事前行鄭州鄭縣令兼侍御史。賜緋魚袋。慎竒。光祿大夫守刑部尚書行御史中丞。上柱國。陳留縣開國伯。食邑一千五百戶。歸讜。即長官之弟姪也。念深同氣。痛切嚴書。因感義於鵲鷓。遂撫心於霜露。特齋餘俸。卜葬先靈。乃謂諸姪孫曰。方今海宇謐寧。三農告隙。俾營遠日之禮。貴就叶龜之吉。若非刊勒。莫紀聲容。其所誌銘。汝當論撰。罔遺其善。弗虛其美。魯仰奉明誨。難

愧匪詞。追往質今。對揚實錄。謹敘長官。姓邊諱敏。字德成。其先陳留人也。本枝百世。代不乏賢。或魚符而列職。或墨綬以聯芳。王父諱行存。順州司馬。神情磊落。閒氣深沉。抱環偉之竒才。蘊中和之至德。妥鍾厥後。實曰俊明。烈考諱承遇。任丘令。孝治承家。溫公秉性。蒞事每勤於夙夜。臨民恒示於愛威。而教彼子孫。備有趨庭之訓。敬其祖禰。必勤薦享之儀。先妣太夫人太原郡王氏。天資益秀。婦道彌芳。含茲淑善之風。終啓繁昌之允。恭惟長官。英資倜儻。偉量恢宏。辭才則賈馬無稱。孝敬乃曾顏讓美。當未登顯仕。恒奉溫清。見喜色以問安。露憂容而侍疾。身能禮樂。性存典

墳爰從赴聘於招弓。便可分榮於宰字。擢爲高陽縣令。蒞政之後。嘉問允彰。單父臨民。綽有七絲之詠。中牟作宰。不無三異之稱。及罷任之初。未及踰載。而除官路。縣復起頌聲。屏宣卧虎之威。廳集巢鳩之美。立言必雅。莫常顯己所長。用意絕私。未可屈人之短。大小之物。罔不躬決。聞望俱高。位祿已重。賦潘岳閑居之詠。起陶潛歸去之思。因罷厥官。却訪田里。豈謂景福未終。昊天不佑。碧落之孤雲。易失。風窓之短焰。難停。歷任三十年。享壽五十八。我伯母平昌郡孟氏。亦以不登遐壽。奄逝流光。貞魂諒合於延平。青骨同安於蒿里。有子四人。長日照。故幽都府永清縣令。松筠。

定操金玉温身。方傳襲慶之榮。俄邁涉洄之夢。次日
隱前攝鄭州長史。仁義兼資。温恭有譽。守其祭祀。不
怠厥初。次日延徒以積慶韞光。未趨顯仕而沒。幼子
商裔。運州左都押衙。以職居鄉外。身列陪臣。空深怙
恃之悲。莫奉松楸之禮。孫子六人。讓能去非。光又霸
孫。嵐孫。天留。並謙。沖立志。詩禮飭身。咸懷踵慶之風。
大有興宗之譽。孫女三人。義姐。王師。小姐。或訖有絲
蘿。或年才齠齕。克著雍容之德。允■貞順之規。於戲
生而無過。歿而有後者。其爲長■幼■
不歌。春杵不鳴。歸墟也。■連車■乃梁鄧之■贈弔
有■則金張之系。以庚申年十一月廿四日。安神於

任上縣長上鄉孝慈里靖隧先墳之次禮也靈輻駕野丹旒懸空爰開烏兆之塋實掩賢英之墓恭承日照嚴旨謹作銘云。

博哉貴胄踵慶於門山河其度金玉其身蘊十善道爲百里君立功於國流愛於民豈期遘禍一旦歸魂委宅幽壤慮謝音塵爰刊琬琰紀錄其勤日往月來兮良銘此地付子孫今傳揚萬春

此誌不書時代錄附唐末以俟再考

晉故竭誠匡定保乂功臣特進檢校太保右金吾衛上將軍兼御史大夫上柱國長沙郡開國公食邑一千八百戶食實封一百戶贈太

傅羅公墓誌銘并序

五代殷鵬

夫天地肅物。松柏猶或後凋。郊藪呈芳。芝蘭焉能長秀。故老氏有必摧之歎。仲尼興不實之悲。衆木低而梁棟傾。嚴霜重而祥瑞去。物之有矣。可得喻焉。公諱周敬。字尚素。其先顓頊之允也。封於羅。以國爲氏。地連長沙。因家焉。公即長沙之後也。曾祖讓。皇檢校司空。累贈太師。封南陽王。娶宋氏。封越國太夫人。祖諱宏信。皇天雄軍節度使。檢校太師兼中書令。長沙王。累贈守太師。累封趙王。諡曰莊肅。娶趙國夫人呂氏。先薨。又娶吳國夫人王氏。爲時之瑞。命世而生。倜儻不羣。英雄自許。有唐之末。大盜勃興。鎮守一方。廓清千里。上則忠於社稷。下則施及子孫。烈考諱紹威。皇

天雄軍節度使守太師兼中書令鄴王贈守尚書令
諡曰貞莊。天地鍾秀，山河孕靈。下筆則泉湧其文，橫
戈則雷震其武。惠惟及物，明可照奸。曠古已來，罕有
其比。貞莊有子四人，長廷規，天雄軍節度副大使檢
校太傅駙馬都尉少薨，贈侍中。次周翰，義成軍節度
使檢校太傅駙馬都尉，亦少薨，贈侍中。次周允，前保
大軍行軍司馬，檢校兵部郎中，兼御史大夫，柱國，賜
紫金魚袋。早歷通班，繼爲上介。綽有器業，可奉箕裘。
公即貞莊公第三子也。性稟淳和，生知禮樂。早失天
廕，幼奉母儀。秦國夫人劉氏，即故兗州節度使太師
公之弟三女也。肅雍無比，柔順有聞。示以愛慈，加之

訓導。遂令諸子悉著美名。時梁乾化初。公之次兄方鎮南燕。公時年九歲。秦國夫人歸寧於兗州。太師之宅。遂命侍行。至闕下。梁末主宣召入內。對敷明庭。進退有度。上甚器重之。遂授檢校尚書禮部員外郎。仍賜紫金魚袋。自此恒在宮禁。出入扈從。乘輿與皇親無間。待立冕旒。多備顧問。無非辯對。深恰宸衷。上尤竒之。其年秋七月。歸南燕。甲戌秋七月。公之次兄薨於滑州之公府。上聞訃。奏乃謂近臣曰。羅氏大勲之後。宜賞延。遂命公權知滑州軍州事。檢校禮部尚書。冬十月。上表乞入覲。十一月。至京師。朝謝畢。翌日。有制。授宣義軍節度使。檢校尚書右僕射。年方十歲。位

冠五侯。甘羅佩印之初，未爲少達。王儉登壇之日，已
是老成。十二月，至自京師。乙亥春二月，鄴中構亂，河
上屯兵，況處要衝，屬茲征伐，事無巨細，公必躬親，道
路有頌聲，軍民無撓政。丙子春二月，移鎮許田，加檢
校尚書左僕射。是歲，公年始十二，作事可法，好謀而
成，政絕煩苛，人臻富壽。忽下徵黃之詔，俄諧會尸之
期。戊寅秋七月，朝于京師，有詔尚主，公拜表數四，辭
不獲免，遂授檢校司空守殿中監駙馬都尉。壬子冬
十月，出降普安公主，傅粉何郎，晨趨月殿，吹簫秦女，
夜渡星橋，一時之盛事，難儔千古之清風，盡在癸未
春三月，除光祿卿。冬十月，唐莊宗收復梁園，中興唐

祚屬當郊祀無失職司遂封開國侯加食邑三百戶至明宗慕紹之初除右金吾衛大將軍充街使秋九月轉左金吾衛大將軍充街使執金在彤庭之前佩玉向丹墀之上仕宦之貴無出於斯上以公久居環衛之班頗著警巡之効至戊子二月有制授匡國軍節度使加檢校司徒仍賜耀忠匡定保節功臣下車之後布政惟新福星爰照於左馮暖律又來於沙苑庚寅夏四月上以圓丘禮畢慶澤溥行就加檢校太保仍降璽書其年冬十一月朝于京師除左監門衛上將軍九月轉左領衛上將軍辛卯夏六月轉左武衛上將軍癸巳五月除左羽林統軍甲午春加特進

階封開國公。食邑二百戶。改賜竭誠匡定保乂功臣。丙申九月。唐廢主以汴師北征。命公以所部禁旅。巡警夷門。公英斷不回。至仁有勇。當危疑之際。立鎮靜之功。浚郊之民。于今受賜。今皇帝并門鳳舉。洛水龍飛。力願推崇。首來入覲。上嘉其懿効。旌彼殊庸。遂除右金吾上將軍。美哉。出揔藩宣。入居嚴衛。外則作疲民之藥石。內則爲天子之爪牙。文武兩班。踐揚將遍。物禁太盛。古之有言。壽年未高。染疾不起。以天福二年七月二十七日。薨於汴州道德坊之私第。享年三十有三。嗚呼。皇天莫問。徒云輔德之言。大夜何長。共有殲良之歎。上聞所奏。惻怛哀慟。輟視朝兩日。厚加

贈幣。贈太傅。君臣之義。終始克全。公以己丑歲五月。梁普安公主薨於同州。後再娶東海郡徐氏夫人。即故東川節度使太師弟五女也。蕙質蘭姿。懿德令範。孰念孤鸞之歎。自傷黃鵠之歌。公有姪延。見任閑廐副使。即魏博副大將軍侍中之子也。朴玉其儀。渾金其器。度□□。相貌。人欽。公亦三子四女。長子延賞。守太子舍人。次延緒。次延宗。皆稟庭訓。悉紹家聲。龍駒鳳雛。得非天性。良金瑞玉。自是國楨。終天懷風樹之悲。踣地有蓼莪之痛。長女適郝氏。次適婁氏。二女方幼。諸子皆普安公主之出也。公主靜惟閑雅。動有規儀。休聲首冠於皇親。淑德

克彰於婦道。帝王之女。無以過焉。公性不好弄。幼善屬文。嚴毅而至和。溫恭而難犯。言惟合道。動不違仁。張充一變之年。已功成名遂。潘岳二毛之日。乃善始令終。以丁酉歲冬十月六日。安葬於洛陽縣之原。禮也。孤子延賞等泣告鵬曰。公之履行。爲衆所知。公之勲庸。歷代罕比。若非故舊。孰能縷陳。鵬列親表之間。受顧念尤最。難避狂簡。輒勒貞珉。序不盡言。乃爲銘曰。

積慶之門。挺生竒傑。入覲堯庭。出持漢節。十乘啓行。萬夫觀政。宵旰無憂。袴襦入詠。英華發外。清明在躬。惟忠惟孝。立事立功。滑臺去思。璧田來暮。藹然休光。

綽有餘裕。搗繡文翰。傅粉容儀。承顏紫禁。飛步丹墀。門盛七葉。祿逾萬石。外冠時英。內光帝戚。歷事累朝。薦逢多難。動有成功。舉無遺算。秋敗芳蘭。地埋良玉。山雲晚愁。林風夜哭。王孫一去。今不復還。陵園草色。今秋黃春綠。

朝議大夫行起居郎充史館修撰

柱國殷鵬撰并書

羅周敬傳見薛居正五代史九十一

紹之初除右金吾衛大將軍充街使則薛史歐史俱稱歷左右金吾衛大將軍充街使則薛史歐史俱稱歷左右金吾大將軍在莊宗時誤也

臨卽教授程伯剛墓誌銘

宋劉光祖

吾友程公說字伯剛眉之丹稜人居於敘之宣化伯剛靜而文方教授臨卽官滿成都臺府爭辟舉之聞

逆曦以屬叛，毀車馬，棄衣冠，即日逃歸，入門而號，以白其父。其父與宣化令始知之，相與驚憤，不能食。伯剛白有司，乞休官侍親，入深山。若將避世者，對客輒流涕。其弟公碩，字仲遜，時分教益，冒艱危中，誓不辱賊。賊平，而伯剛以積憂傷，且方奔避時，失食飲節，忽忽病，醫誤投之藥，汗不止，遂死。開禧三年三月二十二日也。年三十有七。仲遜丐檄，走哭喪次，與其父相向慟。已而父收涕，語曰：「若兄之未生也，吾夜夢立門外，一青衿童子，挽吾衣曰：『我爲公嗣。』問其所從來，則曰：『我青神先生兒也。』明年而若兄生長，而父師不煩於教。當此變亂，與汝隔不相聞，若兄入縣西北安固。」

山爲終焉計。不復問家事。但攜所著春秋諸書。以自隨。謂諸弟曰。我嘗遊青城。大面諸山。徘徊不忍去。去之三年。日往來於懷也。今此山遠城市。茂草木。吾心有感焉。語未旣。泣數行下。曰。妖氣未除。世路艱棘。吾欲從此逝矣。疾革。父母問所欲言。無他語。但云。仙階淺。未足以成功名。荅其弟。其子亦然。殮之夕。從弟仲藝。夢若兄言。我故青城山人也。吾父乃以爲眉之青神。宜爲我一正其誤。先是。汝兄方之少城。出門連夕。雪。汝弟公辰。夢一黃衣。告以兄所辟兩闕。俱非。當授青城山見次。哀哉。數事如合券。吾兒之生死如此。復相向慟失聲。其卒之明年。嘉定元年十月乙酉。葬之。

於縣西馬泉山之原。仲遜授學於伯剛。伯剛與仲遜同年舉進士。既仕矣。俱以所學。孳孳質於余。伯剛骨秀而神清。尤積學苦志。平生於春秋一書究之。反覆不厭。有春秋分記九十卷。左氏始終三十六卷通例二十卷。比事十卷。勤矣哉。而未嘗止也。又取諸儒講解鉤纂之名曰精義。病中猶不去手。書未及成而卒。伯剛性恬潔。居無惰容。得伊洛諸書。服膺焉。不臻其極不已。有語錄二卷。士訓一卷。詩文二十卷。程氏大宗譜十二卷。此其爲志何如也。自伯剛率諸弟以學。連二舉。兄弟同薦者五人。伯剛凡兩薦登科。時年二十有五。既與其弟各調官待次。杜門潛心。人罕識其

面曰它日欲求此樂不可得也。及試吏廣都簿。遇事人服其公清。部使者傅寺丞使代老令。理其縣。吏不敢侮。邛州號多士。伯剛掌教不肯苟。不使郡太守奪其職。宇文侯下車。始得以經訓古道從事。士風遂振。鄉長老李德秀盛稱之。凡號端方士。皆深知伯剛。伯剛則行其所學。非苟求知者也。不幸蚤世。以通直郎。賁其終。伯剛之父名符孫。蓄學不售。祖諱志行。少豪於才。以承信郎鎖其廳。薦居詞賦首。曾祖諱準。兩貢辟廡有聲。六世祖自汴歸蜀。愛郁駟山川而居焉。今宣化是也。伯剛之母魚耶孫氏。有賢德。妻犍爲王氏女也。二子長曰元子。前伯剛七年卒。次曰光老。女曰

寧前一月卒。次曰嘉伯剛之葬也。仲遜無以塞其父之悲，乃來請銘。銘曰：

祠西之峯，有翩其童。暫下人世，兮還山無蹤。曷不少俟，以遊夫蓬萊道山之宮。曰吾未足以成功也。獨留遺冢與遺書，使思子兮無窮。我爲勒銘，識其幽封。月明山空，魂其歸來。蕭蕭松風已矣乎，聊託吾文慰而翁。無索之於杳冥之中。

春秋分紀勝近人大事表遠甚惜通志堂未曾彙入經解

又無好事者刊刻單行今錄載公說墓誌使世間知此書庶幾終傳於後尔

續古文苑卷第十九

續古文苑卷第二十

賜進士及第授通奉大夫山東通省督糧道加三級孫星衍撰
誄

大司馬吳漢誄

漢杜篤

篤以爲堯隆稷契舜嘉皇陶伊尹佐殷呂尚翼周若
此五臣功無與疇今漢吳公追而六之乃作誄曰

朝失鯁臣國喪爪牙天子愍悼中宮咨嗟四方殘暴
公不征茲征茲海內公其攸平泯泯羣黎賴公以寧
勲業旣崇持盈守虛功成即退挹而損諸死而不朽
名勒丹書功著金石與日月俱案此蓋未全故
征茲句不協韻

和帝誄

漢蘇順

天王徂登率土奄傷如何昊穹奪我聖皇恩德累代
乃作銘章其辭曰

恭惟大行配天建德陶元二化風流萬國立我蒸民
宜此儀則厥初生民三五作綱載藉之盛著於虞唐
恭惟大行爰同其光自昔何爲欽明允塞恭惟大行
天覆地載無爲而治冠斯往代往代崎嶇諸夏擅命
爰茲發號民樂其政奄有萬國民臣咸秩大孝備矣
闕宮有恤由昔姜嫄祖妣之室本枝百世神契惟一
彌留不豫道揚末命勞謙有終實惟其性衣不制新
犀玉遠屏履和而行威稜上古洪澤滂流茂化沾溥
不愁少留民斯何怙獻歎成雲涕泣成雨昊天不弔

喪我慈父。

萬年公主誄

晉左九嬪

昔蒲衣早智。周晉夙成。咸以岐嶷。名存典經。猗歟公主。主在幼尅。哲方德比。齒有邈先。烈何德之盛。而年或闕。何華之繁。而實不結。雨墜風逝。形影長滅。赫赫京室。河洛所經。陰精發曜。降茲淑靈。篤生公主。誕膺休禎。秀生紫微。日暉月明。紅顏鬢髮。金質玉形。太平御覽一百五十四引補既睇艷姿。徽音孔昭。盼倩其媚。婉曼其嬌。寵玩軒陛。如瓊如瑤。雖則弱齒。雙德兼苞。五福所集。聞之先民。積善鍾慶。祐德輔仁。宜終淑美。光暉日新。云何降戾。景命不振。曄曄榮曜。英蕤始芳。何辜于天。

猥遇降霜。熒熒稚魂。飄飄遐翔。於戲何辜。痛茲不福。
生而何晚。歿而何速。酷矣皇靈。謬哉司祿。嗚呼哀哉。
日月載馳。白露凝結。自主薨徂。奄離時節。吉凶乖邈。
存亡異制。將遷幽都。潛神永翳。嗚呼公主。魂豈是綏。
岌岌靈輜。駿駟駢駢。挽僮齊唱。悲音激摧。士女獻歎。
高風增哀。一日不見。採蕭作歌。況我公主。形滅體訖。
精靈遷逝。幽此中阿。言思言念。涕淚滂沱。嗚呼哀哉。

弔文 哀詞

弔張衡文

漢 禰衡

南岳有精。君誕其姿。清河有理。君達其機。故能下筆。
辭繡。揚手文飛。昔伊尹值湯。呂尚遇旦。嗟矣君生。而

獨值漢蒼蠅爭飛。鳳凰已散。元龜可羈。河龍可絆。石
堅而朽。星華而滅。唯道興隆。悠永靡絕。君
音永浮。河水有竭。君聲永流。周旦先沒。發夢孔丘。余
生雖後。身亦存遊。士殞知己。君其勿憂。

弔夷齊文

魏糜元

少承洪烈。從戎於王。側聞先生。餓於首陽。敢不敬弔。
寄之山岡。嗚呼哀哉。夫五德更運。天秩靡常。如有絕
代之主。必有受命之王。故堯德終于虞舜。禹祚殄于
成湯。且夏后之末祀。亦殷氏之所亡。若周武爲有失。
則帝乙亦有傷。子不弃殷而餓死。何獨背周而深藏。
是識春香之爲馥。而不知秋蘭之亦芳也。二句御覽無所

在誰路而子絕之首陽誰山而子匿之彼薇誰菜而子食之行周之道藏周之林讀周之書彈周之琴飲周之水食周之芩而謗周之主謂周之淫是誦聖之文聽聖之音居聖之世而異聖之心嗟乎二子何痛之深

二句御覽無○案隋書經籍志梁有散騎常侍麋元集五卷七

溧陽侯陶謙哀詞

吳張昭

猗歟使君君侯將軍膺秉懿德允武允文體足剛直守以溫仁令舒及廬遺愛於民牧幽暨徐甘棠是均憬憬夷貊賴侯以清蠢蠢妖寇匪侯不寧唯帝念績爵命以章旣牧且侯啓土溧陽遂升上將受號安東將平世難社稷是崇降年不永奄忽殂薨喪覆失恃

民知困窮，曾不旬日，五郡潰崩。哀我人斯，將誰仰憑？
追思靡及，仰叫皇穹。嗚呼哀哉！

建康志：溧陽侯陶謙墓在溧陽。考證云：後

漢獻帝興平元年，溧陽侯陶謙卒，且葬張昭哀之。其詞曰云云。

晉成帝哀策文

宸極寥廓，聖靈遐之。哀備物之虛在，痛永往之無期。乃命史官，述德寄辭。其辭曰：

五德代興，素靈啓曜。離光疊暉，三辰重照。明明我皇，含貞挺妙。元秀夙達，履德罔違。鳳棲遐邈，神宇凝夷。文明外潤，仁簡內綏。舉無遺中，鑒無幽微。韻隆汾陽，道侔垂拱。靜恭清穆，冥功日用。亶亶神軌，同天攸縱。爰有陽九，紀綱中替。姦豎肆逆，牢羅失衛。外降艱難，

協應神契靈祚既保顯揚天命零霧朝晞兩儀開鏡
訓諮阿衡虛己絕正九功潛流七德將表方振宏羅
稜威電掃芟蕩神衢一我王道昊天不弔降茲大悔
天傾其儀地覆其載大業未究神爽遷背哀貫三靈
痛流萬代爰初不豫大漸在躬啓手歸全神氣夷沖
凝哉達識體正履終袞龍旣襲玉容斯幽登醪虛設
觴爵靡酬墳牘莫啓聖迹誰修冥冥我皇神焉何遊
撫膺遐叫迸涕交流三筮告期將歸陵墟陞殞羽翼
庭納龍輿玉輪動運錫鸞鳴衢錫旆徘徊六驥踟躕
輕雲蔭舉流風翼車哀哀同軌唯唯輓夫長號永慕
泣涕漣洳大塊獨運終歸其始我后永往寧神于祀

悠悠上天。煢煢惟已。渺然靡憑。廓焉無恃。目範令儀。徽音在耳。

晉孝武帝哀策文

晉王 恂

同軌畢至。百司胥亞。法物夕陳。輶輳夙駕。親執饋奠。長號永夜。懼鼓刻之遄盡。哀良辰之莫借。悲宮宇之寥廓。痛聖儀之幽化。夫至德無名。固理絕稱。謂然祝史陳辭。亦臣子所貴。寄窮情於翰墨。庶遺塵之髣髴。其辭曰。

惟皇作極。五德迭允。康實復夏。武亦隆晉。亶亶太宗。希夷其韻。鏡之者元。撫之者順。於穆皇考。嗣徽絕軌。前聖後哲。契合一揆。心去其伐。行遺其美。廢華任誠。

捨荃存旨。惟深通志。羣方咸秩。惟幾成務。能事斯畢。
未若我皇。至則不疾。恢恢天網。䟽而莫失。居有以虛。
宰多以少。簡則可從。靜則不擾。信及豚魚。澤被億兆。
湛然司契。坐一八表。園陵旣衛。威靈赫赫。子來旣構。
寢廟奕奕。武曰止戈。戎不極役。文教聿修。有恥且格。
迹有遠邇。感無高深。道之所被。改色革音。皓獸馴苑。
素羽棲林。殊柯通理。異蒂同根。方融元液。陶鑄斯民。
雲韶候奏。比屋思淳。積祐莫應。天罰奄臻。太山頽構。
洪瀆竭津。何殃之甚。何酷之殷。自罹旻凶。二氣代變。
霜繁廣除。風迴高殿。帷幙空張。肴俎虛薦。極聽無聞。
詳視罔見。人神道殊。吉凶有禮。龜筮參謀。埏隧告啓。

史臣考吉。警者在陛。攀援忪忪。惟兄及弟。龍輿肅以
引邁。前驪紛以抗旒。城闕儼以整列。馳道亘以通修。
悲平昔之所幸。豈斯路之復由。輓哀唱以翼衡。駟悲
鳴而顧軻。違華宇之晰晰。即永夜之悠悠。奉靈輿而
長訣。緬終天而莫收。訴穹蒼以叫踊。洞五內其若抽。
儻性命之可贖。甘人百於山上。茫茫大運。靡始不終。
哲王遺世。貴在道融。昭哉我皇。萬代流風。良史式述。
德音永隆。

弔嵇中散文

晉李充

先生挺邈世之風。資高明之質。神蕭蕭以宏遠。志落
落以遐逸。志尊榮於華堂。恬卑靜於蓬室。寧漆園之

逍遙安柱下之得一寄欣孤松取樂竹林尚想榮莊
聊與抽簪味孤觴之濁醪鳴七絃之清琴慕義人於
元旨詠千載之徽音凌晨風而長嘯託歸流而永吟
乃自足於丘壑孰有愠乎陸沉馬樂原而翹足龜悅
塗而曳尾疇廟堂之是榮豈和鈞之足視凡先生之
所期羌元達於遐旨尚遺大以出生何殉小而入死
嗟乎先生逢時命之不丁冀後凋於歲寒遭繁霜而
夏零滅皎皎之玉質絕琅琅之金聲援明珠以彈雀
損所重而爲輕諒鄙心之不爽非大雅之所營

弔比干文

後魏孝文帝

唯皇構選中之元載歲御次乎闔茂望舒會於星紀

十有四日。日唯甲申。予揚和淇右。蹠駟鄘西。指崧原
而搖步。順京途以啟征。路歷商區。館屆衛壤。泛目睇
川。縱覽觀陸。遂傍睨古跡。游瞰曩風。覩殷比干之墓。
悵然悼懷。案讀當於此字句絕焉。乃命馭駐輪筭。驥躬矚荆。棘
字荒朽。工爲緜蕝。蕝字而遺猷明密。事若對德。慨狂后
之猖穢。傷貞臣之婞節。聊興其韻。貽弔云爾。 曰
三才之戢元兮。敷五靈以扶德。含剛柔於金木兮。資
明闇於南北。重離耀其炎暉兮。曾坎司元以秉黑。伊
稟常之懷生兮。昏睿遞其啟則。晝皎皎其何朗兮。夜
幽幽而致弊。哲人昭昭而澄光兮。狂夫黜黜其若翳。
咨堯舜之耿介兮。何桀紂之猖敗。沈湎而不知甲兮。

終或弑己以貽戾。蹇蹇兮比干。藉冑兮殷宗。含精兮
誕粹。寘樹兮英風。粟蘭露以滌神。滄蘂鞠英而儼容。
茹薜荔以蕩識。佩江蘺而麗躬。履霜以結冰兮。卒窘
忠而弥濃。千金豈其吾珍兮。皇輦寔余所鍾。舊誠諫
而燼軀兮。導危言以釁鋒。嗚呼哀哉。嗚呼哀哉。惟子
在殷。實爲樑棟。外贊九功。內徽辰共。匡率袞職。德音
遐洞。周師還旆。非子誰貢。否哉悖運。邁此不辰。三綱
道沒。七曜輝泯。負乘竊器。怠棄天倫。懷誠齎怒。讜言
爲陳。毘侯已醢。子不見歟。邢侯已脯。子不聞歟。微子
去矣。子不知歟。箕子奴矣。子不覺歟。何其輕生。一致
斯歟。何其愛義。勇若歸歟。遺體旣灰。不其惜歟。永矣

無返。不其痛歟。嗚呼哀哉。嗚呼哀哉。夫天地之長遠
兮。嗟人生。短字旋多殃。住字往者子弗及兮。來者子不願
當。胡契濶之屯。亶兮。值昏化而永良。曷不相時以
卷舒兮。徒委質而巔顛。雖虛名空傳於千載。詎何
勲之可揚。奚若騰魂以遠逝。飛足而歸昌。得比肩於
尚父。卒同協於周王。建鴻績於盛辰。啟肯宇於齊方。
闡穆音乎万祀。傳寃鞫業以脩長。而乃自受茲斃。視
竅殷柔。辨剖心無補。迷機喪身。脫非武發。封墓誰回。
嗚呼。介士胡不我臣。
重曰。世昏憒而溷濁兮。日
藹藹其無光。時坎廩而險隘兮。氣僚颺以飛霜。子奚
其不遠逝兮。侘傺而陟故鄉。可乘柁字梓以浮滄兮。求

蓬萊而爲糗，銜芝條以昇虛兮。與赤松而翱翔，被芰荷之輕衣兮。曳袂扶容之菡裳，循海波而澍颺兮。望會稽以歸禹，紐蕙芷以爲紳兮。扈荃佩而容与，寫鬱結於聖人兮。暢中心之祕語，執垂益而談卡兮。交良朋而憶據字金石文字記釋作慮非苦言，旣而東騰兮。吸朝霞而長舉，登岵巘而悵望兮。眺扶桑以停佇，謁靈威以問路兮。乘谷風而扳宇，遂假載於羲和兮。憑六螭以南南，處翥衡嶽而頽步兮。濯沅湘以自潔，嚼炎州之八桂兮。踐九疑而遙襲，即蒼梧而宗舜兮。拂埃霧以就列，採輕越而肅帶兮。切寶犀以貫介，訢辯淳風之淪覆兮。話蕭韶之湮滅，召熊羆而叙釋兮。問重華之風

棊尔乃飲正陽之精氣兮。遊丹丘而明視。捐捐祝融而求鳥兮。御朱鸞以脩指。因景風而凌天兮。迴靈鷲鷲以西履。降黃渚而造稷兮。慰稼穡之艱難。訪有郇之誥誥兮。遇何主而獲安。然後陟崑崙之翠嶺兮。攀瓊枝而槃桓。步懸圃以溜澆兮。咀玉英而折蘭。歷崦嵫而一顧兮。府俯沐髮於消盤。仰從縱倚於閭闔兮。請帝闔而啟關。天沈寥而廓落兮。地窳溲而遼闊。滄淪陰以裨氣兮。佩瑤玕而鳴鏘。拜招矩而脩節兮。少躊躇以相羊。祈驥驥而揔韁兮。隨泰風以颺揚。瞰不周而左旋兮。縱神駟以北望。尋流沙而騁鑾鑾兮。暨陽周以緜駕。靡芸芳以馥體兮。索夷杜而桓衙。奉軒

轅而陳辭兮，申時俗之不暇。適岐伯而脩命兮，展力
牧以問霸。歛沆瀣之純粹兮，闕彌寒門之層冰。聆廣
莫之颺飄兮，覲黔羸而迴凝。擁元武以涉虛兮，允
神寘而威陵。象曖暉而晦鬱兮，途曷曷其難勝。笑飛
廉而前驅兮，使燭龍以輝澄。歸中樞而睇睨兮，想元
漠之已周。慨飛颺之無寄兮，颯翔袂而上浮。引雄虹
而登峻兮，揚雲旗以軒遊。躍八龍之蜿蜿兮，振玉鸞
之啾啾。搴彗星以朗導兮，委弁軻乎大儀。教重暘之
帝宮兮，凝精魄於旋曦。扈陽曜而靈脩兮，豈傳說之
足竒。但至槩之不悛兮，寧溘死而不移。

告泰華府君文

唐韓賞

惟廿七祀孟秋。右補闕韓賞。敢昭告于泰華府君祠。廟惟天地生于人。惟山川主乎神。人有識而神有靈。人貴聰而神貴明。於昭靈山。與天窈冥。載在祀典。鎮于上京。自古帝王。徵應不一。荒淫者神降之凶。聖哲者神授之吉。惟茲臣庶。鑒乎得失。今予小子。造于神祠。將有所盟。神其聽之。人有嗜好。各爲私禱。顧無所求。唯道是憂。今者內禱於身。外盟於神。如有一心。公朝戮力。生人惟神。是福。崎嶇世道。僂俛在位。惟神所殛。必將忘身奉國。爲本圖憂。國濟人爲己任。明明泰華。昭鑒于茲。瞻彼牲牢。抑惟常禮。神嗜正直。意存精誠。正直以享神。精誠以享意。拳然跼慮。瞿然改容。益

靈山之嵯峩增壽宮之肅穆。歷階趨進髣髴其形尚饗。

天寶元年歲次壬午四月乙亥朔十日甲申。正議大夫太僕少卿兼太山別駕。闕諸王侍書。榮王府司馬韓擇木書。

祭文

釋奠祭孔子文

晉庾亮

維咸康三年。荆豫州刺史都亭侯庾亮。敬告孔聖。明靈詩書。煥於唐虞。憲章盛於文武。然後黎民時雍。彝倫攸敘。幽厲積構。玉繩絕紀。高岸爲谷。六合錯否。上凌夷而失教。下苟免而無恥。公以元聖之靈。應感圓通。萬物我賴。匪我求蒙。夫子旣沒。洪範垂流。秦雖慢

道漢聿孔修。洎我皇晉。仰欽大猷。宗聖旣建。遐胄俾
侯。令月吉辰。祇陳大禮。磬管鏘鏘。威儀濟濟。嘉奠旣
設。欽若靈規。心存鳳德。尚想來儀。神其歆之。降鑒在
斯。

祭牙文

晉表 宏

天生五才。治道所司。廢一不可。靜亂輔時。赫赫晉德。
乃武乃文。中世不競。王度暫屯。戎狄滑夏。虔劉生民。
蠢爾東胡。被髮左袂。思我皇澤。稽首海裏。受爵納貢。
服膺累世。後嗣不恭。實叛實戾。侵我神畿。隔我嘉惠。
哀彼黎民。嬰此彫殘。沉荷大寵。任其艱難。慨然發憤。
撫劍忘飡。敢建高牙。烈烈桓桓。

祭梁鴻文

晉周穎文

晉隆安四年。陳郡周穎文。以蘊藻行潦。祠于梁先生之墓。夫子邁志箕穎。塵垢雕俗。骨秀風霜。性淳寡欲。娶待偕隱之儷。文絕陪臣之錄。遂負策周魯之郊。逆旅吳會之阿。可謂高竒絕倫。孤生莫和者也。後學撫牘。得人在文。忽以知命。而展其墳。茫茫積草。有馥餘芬。昔先生過延陵。而想季。經海隅。而感連。苟踐跡而趣合。亦斷金於當年。

祭夫文

梁徐悱妻劉氏

維梁大同五年。新婦謹薦少牢於徐府君之靈。曰。惟君德爰禮智。才兼文雅。學比山成。辯同河瀉。明經

擢秀光朝振野調逸許中聲高洛下含潘度陸超終
邁賈二儀既肇判合始分簡賢依德乃隸夫君外治
徒奉內佐無間幸移蓬性頗習蘭薰式傳琴瑟相酬
典墳輔仁難驗神情易促霄碎春紅霜雕夏綠躬奉
正衾親觀啓足一見無期百身何贖嗚呼哀哉生死
雖殊情親猶一敢遵先好手調薑橘素俎空乾奠觴
徒溢昔奉齊眉異於今日從軍暫別且思樓中薄遊
未反尚比飛蓬如當此訣永痛無窮百年何幾泉穴
方同

祭陳伯玉文

唐盧藏用

子之生也珠圓流兮玉方潔子之沒也太山頽兮良

木折士林闐寂兮人物踈門館蕭條兮賓侶絕嘆佳
城之不返辭玉階而長別嗚呼置酒祭子子不顧沈
聲哭子子不迴唯天道而無託但撫心而已摧

雜文

用筆法

秦李斯

夫書之微妙道合自然篆籀以前不可得而聞矣自
上古作大篆頗行於世但爲古遠人多不詳今斯刪
畧繁者取其合理參爲小篆凡書非但裹結流快終
藉筆力輕健蒙將軍恬筆經猶自簡畧斯更修改望
益於用矣用筆法先急回後疾下鷹望鵬逝信之自
然不得重改如游魚得水景山興雲或卷或舒乍輕

乍重善思之。此理可見矣。

斯善書。自趙高已下。

咸見推伏。刻諸名山。碑璽銅人。並斯之筆。斯書秦望紀功石云。吾死後五百年。當有一人替吾跡焉。一本作九百年

僮約

漢王褒

蜀郡王子淵。以事到湔。止寡婦楊惠舍。惠有夫時。奴名便了。子淵倩奴行酤酒。便了拽大杖上夫冢巔曰。大夫買便了時。但要守家。不要爲他人男子酤酒。子淵大怒曰。奴寧欲賣耶。惠曰。奴大忤人。人無欲者。子淵即決買券云云。案本誤不重今補奴復曰。欲使皆上券。不上券。便了不能爲也。子淵曰。諾。券文曰。神爵三年正

月十五日資中男子王子淵從成都安志里女子楊

惠買亡夫時戶下髯奴便了決賈萬五千奴當從百

役使不得有二言晨起早掃食了洗滌居當穿白縛

箒裁孟鑿斗浚渠縛落鉏園斫陌案向絕章樵誤以

知落陌杜埤音苑脾地刻大枷屈竹作杷削治鹿盧出

入不得騎馬載車蹠坐大叟下床振頭捶案本誤改鉤

此字依藝刈芻結葦臘纊汲水此二字依酪佐此字

文類聚學苑音酢音徂音醖音摸織履作麤黏雀張烏結網捕魚繳

鴈彈鳧登山射鹿入水捕龜後園縱養鴈鷺百餘驅

逐鴝鳥持梢牧猪種薑養芋案本誤改長育豚駒糞除

堂廡此二字依餒食音苑伺馬牛鼓四起坐夜半益芻

二月春分被隄杜疆落桑皮梭

御覽注云梭併攔也皮可爲繩作鉅也

種瓜作

苑昨音御覽注云音鑿

瓠別茄披葱焚槎發芋

御覽注云蜀土

收芋皆窖藏之至春乃發

壟集破封日中早黃

苑復音○案此字未詳御覽在所不

引中無以訂之章樵本

雞鳴起春調治馬戶兼落三

作斐然與復音不合也

重

御覽注云馬戶水門也蜀每以落置水流養魚欲食乃取之

舍中有客提壺行

酤汲水作舖

苑晡音

滌杯整棧園中拔蒜斷蘇切脯築

肉臠芋膾魚鮓烹茶盡具已而

此字依初學記

蓋藏關門

塞竇餽猪縱犬勿與鄰里爭鬪奴但當飯豆飲水不

得嗜酒欲飲美酒唯得染脣漬口不得傾盃覆斗不

得辰出夜入交關伴偶舍後有樹當栽作船上至江

州下到湔

案句絕章樵誤連下讀蓋不知船湔錢爲韻

主爲府掾求用錢

推訪聖御覽注云販梭索繇亭買席往來都洛當為

婦女求脂澤販於小市歸都擔泉轉出旁蹉御覽注云

名牽犬販鵝武都買茶御覽注云武楊氏案御覽亦

不得夷蹲旁卧惡言醜罵多作刁矛持入益州貨易

羊牛案本誤奴自教精慧不得癡愚持斧入山斷輮

裁輮御覽注云若有餘殘當作俎几木屐及珮盤御

注云珮盤楚薪作炭罪切石薄岸御覽注云巽石

音力追切苑及初學記力罪切亦非治舍蓋屋削

書案本誤伐牘日暮欲歸當送乾薪兩三束四月當

披九月當穫十月收豆御覽注云十掄麥窖芋御覽

注云

掄麥種御覽注云南南安拾栗採橘安縣出橘持車載鞦御覽注云

載鞦有利也○案已上正文十四字初學記脫去僅見御覽今據補多取蒲葶苑紵音益

作繩索雨墮無所為當編蔣織薄種植桃李梨柿柘

桑三丈一樹八樹此字依藝文類聚為行果類相從縱橫相

當果熟收斂不得吮嘗犬吠當起驚告鄰里振門柱

戶上樓擊鼓御覽注云漢時官不禁報怨民家皆高樓置鼓其上有急即上樓擊鼓以告邑里

今救取也荷此字依初學記盾曳矛還落三周勤心疾作不得邀

遊奴老力索種莞織席事訖休息當舂一石夜半無

事浣衣當白若有私錢主給賓客奴不得有姦私事

事當關白奴不聽教當笞一百讀券文適訖詞窮詐

索乞叩頭兩手自搏目淚下落鼻涕長一尺審如

王大夫言不如早歸黃土陌丘蚓鑽額早知當爾為

此字依藝文王大夫酤酒真不敢作惡案此文在古

類聚初學記王大夫酤酒真不敢作惡文苑蓋取自

初學記故大段全同閒有一二小異而已考太平御

覽五百九十八亦載之雖非完篇然可依以訂補者

甚多又載有舊注尤足信據如云蜀土收芋皆窖藏

之至春乃發則知芋今作等之必誤矣馬戶水門也

則知戶今作駟之必誤矣堊白塔也則知堊今作惡

之必誤矣今作駟之必誤矣堊白塔也則知堊今作惡

御覽正文皆未嘗誤也而章樵單用今本鄧書燕說

豈不陋哉其舊注未悉撰人名氏惜御覽載之不盡

難蓋天八事

漢揚雄

一曰日之東行循黃道晝中規牽牛距北極北百一

十度東井距北極南七十度并百八十度周三徑一

二十八宿周天當五百四十度。今三百六十度。何也。
二曰。春秋分之日。正出在卯。入在酉。而晝漏五十刻。
即天蓋轉。夜當倍晝。今夜亦五十刻。何也。三曰。日入
而星見。日出而不見。即斗下見。日六月不見。日六月。
北斗亦當見。六月不見。六月。今夜常見。何也。四曰。以
蓋圖視天河。起斗而東。入狼弧閒。曲如輪。今視天河。
直如繩。何也。五曰。周天二十八宿。以蓋圖視天星。見
者當少。不見者當多。今見與不見等。何出入無冬夏。
而兩宿十四星常見。不以日長短。故見有多少。何也。
六曰。天至高也。地至卑也。日託天而旋。可謂至高矣。
縱人目可奪。水與景不可奪也。今從高山上。以水望

日日出水下影上行何也。七曰視物近則大遠則小。今日與北斗近我而小遠我而大何也。八曰視蓋橛與車輻閒近杠轂即密益遠益疎。今北極爲天杠轂二十八宿爲天橛輻以星度度天南方次地星閒當數倍。今交密何也。文見隋書天文志云以通渾天張溥所輯揚子雲集有其目未載其錄之故

靈憲

漢張衡

昔在先王將步天路用定靈軌尋緒本元先準之於渾體是爲正儀立度而皇極有道建也。樞運有道稽也。乃建乃稽斯經天常聖人無心因茲以生心。故靈憲作興曰太素之前幽清元靜寂漠冥默不可爲象。

厥中惟虛。厥外惟無。如是者永久焉。斯謂溟滓。蓋乃道之根也。道根既建。自無生有。太素始萌。萌而未兆。并氣同色。渾沌不分。故道志之言云。有物渾成。先天地生。其氣體固未可得而形。其遲速固未可得而紀也。如是者又永久焉。斯謂龐鴻。蓋乃道之幹也。道幹既有育物成體。於是元氣剖判。剛柔始分。清濁異位。天成於外。地定於內。天體於陽。故圓以動。地體於陰。故平以靜。動以行施。靜以合化。堙鬱構精。時育庶類。斯謂天元。蓋乃道之實也。在天成象。在地成形。天有九位。地有九域。天有三辰。地有三形。有象可效。有形可度。情性萬殊。旁通感薄。自然相生。莫之能紀。於是

人之精者作聖。實始紀綱而經緯之。八極之維。徑二
億三萬二千三百里。南北則短減千里。東西則廣增
千里。自地至天。御覽二引有一億一萬六千一百五十里在此下半於八極。
則地之深亦如之。通而度之。則是渾已將覆其數。用
重差鈎股懸天之景。薄地之儀。皆移千里而差一寸。
得之過此而往者。未之或知也。未之或知者。宇宙之
謂也。宇之表無極。宙之端無窮。天有兩儀。以儻道中。
其可觀。樞星是也。謂之北極。在南者不著。故聖人弗
之名焉。其世之遂。句誤未詳九分而減二。陽道左迴。故天
運左行。有驗於物。則人氣左羸。形左繚也。天以陽迴。
地以陰溥。是故天致其動。稟氣舒光。地致其靜。承施

候明天以順動不失其中則四時順至寒暑不忒致
生有節故品物用生地以靈靜作合承天清化致養
四時而後育故品物用成凡至大莫如天至厚莫如
地地至質者曰地而已句誤未詳至多莫如水水精爲漢
漢周於天而無列焉思次質也句誤地有山嶽以宣
其氣精種爲星星也者體生於地精成於天隋志引成作發
列居錯跣各有道屬紫宮爲皇極之居太微爲五帝
之廷隋志引皇極作帝皇庭作坐明堂之房大角有席天市有坐
蒼龍連蜷於左白虎猛據於右朱雀奮翼於前靈龜
圈首於後黃神軒轅於中六擾旣畜而狼虬魚鼈罔
有不具在野象物在朝象官在人象事於是備矣懸

象著明莫大乎日月其徑當天周七百三十六分之

一。地廣二百四十二分之一。

案祖暅之所見四作三以八約之得二十九與

劉昭瞿曇

日者陽精之宗積而成鳥象鳥而有三趾

陽之類其數竒月者陰精之宗積而成獸象兔陰之

類其數偶其後有馮焉者羿請無死之藥於西王母

恒娥竊之以奔月將往枚筮之於有黃有黃占之曰

吉翩翩歸妹獨將西行逢天晦芒母驚母恐後且大

昌恒娥遂託身於月是爲蟾蜍夫日譬猶火月譬猶

水火則外光水則含景故月光生於日之所照魄生

於日之所蔽當日則光盈就日則光盡也衆星被耀

因水轉光當日之衝光常不合者蔽於地也是謂闇

虛在星星微月過則食日之薄地暗其明也

案舊脫暗字今

依隋書天繇暗視明明無所屈是以望之若大

者作火

方於中天天地同明繇明瞻明

隋志引無此四字案

明還自奪

案明舊誤暗今

故望之若小

者作水

火當夜

而揚光在晝則不明也月之於夜與日同而差微星

則不然強弱之差也衆星列布其以神著有五列焉

是爲三十五名一居中央謂之北斗動變挺占

隋志引作

動係實司王命四布於方爲二十八宿日月運行歷

示吉凶五緯經次用告禍福則天心於是見矣中外

之官常明者百有二十四

續漢書注有四字隋志

可

名者三百二十爲星二千五百而海人之占未存焉

案漢志海中星占一卷星圖海中占一卷隋志海中星占一卷微星之數蓋萬一千五百二十庶物蠢蠢隋志引作蠢動咸得繫命不然何以揔而理諸夫三光同形有似珠玉神守精存麗其職而宣其明及其衰神歇精斃於是乎有隕星然則奔星之所墜至地則石文曜麗乎天其動者七日月五星是也周旋右回天道者貴順也近天則遲遠天則速行則屈屈則留回留回則逆逆則遲迫於天也行遲者覲於東覲於東屬陽行速者覲於西覲於西屬陰日與月共配合也攝提案石氏曰歲星一名攝提引見歲星占熒惑地候案石氏曰填星一名見晨附於日也太白辰星見昏附於月也二陰三陽參天兩地故男女取則焉

方星巡鎮必因常度苟或盈縮不逾於次故有列司
作使曰老子四星周伯王逢芮各一錯乎五緯之間
其見無期其行無度實妖經星之所然後吉凶宣周
其祥可盡

此文依開元占
經更正舛誤

失父零丁

漢戴良

敬白諸君行路者敢告重罪自爲禍積惡致災天困
我今月七日失阿爹念此酷毒可痛傷當以重贈用
相償請爲諸君說事狀我父軀體與衆異脊背偃僕
捲如截脣吻參差不相值此其庶形何能備請復重
陳其面目鷓頭鵠頸獾狗

案此下脫
字未詳

眼淚鼻涕相追

逐吻中含納無齒牙食不能嚼左右蹉似西域駱駝

案此句當有請復重陳其形骸爲人雖長甚細材面

目芒蒼如死灰眼眶白陷如羹枯此文恐未全存之

案御覽云戴良字文讓而後漢書獨行傳之戴良字叔鸞未知其爲一人與否姑附出於此

非草書

漢趙壹

余郡士有梁孔達姜孟穎者皆當世之彥哲也然慕張生之草書過於希顏焉孔達寫書以示孟穎皆口誦其文楷其篇無怠倦焉於是後生之徒競慕二賢守令作篇人撰一卷以爲祕玩余懼其背彼趨此非所以宏道興世也又想羅趙之所見蚩沮故爲說草書本末以慰羅趙息梁姜焉竊覽有道張君所與朱使君書稱正氣可以消邪人無其覺妖不自作誠可

謂信道抱真。知命樂天者。若夫褒杜崔。沮羅趙。昕昕有自臧之意者。無乃近於矜伎。賤彼貴我哉。夫草書之興也。其於近古乎。上非天象所垂。下非河洛所吐。中非聖人所造。蓋秦之末。刑峻網密。官書煩冗。戰攻並作。軍書交馳。羽檄分飛。故爲隸草。趣急速耳。示簡易之旨。非聖人之業也。但貴刪難省煩。損複爲單。務取易爲易知。非常儀也。故其讚曰。臨事從宜。而今之學草者。不思其簡易之旨。以爲杜崔之法。龜蛇所見也。其撫扶桔。詰屈。天記。○案二音舊。皆誤入正文。今改。不可失也。齟齬以上。苟任涉學。皆廢倉頡史籀。競以杜崔爲楷。私書相與。猶謂就書適迫。遽故不及草。草本易而速。今反

以難而遲失指多矣凡人各殊氣血異筋骨心有疎
密手有巧拙書之好醜在心與手可強為哉若人顏
有美惡豈可學有相若耶昔西施病心捧甯而顰衆
愚效之祇增其醜趙女善舞行步媚盡學者弗獲失
節匍匐夫杜崔張子皆有超俗絕世之才博學餘暇
遊手於斯後世慕焉專用為務鑽堅仰高忘其罷勞
夕惕不息反不暇食十日一筆月數丸墨領袖如皂
唇齒常黑雖處衆坐不遑談戲展指畫地以草劇壁
臂穿皮刮指爪摧折見鯁蘇來切○案舊脫出血猶
不休輟然其為字無益於工拙亦如効顰者之增醜
學步者之案此六字墨池編脫依太失節也且草書

平御覽七百四十九引補

之人。蓋伎藝之細耳。鄉邑不以此較能。朝廷不以此科吏。博士不以此講試。四科不以此求備。徵聘不問此意。考績不課此字。徒善字既不達於政。而拙草亦無損於治。推斯之所言。豈不細哉。夫務內者必闕外。志小者必忽大。俯而捫蝨。不暇見天地。天地至大而不見者。方銳精於蟣蝨。乃不暇焉。第以此篇研思。銳精。豈若用之彼聖經。稽_(歷)協律。推步斯程。探賾鉤深。幽贊神明。覽天地之心。推聖人之情。折議論之中。理俗儒之諍。依正道於雅說。濟雅樂於鄭聲。興至德之和睦。_(宏)大倫之_(元)清。窮可以守身。遺名。達可以尊主。致平。以茲命世。永監後生。不亦淵乎。

譏許由

魏麋元

潛居默靜，隱於箕山，身在布衣，而輕天下。世人歸其
高行，學者以爲美談。夫際會之間，矯時取譽，至乃抽
簪散髮，背時逆命，隱於山林之中，以此自高，非以勸
智能之士，入通達之教，故譏而責之曰：

太上貴德，其次立功。世殊時異，不得而同。故伯禹過
門而不入，稷契刻節而奮庸。股肱帝室，作民王公。今
子生聖明之世，得觀雍熙之治，則當據不朽之功，暢
不羈之志。龍飛鳳起，修攝君司，佐天理物，幹成王事。
若子以堯爲闇主，則歷代載其功，以民爲貪亂，則比
屋可封。若夫世濁時昏，上無賢君，忠臣不出，小人聚

羣即當撥煩理亂。跨騰風雲。光顯時主。拔濟生民。何得偃蹇藏影蔽身。夫道不虛行。士不徒生。生則幹時。爲國之楨。故伊尹干湯。周公相成。興治濟世。以致太平。生有顯功。沒有美名。人生於世。貴能立功。何得逃位。矯世絕蹤。丹朱不肖。朝有四凶。堯放求賢。遜位于子。度才處分。不能則已。何所感激。臨河洗耳。山居巢處。執心不情。辭君之祿。忘君之榮。居君之地。避君之庭。立身若此。非子之貞。欲言子智。則不仕聖君。欲言子高。則鳥獸同羣。無功可紀。無事可論。

買冢地蒞

晉楊紹

大男楊紹從土公買冢地一丘。東極闕澤。西極黃滕。

南極山背。北極於湖。直錢四百萬。即日交畢。日月爲證。四時爲任。太康五年九月廿九日。對共破。芻民有私約如律令。

奴券

晉石崇

余元康之際。出在滎陽東住。聞主人公言聲大粗。須臾出趣吾車。曰。公府怪吾家。嘵嘵邪。中買得一惡羝奴。名宜勤。身長九尺餘。力舉五千斤。挽五石力弓。百步射錢孔。言讀書。欲使便病。日食三斗米。不能奈何。吾問公。賣不。公喜。便下絹百疋。聞謂吾曰。吾胡王子。性讀書。公府事。一不上券。則不爲。公府作券文曰。取東海巨鹽。東齊羝羊。朝歌蒲薦。八板桃牀。負之安邑。

梨栗之鄉。常山細縑。趙國之編。許昌之總。沙房之絲。作車當取高平。莢榆之轂。無尾。鬪體之狀。大良白槐之輻。河東茱萸之輞。亂節桑轆。中脫太山桑光。長安未雙入白屋。脫誤釘鑠巧手。出於上方。見好弓材。可斫千張。山陰青槻。烏皞柘桑。張金好墨。過市數蠶。并市豪筆。備郎寫書。皞角憤道。脫誤金案玉椀。宜勤供筆。更作多辭。乃斂吾絹。■而歸。此文不全。但自御覽外他書罕載故錄之。

斷酒戒

晉庾闡

蓋神明智惠。人之所以靈也。好惡情欲。人之所以生也。明智運於常。佳好惡安於自然。吾固以窮智之害。

性任欲之喪真也。於是推金壘，碎玉椀，破兕觥，捐觚瓚，遺舉白，廢引滿，使巷無行槥，家無停壺，剖樽折杓，沈炭銷鑪，屏神州之竹葉，絕縹醪乎華都。言未及盡，有一醉夫，勃然作色曰：蓋空桑珍味，始於無情，靈和陶醞，竒液特生，聖賢所美，百代同營，故醴泉涌於上，世懸象渙乎列星，斷蛇者以興霸，折獄者以流聲，是以達人暢而不壅，抑其小節而濟大通，子獨區區，檢情自封，無或口閉其味，而心馳其聰者乎？庾生曰：爾不聞先哲之言乎？人生而靜，天之性也；感物而動，性之欲也；物之感人，無窮而情之好惡無節，故不見可欲，使心不亂，是以惡迹止步，滅影即陰，形情絕於所

託萬感無累乎心。心靜則樂非外唱。樂足則欲無所
淫。唯味作戒。其道彌深。賓曰唯唯。敬承德音。

弔鶴文

晉湛方生

余以元冬修夜。忽聞階前有孤鶴鳴。遡寒風而清叫。
感淒氣而增悲。屬聽未終。余有感焉。乃爲文以弔之。
惟海嶠之竒鳥。資秀氣以誕生。疑鸞皇而比翼。超羽
族而長靈。濯冰霜之素質。颺九臯之竒聲。啄荒庭之
遺粒。漱絕澗之餘清。望雲舒而息翮。仰朝霞而晨征。
輟王子之靈轡。繫虞人之長纓。辭丹穴之神友。與雞
鶩而同庭。軒天衢而奔想。顧樊籠而心驚。獨中宵而
增思。負青霜而夜鳴。資沖天之雋翮。曾不殊於鳥雀。

稟櫛壽之修期。忽同彫於秋薄。匪物之足悲。傷有理而橫落。

筆陣圖

晉衛夫人

若初學書。先須大書。不得從小。善鑒者不寫。善寫者不鑒。多骨微肉者。筋書。多肉微骨者。墨猪。多力豐筋者。聖。無力無筋者。病。一二從其消息而用之。

鮒表

梁韋琳

臣鮒言。伏見除書。以臣爲粽一日熬將軍。油蒸校尉。臞州刺史。脯腊如故。肅承將命。含灰屏息。憑籠臨鼎。載兢載惕。臣美愧夏鱸。味慚冬鯉。常懷鮎服之誚。每懼鼈巖之譏。是以漱流湖底。枕石泥中。不意高賞殊

私曲蒙鈞拔遂得超升綺席忝預玉盤遠廁玳筵猥
頌象箸澤覃紫脯恩加黃腹方當鳴姜動椒紆蘇佩
櫜輕瓢纒動則樞盤如烟濃汁暫停則蘭肴成列宛
轉綠壑之中逍遙朱唇之內銜恩噬澤九殞弗辭不
任屏營之誠謹列銅鎗門奉表以聞

詔荅曰省表具知卿池沼縉紳陂渠俊乂穿蒲入荇
肥滑有聞允堪茲選無勞謝也

賜錢武肅王鐵券

唐昭宗

維乾寧四年歲次丁巳八月甲辰朔四日丁未皇帝
若曰咨爾鎮海鎮東等軍節度浙江東西等道觀察
處置營田招討等使兼兩浙鹽鐵制置發運等使開

府儀同三司檢校太尉兼中書令使持節潤

輟耕錄作閩非

下越等州諸軍事兼潤越等州刺史上柱國彭城郡

王食邑五千戶食實封一百戶錢鏐朕聞銘鄧隲之

勲言垂漢典載孔悝之德事美魯經則知褒德策勲

古今一致頃者董昌僭偽爲昏鏡水狂謀惡貫溷染

齊人而爾披攘兇渠盪定江表忠以衛社稷惠以福

生靈其機也氛祲清其化也疲羸泰拯於粵於塗炭

之上師無私焉保餘杭成金湯之固政有經矣志獎

王室績冠侯藩溢于旂常流在丹素雖鍾繇刊五熟

之釜寶憲勒燕然之山未足顧輟耕錄功抑有異數

是用錫其金版申以誓詞長河有似帶之期泰華有

如拳之日。惟我念功之旨。永將延祚子孫。使卿長襲
寵榮。克保富貴。卿恕九死。子孫三死。或犯常刑。有司
不得加責。承我信誓。往唯欽哉。宜付史館。頒示天下。
中書侍郎兼戶部尚書平章事臣崔允宣奉。

續古文苑卷第二十

專

